








Princeton University Library



32101 072236019








بوشيف السباعي



# جمعية قتل الزوجات

مسرحية - فكاهية - في ثلاثة فصول







Al-Sibā'i, Yūsuf



يوسف السباعي

Jam'iyat qatl



بمقعة قلب الزوجا

مسرحية . فكاهية . في ثلاثة فصول

ملتزم الطبع والنشر

مكتبة النهضة المصرية



# للمؤلف

- |   |                            |                    |
|---|----------------------------|--------------------|
| الناشر: دار التوزيع والطباعة والنشر<br>طبع في شركة فن الطباعة | الطبعة الأولى<br>سنة ١٩٤٧  | } أطيفاف           |
| الناشر: مكتبة الخانجي<br>طبع في شركة فن الطباعة               | الطبعة الثانية<br>سنة ١٩٥١ |                    |
| الناشر: دار التوزيع والطباعة والنشر<br>طبع في شركة فن الطباعة | الطبعة الأولى<br>سنة ١٩٤٧  | } نائب عزرائيل     |
| الناشر: مكتبة الخانجي<br>طبع في شركة فن الطباعة               | الطبعة الثانية<br>سنة ١٩٥٢ |                    |
| الناشر: مكتبة الخانجي<br>طبع في شركة فن الطباعة               | الطبعة الأولى<br>سنة ١٩٤٨  | } اثنتا عشرة امرأة |
| الناشر: مكتبة الخانجي<br>طبع في شركة فن الطباعة               | الطبعة الثانية<br>سنة ١٩٥٠ |                    |
| الناشر: مكتبة الخانجي<br>طبع في شركة فن الطباعة               | الطبعة الثالثة<br>سنة ١٩٥٢ |                    |
| الناشر: دار النشر العربية<br>طبع في دار الاحد بيروت : لبنان   | الطبعة الأولى<br>سنة ١٩٤٨  | } خبايا الصدور     |
| الناشر: مكتبة الخانجي<br>طبع في شركة فن الطباعة               | الطبعة الثانية<br>سنة ١٩٥١ |                    |
| الناشر: مكتبة الخانجي<br>طبع في شركة فن الطباعة               | الطبعة الأولى<br>سنة ١٩٤٨  | } يأمة ضحك         |
| الناشر: مكتبة الخانجي<br>طبع في شركة فن الطباعة               | الطبعة الثانية<br>سنة ١٩٥٠ |                    |
| الناشر: مكتبة الخانجي<br>طبع في شركة فن الطباعة               | الطبعة الأولى<br>سنة ١٩٤٩  | } اثنا عشر رجلا    |
| الناشر: مكتبة الخانجي<br>طبع في شركة فن الطباعة               | الطبعة الثانية<br>سنة ١٩٥١ |                    |
| الناشر: مكتبة النهضة<br>طبع في مطبعة السعادة الكبرى           | الطبعة الأولى<br>سنة ١٩٤٩  | } أرض النفاق       |
| الناشر: مكتبة النهضة<br>طبع في مطبعة مصر                      | الطبعة الثانية<br>سنة ١٩٥٢ |                    |





الناشر : مكتبة الخانجي طبع في شركة فن الطباعة	{ الطبعة الأولى سنة ١٩٥٢	بين الأطلال
الناشر : مكتبة الخانجي طبع في شركة فن الطباعة	{ الطبعة الأولى سنة ١٩٥٢	السقامات
الناشر : دار الفكر العربي طبع في مطبعة الاعتماد	{ الطبعة الأولى سنة ١٩٥٢	سّمار الليالي
الناشر : مكتبة الخانجي طبع في شركة فن الطباعة	{ الطبعة الأولى سنة ١٩٥٢	الشيخ زعرب
الناشر : دار الفكر العربي طبع في مطبعة الاعتماد	{ الطبعة الأولى سنة ١٩٥٢	نقحة من الإيمان
الناشر : نادى القصة طبع في مطبعة روز اليوسف	{ الطبعة الأولى سنة ١٩٥٢	وراء الستار
الناشر : مكتبة الخانجي طبع في شركة فن الطباعة	{ الطبعة الأولى سنة ١٩٥٢	ست نساء وستة رجال
الناشر : دار الفكر العربي طبع في شركة فن الطباعة	{ الطبعة الأولى سنة ١٩٥٢	هذه الحياة
الناشر : مكتبة الخانجي طبع في شركة فن الطباعة	{ الطبعة الأولى سنة ١٩٥٣	البحث عن جسد
الناشر : مكتبة النهضة المصرية طبع في شركة فن الطباعة	{ الطبعة الأولى سنة ١٩٥٣	جمعية قتل الزوجات

## الإهداء

إلى النقاد الذين أثارتهم « أم رتيبة » ،  
واتهموني بالإسفاف والتهريج .  
أهدى مزيداً من الإسفاف والتهريج .

يوسف السباعي



## مقدمة

أحب قبل أن يقدم القارئ على قراءة هذه المسرحية . . أن أجعله على بينة من أمره وأمرى وأمر هذه المسرحية التي يوشك أن يضيع في قراءتها بضع ساعات ثمينة — أو غير ثمينة — من عمره .

أنا لست واعظاً ولا فيلسوفاً ولا حكماً ولا مرشداً . . ولا . . ولا شيء أبداً من هذه الصفات الفاخرة . . التي قد يتوهمها القارئ في الكاتب . . أو يتوهمها الكاتب في نفسه .

أنا عند ما أكتب أحس بمتعة من الكتابة ، وعند ما أقدم ما كتبت للقارئ أحاول أن أدعوه لمشاركتي تلك المتعة ، وتزداد متعتي عند ما أحس أنني نجحت في أن أسبب له نوعاً من المتعة . . وأنى هيات له خلال أيامه المرهقة المتعبة التي تزدهر بها حياته ساعات من المتعة الذهنية قضائها وإيأى في كتابي .

هذا هو كل ما أقصده وأحب أن أبلغه بكتابتي . . فإذا صادف

بها القارىء ما توهم فيه عظة أو حكمة أو أى شىء آخر من هذه  
المسميات المحترمة فأؤكد له أنى لم أقصدها . . . وأنها زجت بنفسها  
بين الكتابة عفواً بلا قصد منى أو تدبير .

فإذا كنت يا أخى القارىء « غلباناً » مثلى ومثل بقية الناس الذين أرهقتهم  
أيامهم من أمرهم نصيباً وعسراً ووددت أن تخفف عنك بعض هذا النصب  
والعسر فاقراً هذه المسرحية . . . فقد نفلح في منحك بعض الراحة والتسلية .  
وإذا كنت قارئاً « قنزوحاً » تضن بوقتك أن يصرف إلا بين  
آيات يبينات من الحكم والعظات فلا تضع وقتك معى عبثاً . . . أمامك  
كتب الأخلاق والتهديب والتربية والفلسفة . . . أو . . . لم أذهب بعيداً . . .  
أمامك الكتب السماوية . . . خذ منها ما شئت من النصيح والعظة . . . ولا أظن  
كاتباً مهما بلغ من الحكمة والعقل والبلاغة والقدرة بقادر على أن يأت  
لك بخير منها .

أما أنا فرسالتى كما قلت لك أن أخفف عنك بعض ضيقك ونصبك  
فإذا نجحت . . . فيها ونعمت . . . وإذا لم . . . فاعذرنى . . . إن شاء  
الأعمال بالنيات .

والسلام عليكم ورحمة الله

بروف السباعي



## أشخاص المسرحية

قرف  
خادم



ميمم الفنط  
فنان فقير يهودي  
الموسيقى والأدب  
والشعر



عمريه  
خادمه



محمود جباب الله  
ابن اخته  
طالب حقوق  
خائب



زكية ولده  
جارية  
راقصة ومنلوجست



أم عمده  
صاحبة البيت  
امرأة قاسية  
سليطة اللسان



الشيخ عجبايب  
شيخ  
من صانعي الأحجيه



بلده  
ابنتها  
فتاة حلوة طيبة



عم نوري  
فلاح غني



نوح انزرى  
زوجها  
موظف سكير  
يهودي الموسيقى








## الفصل الأول

المنظر : سطح منزل في شارع سلامه في حي السيدة زينب . في اليمن قطاع حجرة يقطنها سيد الفنط ومحمود جاب الله . في مواجهتها باب يؤدي الى الحمام والمطبخ . وسرير حديد بأربعة أعمدة برقد تحته محمود وسيد وقد أسدلت عليهما ملاءة السرير فأخفتها . . وعلى اليسار أريكة بالية تعلوها نافذة وضع بدل زجاجها المكسور ورق جرائد . . وفي الوسط منضدة صاج عليها لمبة زجاج وبقايا طعام وأوراق ومنبه وعود . وعلى اليسار الباب المؤدى الى السطح ، وقد كومت وراءه صناديق وسلال وشوالات وأثاث قديم حتي لا يمكن فتحه من الخارج ومعلق على الحائط مشجب ومرآة مشروخة . وفي يسار السطح يبدو الباب الخارجي لحجرة خشبية صغيرة منخفضة وبجوارها تقيصة فراخ . . وفي المواجهة مدخل السطح وجبال غسيل ممتدة بطول السطح . الوقت قبل الفجر في أواخر الشتاء .





## المشهد الأول



[ محمود — سيد ]

[ تمر فترة صمت . . تسمع خلالها دقات المنبه وصياح الديكة دون أن يبدو علي المسرح أحد . . ولجأة يذق جرس المنبه فيندفع سيد من أسفل السرير ويسكت المنبه . . ثم يتسلل على أطراف أصابعه فيرتدى البنطلون والجاكيت فوق الجلباب ويديس قدميه في الخذاء ثم يقف أمام المرآة ليمشط شعره ويتزين وبدندن . محمود يمد رأسه من أسفل السرير وينظر إليه في دهشة ]

محمود — ديهده . . ديهده . . إيه الحكاية يا خال ؟

سيد — [ مأخوذاً بيقظة محمود ] .. حكاية إيه ؟ ما فيش حاجه أبدأ .

محمود — أبدأ ؟ أبدأ ؟ !

سيد — أيوه . . أبدأ . . أبدأ . . شايف في حاجه غريبه ؟

محمود — لا أبدأ . . ولا غريبه ولا حاجه . . بس يعني

مشر زى عوايدك تتسحب كده لوحدك من تحت السرير . . وتسببني أروح ضحية النوم وأقابل لوحدى القضا المستعجل .

إنت ناوى تخلي بيته ؟ !

سید — أخی بیک إزای؟! . أنا ما أنا واقف أهو  
قدامک . . . مین قال لک إن أنا حاسبیک رایج فی النوم  
وانزل . . نام نام . . لسه بدری . . أنا مش حانزل دلوقت . .  
ولما آجی أنزل حاصحیک [مستمراً فی الدندنة والتزین أمام المرآة]  
یا الله ارخی الستاره ونام .

محمود — أنا م؟! أنا م إزای [ ینخرج من تحت السریر ]  
ما یمکنش . . . لازم أعرف إیه سر الختمغه والسببیه اللی  
بتعملها فی روحک دی . . . أنا أعرف إن بینک و بین المرایه  
تنافر شدید . . وخصوصه مستحکمه . . کل واحد منکم ما یطقیش  
التانی . . إزای قادر تقف قدماها الوقفه الطویلہ دی ؟

سید — مکره خالک لا بطل .

محمود — وإیه اللی یمکرهک علی العذاب ده؟! إیه اللی  
یرغمک علی الاصطباح والبلطقه فیما تکره؟! .

سید — محتاج لها یا محمود یا بنی . . مز نوق فیها . لازم  
أهدمها وأسببها لأنی حاستعملها . . حاعر ضها للأبصار .  
محمود — هی إیه دی؟! .

سید — خلقتی . . اللخبطه اللی أنا شایفها فی مرایه  
النحس . . . لازم أساویها شویه . . لازم أحتنفها . .  
وأسببها . . وأساویها . . وأهدمها عشان تبقی مقبوله



شویه ... إن كان علیّ أنا ماہمنیش .. أنا خلاص خدت  
علیہا ، ما بقتش أخاف منها قوی .. لکن ہم ...

حمود — ہم مین ؟!

سید — الی حایشو فوہا .. لازم أوضہا لهم ، لازم  
أھیأها لهم شویہ .

حمود — إیہ أصلہ دہ یا خال ؟! ہی إیہ الی توضہا  
لهم وتیأها لهم .. ہی لحجہ راس ؟! بس مین دول الی خایف  
علیہم قوی من خلقتک ؟! انت ما انت طول النهار ماشی  
بہا کدہ عریانہ .. وسایہا علی خلق اللہ .. اشمعنی دول  
یعنی الی لازم توضہا لهم .. وتیأها لهم .. یبقوا إیہ دول ؟  
یطلعوا ایہ ؟

سید — یطلعوا ؟ .. ما یطلعوش ابدأ .. بیرموا سہامہم  
کدہ وهم قاعدین .. بیصوبوا سحرہم کدہ وهما نعانین .  
حمود — ولا انا فام حاجہ .. ہم ایہ دول الی بیرموا  
السہام ویوزعوا السحر .. یكونوش ہنود حمر ؟!

سید — حمر ؟ . یا غبی . دول سود . سوادہم عجب .

حمود — ہنود ، سود . إیہ الکلام دہ ؟

سید — ہنود ؟ . ہنود ایہ یا جدع . مین قال ہنود

سود ؟ .

محمود — أَمال يبقوا إيه دول اللي قاعدين يسـجروا  
ويضربوا بالسهم ، واللى انت عمَّال توضع لهم لحمه الراس  
بتاعتك ؟

سيد — عيون .. عيون سود .. مش هنود سود  
يامغفل ، عيون المها ، عيون ، فى طرفها حور ، عيون من  
اللى قال فيها الشاعر : « بصر عن ذا اللب حتى لا حراك به » .  
محمود — وانت بقى ذا اللب الذى لا حراك به ؟  
سيد — لا حراك ، ولا روح ، ولا نفس ،  
ولا حتى .. لب .

محمود — يعنى بالاختصار . انت بتحب ؟

سيد — أيوه .

محمود — قديمه .

سيد — إيه هى اللى قديمه دى ؟

محمود — مسألة الحب بتاعتك ، طول عمرك وانت  
بتحب . من يوم ما وعيت عليك وانت عاشق مستهام .  
أنا فاكرو وأنا صغير يوم ما جيت لنا البيت وهدومك  
تحت باطك ، لما أبوك طردك وحرّم عليك تخش البيت  
من تحت راس قسايد الحب اللى كنت بتعملها فى مرات



الشيخ علوان ، يعنى من يومك وانت حبيب ومستندات  
الحب بتاعتك ، لا تعد ولا تحصى .

سيد — مستندات الحب ؟ . إيه هي دي ؟

محمود — الخيايه ، والفقر . وتلمتيت قصيده ، وخمسين  
قصه . وأربعين غنوه . محبوسه بين أربع جدران فوق  
سطوح أم عبده ، ما سمعهاش غيرك ، وغيرى . والغلبان  
شندى عبد الجليل الجر جاوى . هو الحب دا حاجه جدت  
عليك .. طول عمرى وأنا أوعى عليك ، تبص لنجوم السما  
وتنهد ، وتبص لغروب الشمس وتتحسر . وتبص لطلعة  
القمر وتتأوه . ما فيش حاجه من الحاجات دى تعدى عليك  
من سكات أبدأ ، لكن كل ده ما كانش له صلّه بخلقك  
أبدأ . كل الحب اللي انت غرقان فيه ده ما خلا كمش مره  
واحد تبص فى المرايه . ولا تسبب شعرك ولا تهندم  
نفسك . إيه اللي جدّ عليك ؟ !

سيد — ما كانش حب يا محمود .

محمود — أمال كان إيه يا خال ؟ !

سيد — كان هيأمان . كان إفراط فى الحساسيه . كان  
انتظار حب . كان حب من طرف واحد ، كان حب ،  
والحبيب مجهول .

محمود — يعني كده ، زى الجنايه . لما تنقيد ضد مجهول .  
 سيد — كان عندى فيض من الحب ، لكن ما كانش  
 مترکز فى حاجه مخصوصه . كنت أبص للنجوم وأحس  
 أنى بجلّق بينها وأدور على حاجه ناقصانى . كنت أسمع  
 صوت الكروان سارى مع نسيم الفجر ، وأحس انه  
 بيحمل لى رساله من حبيب ناى . كنت أبص للقمر ويتبأ  
 لى إن فى وشه ابتسامه حلوه بتحيني . كنت أمسك العود  
 بتاعى وأحس بصوابعى بتجرى عليه ، مش بنغم ولا لحن ،  
 لكن بمناجاة . للحبيب الهائم الغايب . كنت بحب ، لكن  
 ما كنتش عارف باحب مين . لغاية ما ليله من الليالى ،  
 سمعت صوت لذيذ بيدندن ، بغنوة : « فى الليل لما خلى ،  
 إلا من البساكى ، ، النوح على الدوح حلى ، للصارخ  
 الشاكي ، ما تعرف المبتلى فى الليل من الحاكي ، وكنت  
 قاعد مره على سور السطح ، وسمعت الدندنه وسط سكون  
 الليل الخالى . حسيت جسمى بيرتعش . ولقيت دموعى  
 نازله بتجرى زى السيل .

محمود — وعرفت مين صاحبة الصوت ؟  
 سيد — عرفتها .. ليله .. ورا ليله .. بقيت أفعد  
 لوحدى أسمع الدندنه .. ولقيت الإحساس الفياض



والشعور الهائم والقلب التايه .. ابتدوا يتركزوا في الصوت  
وفي صاحبة الصوت .. واتجمع كل الحب الخيران بين  
النجوم والسما والقمر والغروب والبلابل .. واتحط كله في  
صاحبتنا دي .

محمود — بس مين هي ؟

سيد — وبقيت أحس إن الأمانى بتاعتي في الدنيا كلها  
انحصرت .. في حاجه واحده .. مش إني أبقى فنان شهير ،  
ولا صاحب ثروه ولا سلطان .. بل في إني أقعد كل ليله  
واستنى لغاية ماتخرج في البلكونه .. وألمح خيالها في الليل ،  
وأسمع الدندنه .. كل سعادتى كانت متركزه في اللحظات  
القصيره دي .

محمود — هي مين بس يا خال ما تقولى وتريح قلبي ..  
شفتها بالنهار والا لا ؟

سيد — شفتها .. وحسيت زى اما أكون بقالى ثلاثين  
سنه ماشى في صحرا في عز الشمس .. ولقيت شجره خضرا  
تحتها ميه وأكل .. حسيت زى اما أكون لقيت حاجه  
بتاعتي .. مش غريبه على .. انت مجربتش الحب يا محمود ؟  
ما تعرفش حاجه عن الحب ؟

محمود — والله يا خال .. الحب بتاع الصحرا والشجره

الخضرا .. وهات لى معاك بقره .. دا مجربتوش .. أنا  
أصلى ماكش كثير من حكاية سكون الليل .. والنسيم  
والحاجات دى .. أنا بقالى سنتين ماشى مع البنت زكيه  
ولعه ، .. ومرىحانى خالص .. كل ليله ألاقبها محضرا لى  
الكاسين والعشا .. أشرب الكاسين وآكل اللقمتين .. وأنا ملى  
شويه .. وتانى نازل .. حاجه أسطه خالص .. لاتعب ..  
ولا صرف .. ولو انها اليومين دول موغوشانى شويه ..  
من حكاية كده .. ربنا يستر .

سيد — إنت ماتعرفش الحب ، الحب اللى أنا بقول لك  
عليه ، بينك وبينه ما بين السما والأرض ، الفرق بين اللى  
بتعمله وبين الحب ، زى الفرق بين الكلب اللى بينهش حته  
لحه ، والبني آدم السابج فى روضة بين الزهر والبلابل .

محمود — والله ياخال ، أنا بااحب اللحمه

سيد — كل إنسان وله طبيعته ، وكل طبيعه ولها الحاجه  
اللى ترضيها ، إنت تحس إنه يرضيك كاسين وحضنين ،  
أى كاسين وأى حضنين ، وأنا با احس إنه يرضينى مجرد  
صوت أو كلمه أو لمسه ، بس من مخلوق معين وإنسان  
مخصوص ، يمكن يمر على العمر بطوله وأنا مش لاقبه ،  
ويمكن يخلص العمر واخرج من الدنيا وأنا بقول مع اللى قال



« عبثاً خلقت ، ، ولكن دلوقت حبيت إن أنا ماتخلقتش  
عبث ، وإن فيه حاجه تستاهل الحياه والوجود ، وإن العمر  
ماراحش ، ومش حايروح أونظه ، حاسس إن أنا لاقيت  
الحاجه اللي اتخلقت علشانها ، ولو خلصت الحياه بعد كده ،  
مش حاندم .. لأنى شاعر إني خدت اللي أنا عايزه منها .  
محمود — ديهده ، ديهده ، إيه دا كله ؟! الظاهر إنك  
واقع قوى !! .

سيد — قوى ، قوى ، قوى ، إذا كان الحب اسمه فى  
لضتك وقوع .

محمود — ومين هى اللي عملت فيك كده ؟! قوللى مين  
هى دى بنت الأروبه علشان أشوف تستاهل كل اللي  
بتقوله عليها والا لا ، مين هى دى صاحبة العيون السود  
اللى « يصرعن ذا اللب » ، أعرفها أنا ؟! .

سيد — أبوه .

محمود — وشفتها ؟! .

سيد — أبوه .

محمود — طيب يا أخى قوللى مين هى ورييخى ؟!

سيد — بهيه .

محمود — بهيه ؟ بنت أم عبده ؟ .

سيد - أبوه .

محمود - كده مره واحده ؟ ، يا نهارك اسود ياخال ،  
ودى تقدر عليها إزاي ؟ البنت من ناحية الخلاوه حلوه ،  
بت زى اللوز ، بس جد قوى ، وأنا ما احبش الجد ،  
وما احبش الهوى العذرى ، وما تنساش إنها بنت أم عبده  
كمان ، يعنى ما يمكنش تقدر تقرب لها ، دى ساكنه فى منطقة  
الخطر ، فى المنطقه الحرام ، ودى وصلت معاها لغاية إيه ،  
حب من جانب واحد زى عوايدك ، من بعيد لبعيد ،  
والا حصل حاجه ؟ .

سيد - فضلت مده طويله ، والحب من جانب واحد  
وأنا سعيد بيه جداً .. كل اللي أتمناه إنى ألمحها بالليل واسمع  
صوتها وما كانش عندى فكره أبدأ إنها يمكن تحس بي ،  
لغاية ما ليله من ذات الليالي قعدت ادندن أنا بالنى ،  
فدندنت هى معايا ، وبعدين فى الآخر رفعت راسها لفوق  
وضحكك وشاورت بالسلام .

محمود - وعملت إيه انت ؟

سيد - حسيت إن أنا مش ماشى على الأرض ،  
حسيت إن أنا بطير فى السما ، حسيت إن الدنيا  
مش سايعانى . ماتتصورش أد إيه تكون سعادة المحب



لما يحس إن اللي بيحبه ميزه من دون الناس ، وأنه خصه  
من دون الخلق دول بابتسامه أو بإشاره أو بكلمه ، سعادته  
عجيبه ، عجيبه جداً ، وبقيت بالاحس وأنا بستناها بالليل ، إنها  
حاسه بيه ، وانها بتغنى لى أنا .

محمود - وبعدين فضلت كده تغنى لك بالليل وانت  
تصفر لها ؟ أمال إيه اللي خلاك صباح تسبب أوى كده ؟  
سيد - امبارح حسيت بخنين عجيب لها ، وكان نفسى  
أدفع نص عمرى وأمسها أو أمسك إيدها ، فيعد ماخلصت  
الدندنة رحت متجراً ومكلمها ، قولتها بالشويش ، إن  
نفسى أشوفها .. فضلت واقفه ساكته شويه وانا كأنى منتظر  
حكم بالإعدام لغاية فى الآخر ما قالت لى إنها ماتقدرش تطلع  
دلوقت ، ولكن بكره الصبح بدرى حاتطلع لى الساعة ٦ ،  
[ يرهف السمع ] سامع حاجه ؟ ، فيه صوت رجلين ؟ !

محمود [ بنصت ] - لأ مش سامع .

سيد [ بنظر الى المنبه ] - على العموم لسه فاضل عشر  
دقايق ، ياسلام ، تصور إن أنا ما نتمش نص ساعه على  
بعضها طول الليله اللي فاتت .

محمود - ليه ١٩ بخيخة الفليت ماهى محطوطه جنبك .  
سيد - فليت إيه يا أخى ، أنا ما نتمش من الفرحة ،

مش من الناموس ، أنا مش مصدق إن أنا حاكلها وحاسلم  
عليها ، أقول لها إيه مش عارف ، حضرت كلام كثير قوى  
عشان أقوله ، شعر ونثر ومواويل ، لكن أنا عارف كل حاجه  
حانطير من مخى ساعة ما أقف قدامها ، أنا باتلخبط قوام لما  
عينها تيجى فى عيني .. أظن يدوبك بقى لما أستعد للخروج .  
[ يبدأ فى رفع الأشياء المسكومة وراء الباب ] .

محمود [ مزعجاً ] — إيه ده ؟ ! إيه اللي بتعمله ده ؟ !

سيد — بشيل الحاجات دى علشان افتح الباب .

محمود [ يسرع بإعادة الأشياء مكانها ] — أنت مجنون ..  
عايز تشيل المتاريس والحصون اللي بندايف بيها عن كياننا ..  
عايز تزيل الخطوط الدفاعية وتسيبنا كده مكشوفين  
قدام الأعداء ؟

سيد — الأعداء زمانهم نايمين فى سابع نومه .. ما فيش  
فى السطوح دلوقت إلا الأحبه .

محمود — والله أنا خايف من الأحبه بتوعك دول  
ليجيوا لنا الكافيه ... خايف لیسكونوا حلفاء مع العدو .  
ما بلاش يا خال خروج من الباب دلوقت .. خلينا  
مستورين .. أنا طول الليل احلم بالوليه أم عبده . وإنها  
كبست علينا زى عزرائيل الموت .



سید — طب بس ما تفسر ش .. قال الله ولا فالک .  
محمود — ما فسر ش ازای .. وانت بتفتح علينا باب  
جهنم .. قال الباب اللي يجيلك منه الريح سده واستريح ..  
واحننا مش بيجيلنا منه ريح وبس .. بيجيلنا سموم ..  
هوب .. عواصف .

سید — يا ستار .. طب بس اخفيها سيره ... ندرن  
عليه يوم ما اتم على قرشين أسدد بها الأجره المتأخره ..  
لاحظهم لها على أقدم برطوشه .. وأخزأ حبابي عينيها .  
محمود — قرشين؟ منين دول؟! . من القصائد ..  
والا من الأغاني؟! .

سید — يا سيدى ربك كريم .. يعنى هوا احنا  
حانفضل على طول كده على الحديده . مسير الجواهر اللي  
فى الوحل ، يعرفوا الناس قيمتها .

محمود — طب و حياة أبوك . تسيننا من الجواهر اللي فى  
الوحل ، إذا كنا حانفضل معتمدین عليهم ، حانتنا مدفونين  
معاهم فى الوحل . لا احنا طالعين ولا همّ طالعين ، احنا كل  
أملنا دلوقت فى أولاد الصرم اللي فى البلد بيعتولنا حاجه .

سید — لا .. أنا يتست منهم خالص . ثلاث تشهر  
ما بيعتوش نكله . وهى الوليه أمك دى مش عارفه إن لها ابن

يتعلم ، ويهيص ، ويفرفش ، وأخ يشقى ليل ونهار في الفن  
اللى ما حدش يقدره . [ بأخذ في شيل الأشياء من وراء الباب ]  
خلينا نخرج لحسن يدوبك فاضل خمس دقائق .

محمود — [ في استماتة ويمسك بالأشياء ] مايمكنش ، أنا قتيل

الباب ده .

سيد — أمال أخرج لها منين ؟

محمود — زى ما بتخرج كل مره .. من الباب الخلفى  
[ يشير الى النافذة الزجاجية ] احنا مش بقالنا شهر بنتزل ونطلع  
على مواسير الميه ، زى النسانيس ، والوليه مش حاسه بيدينا .  
عايز نخرج من الباب وتضيعنا في شربة ميه . بقلنا شهر متمتعين  
بالأوده ، والوليه مش قادره تقفشنا ، تصور لو اتلّمت على  
واحد منا ، حاجيب خبره . أنا سامعها امبارح من ورا  
الباب وهى بتقول لقرقر ، آه يا نارى لو أتلّم على واحد  
منهم الضلاليه النصابين ، أربع تشهر ما يدفعوش الأجره  
والنبي لاطلعها على جتتهم .

سيد — يا ساتر !! سمعتها بتقول كده ؟ !

محمود — بودنى دى ، والواد قرقر الله يستره ، قال لها  
والله ياست ما حد بيعتر لهم على أثر ، أنا عارف دول اختفوا



فين ، زى اما تكون الأرض انشقت وبلغتهم ، يمكن سافرم  
يحيبوا فلوس .

سيد - طب ودلوقت أخرج ازاي ؟ ادى الحكايه  
كلها فاضل ثلاث أربع دقائق وتطب .

محمود - يعنى كان لازم تدبلك مواعيد فى السطوح ؟  
لازم تحديد مواعيد الغرام ، فى مناطق الخطر ؟

سيد - أهو اللى حصل ، ما خطرش بيالى أبدأ حكاية  
أم عبده دى ، أنا ساعتها كنت بخلق بأجنحة الحب فى سماء  
السعادة .

محمود - طيب وحياة أبوك تخلى أجنحة الحب  
تنزلك لغاية تحت ، يا الله وربنا ، الشباك أهو ، مادام خايف  
من المواسير .

سيد - أنا مش خايف من المواسير ، هو انا بعد  
الشهر اللى فات دا اللى خدت فيه السكه قياسه على المواسير ،  
بقيت أخاف من المواسير . لكن الفكره إن أنا لما انزل  
تحت حاضطر اطلع تانى على السلم علشان أوصل للسطوح ،  
ولازم حافوت عليها ، بيتق ما عملناش حاجه ، نبقى عملنازى  
جحا لما قالوا له ودنك منين . اسمع أنا حاخرج من الباب  
واللى يحصل يحصل . اوعى [ يقذف بالأشياء بعيداً عن الباب ]

هي موته والا اكثر ، أنا لو جت على شنقي لازم اخرج ،  
 بقي معقول هي تطلع لي وتآيس وانا اقف زى الجبان  
 ورا الباب ، خايف من امها ؟! اوعى يا شيخ بلا مسخره ،  
 [ تبدو بهية من مدخل السطح ويسمع وقع أقدامها ] سامع ، الظاهر  
 انها جت . ياسلام ، أنا حاسس إن قلبي بيطب ، أنا مش  
 قادر أقف على رجلي ، مين يصدق إن أنا حاكلها وخط  
 إيدي فى إيدها ؟!

محمود — [ بدفمه ] طب بس اخرج .. اخرج ...  
 إن شاء الله حاجيب لك الكافيه .. أنا يا عم حاخش فى الخبأ  
 أكمل نومي .. ولما تخلص من التخليق بأجنحة الحب فى  
 سماء السعادة .. ابقى طب على صحينى .. اتفضل .  
 [ يدخل محمود أسفل السرير ويخرج سيد متسلا فيلمح بهيه فيقترب  
 منها متردداً ]

## المشهد الثانى



[ سيد — بهيه ]

سيد — [ لنفسه ] ياسلام . أنا متبها لى إن أنا فى حلم . مش  
 مصدق انها حقيقة بتحبينى وانها تخاطر بنفسها وسمعتها ...



عشاقى أنا .. دى نعمه ما استحقهاش .. دى سعادته أنا مش  
أدّها ، دا كرم من ربنا ما استهلوش . فيه فى الدنيا سعادته  
أكثر من سعادة المحب لما يلاقى نفسه محبوب .

[ يصل الى بهيه فتبدو عليها الدهشة عندما تبرزه ]

بهيه — مين ؟! سيد افندى ؟

سيد — أيوه أنا سيد .. أنا .. أنا .. أنا مش عارف  
أقول لك إيه .. فيه حاجات كتير قوى عايز أقول لها لك ..  
لكن محتار ابتدى ازاي .

بهيه — [ مازالك فى دهشتها ] .. أنت ؟! أنت !!

سيد — أيوه أنا .. أنا عارف إنك خايفه قوى ..  
عارف انك أول مره تقفى موقف زى دا ! . لكن أنا  
متأسف .. متأسف جداً .

بهيه — لكن .. لكن ...

سيد — لكن إيه ؟! انت خايفه من إيه ؟

بهيه — أنا مش خايفه .. لكن .. أمال ...

سيد — أمال إيه ؟

بهيه — أمال فين محمود ؟!

سيد — محمود ؟!

بهيه — أيوه محمود .. كان لازم يقابلنى دلوقت ..

امبارح بالليل بعد ما صفر بالنای قال لی اطلعی فقلت له انی  
ماقدرش اطلع بالليل أبدأ وادیت له میعاد دلوقت .

سید — [ مردداً فی ذہول ] محمود ؟ ! محمود !!

بہیہ — مالہ ؟ ! ہو جرا لہ حاجہ ؟ !

سید — [ فی یأس شدید ] أبدأ .. أبدأ ماجرالوش حاجہ  
[ لنفسه ] أنا اللی جرای .. أنا اللی اتعلقت بأمل واهی ..  
أنا اللی اتحطم قلبی ، وضاع أملی .. أنا اللی طمعت نفسی  
بسعادة ماتخلقتلہاش .

بہیہ — مالک یا سید افندی سکت لیہ .. قوللی !!

طمینی ! ہو محمود جرا لہ حاجہ ؟

سید — أدکده بتخانی علیہ ؟ !

بہیہ — طبعاً .. طمینی .. قوللی فیہ إیہ ؟ !

سید — بتجیہ قوی ؟ !

بہیہ — قوی .. قوی .

سید — بتجی فیہ إیہ ؟

بہیہ — کل حاجہ فیہ .. أحب الهواء اللی یتنفسہ .  
والأرض اللی یمشی علیہا .. من أول ما شفقتہ حسیت إن  
فیہ حاجہ شدتفی لہ .

سید — [ لنفسه ] أنا کان بالحبك كده ، وأکتر من كده



لكن اتقى مش حاسه بي ، وهو كان مش حاسس بيكي ..  
دنيا عجيبه .. تحب اللخبطه ؟!

بهيه — مانقوللى يا أخى .. طمنى .. فيه إيه ؟!

سيد — ولا حاجه ، ولا حاجه أبدا .

بهيه — أمال ماجاش ليه ؟!

سيد — ماجاش ليه؟ [ لنفسه ] أقول لها إيه ؟! أقول

لها إنه مش حاسس بيها ، أقول لها إنه ماشى مع ذكيه

ولعه ، وانه مايحبش الهوى العذرى ؟! أقول لها إن

أنا اللي بااعبدها وانا اللي كنت بااضرِب لها الناي ؟! لكن

إيه الفايده ؟ هي بتجبه هوّه .. مش بتحب الناي .. هي حبت

الناي علشان هوّه .. مش حبته علشان الناي .. إيه الفايده

لما احطم قلبها زى ما حطمت قلبي .. ما يمكنش اخذها ..

لأنى باحبها .. مقدرش اشوفها زعلانه .

بهيه — مانقوللى يا أخى .. ماجاش ليه ؟

سيد — أيوه .. ماجاش .. علشان .. علشان ...

بهيه — علشان إيه ؟ قول .. جننتى ؟!

سيد — علشان .. أصله .. تعبان شويه .

بهيه — ماله ؟ فيه إيه .. تعبان ازاي ؟

سيد — لا .. ولا حاجه .. بس عنده شويه ...

بہیہ — شویۃ ایہ ؟ انطق !

سید — [ لفسہ ] شویۃ ایہ .. ابن الصرمہ ، داأنا سایہ

زی الحصان [ لبہیہ ] عنده شویۃ مخص .

بہیہ — مخص ؟ مسکین .. لحسن یکون عنده المصران

الاعور .. لازم تجیب له دکتور ، ازای تسیبہ کده ؟

سید — لا .. لا .. مافیش أعور ولا حاجه ، مافیش

لزوم للڈکتور .. دا مخص بسیط .

بہیہ — بسیط ازای ؟ ! ازای تسیبہ کده ، مش حرام

علیک .. لازم اشوفہ .

سید — تشوفیہ ؟ لا .. لا .. مافیش لزوم .. مافیش

داعی .

بہیہ — لازم اطمئن علیہ [ تتقدم نحو الباب ] .

سید — [ لفسہ ] یا نهار اسود .. دلوقت تعرف کل

حاجه [ ساداً الطريق الی الباب ] یا ستی اطمئی .. دا زمانہ

بقی کوپس خالص .

بہیہ — لازم اشوفہ بعینی .

سید — طب بس استنی شویہ .. أما اذی له خبر ..

استنی ثانیہ واحده [ بندفع الی داخل الحجرۃ ویغلق الباب وراءہ ،

ویمد بده تحت السریر لیخرج محمود ] محمود .. محمود ، قوم قوام .



محمود — [ فذعر من أسفل السرير ] إيه .. إيه .. فيه إيه ؟  
هی جت ؟ هی جت ؟

سید — هی مین دی .

محمود — أم عبده ؟

سید — لا ماجتش ولا حاجه .. بس اطلع بسرعه ،  
بسرعه .. [ بخروج محمود ] نام فوق السرير .. یا الله یا آخی  
انفطی بسرعه ، وقول آه .

محمود — أقول آه ازای ؟

سید — قول آه . الله یخرب یتک . انت عندک مغص .

محمود — هوّا إيه أصله ده ؟! أنا ما عندیش مغص !

سید — عندک مغص .. قول آه .. قول یا جدع ..

قول وبس .

محمود — آه .. آه .

[ تدخل بهیه ]

بهیه — ماله .. مالک یا محمود ؟

سید — ما تکلمهش کثیر لحسن المغص اتحرک علیه ..

لکن إن شاء الله حایروح حالا .. دا برد بسیط .. مافیش

خوف منه .

[ محمود ینظر بطرف عینیة الی بهیه فی دهشة و اعجاب فیقرصه سید

فیصبح آه ]

بہیہ — مسکین .. سلامتک .. ألف سلامہ .  
سید — یا اللہ بینا بقی .. لحسن حد یطب .  
بہیہ — لازم تحط له حاجہ سخنہ علی معدتہ .  
سید — آیوہ .. آیوہ .. أنا حا عمل له اللزام .

[ یجرها من بدھا نحو الباب ]

بہیہ — لازم تجیب له دکتور .. أنا حا طلع اطل علیہ  
باللیل .. لما تیجوا تناموا .

سید — طیب .. طیب .. بس یا اللہ بینا بقی .  
بہیہ — خد بالک منه قوی ، علشان خاطر ی .  
سید — علشان خاطرک ؟! علشان خاطرک حا عمل کل  
حاجہ .. کل حاجہ فی الدنیا .. مستعد اعمالها علشانک .

[ تخرج بہیہ ، و یعود سید مطراً حزیناً و یرغمی علی مقعد و یطرق  
برأسه علی کفہ و یتنهد ]



## المشهد الثالث



[ سيد — محمود ]

محمود — [ مستمراً في تأوّه وقد أخفى رأسه تحت الملاءة ]  
آه .. آه .

سيد — بس خلاص . كفايه . [ يتأوّه في بأس ] آه .

محمود — [ يرفع رأسه من تحت الملاءة ] هيه خلاص مشيت . [ يقفز واقفاً ] إيه الحكاياه ؟ فهمنى ؟ إيه اللي جرى ؟!

سيد — [ وهو مستمر في اطرافه واخفاء وجهه بسكفه ]  
ولا حاجه .

محمود — ولا حاجه إزاي !! كل ده وولا حاجه !  
تصحبيني من عز النوم ، وتجر جرنى من تحت السرير وترمينى  
فوقه ، وتقوللى قول آه ، آه ، وأسألك دلوقتى تقوللى  
ولا حاجه ، فهمنى إيه اللي حصل ؟ إيه اللي دخلها هنا وإيه  
اللى خلاك تقول لها إن انا عندى مخص ، وأنا صاغ سليم ،  
فهمنى يا خال ، إيه اللي جرى ؟!

سید — [فضیق وبأس] قولتلك يا أخى ولا حاجة ،  
سینى دلوقت .

محمود — ما یمکنش أسییک إلا لما أعرف إیه اللى  
جرى ، ورینی وشك كده [ یزیح کف سید عن وجهه ، فیری  
عبرات صامته تنساب على خديه ، فيبدو عليه التأثر والدمشة ] الله ،  
إیه ده ، إنت بتعيط . مالك يا خال ؟! قوللى جرى إیه ؟!  
قوللى الحقیقه ، إیه اللى زعلك كده . أنا عمرى ما شفتك  
بتعيط أبداً . کلّنی يا خال ، أنا ما طيقش أشوفك كده ؟  
قوللى إیه اللى حصل . أنا مستعد أعمل لك كل حاجة علشان  
أضیع زعلك . . بس فهمنى .

سید ( یتنهد تنهیده طویلة ) — ولا حاجة . ما فیش  
حاجه .

محمود — مش ممکن ، لازم فيه حاجة حصلت .  
سید — حصل حاجة ما لهاش علاج ، لا أنت ،  
ولا أنا . ولا أى واحد يقدر یصلحها . سخریه بسیطه من  
سخریات الدنيا . عبث هایف من عبث الأقدار ، [ رافعاً  
کتفیه ماداً شفته السفلی ] حانعمل فیها إیه ، ما فیش غیر إننا  
نستحملها ونسکت .

محمود — إیه هو ده ؟! أنا مش فاهم حاجة أبداً . إنت



صاحج مبسوط وعمّال تمسبب في شعرك وتهياً في نفسك  
وبتقول إنك بتخلق بأجنحة الحب في سماء السعادة .  
وبتقول ما فيش على وش الأرض مخلوق أسعد منك .  
لأنك محب محبوب . وعندك موعد حب ، وخرجت  
علشان تقابل اللي بتحبها وتحبك .  
سيد — كنت فاكر كده .

محمود — وبعدين ؟!

سيد — وبعدين طلعت إنها بتحب واحد تاني .  
محمود — واحد تاني ؟! أمال كانت بتشاور لك  
وتضحك لك ، وادتك الميعاد ليه ؟

سيد — ما كانش ليه دا كله .. كان لواحد تاني .

محمود — واحد تاني ؟! إزاي !

سيد — كانت بتحب واحد تاني ، وافتكرت إن اللي  
واقف في الضله ويصفر لها بالنأي هو الشخص اللي بتجبه ،  
فشاورت له وسلت عليه ، وادت له ميعاد .

محمود — وعرفته يبقى مين ؟!

سيد — يبقى اللي بيقاه ؟

محمود — ازاي الكلام ده ، مين ابن الأروبه دا ، وأنا  
أجيب لك خبره ، أحبه لك من على وش الأرض ؟

سید — ما فیش لزوم .

محمود — ما فیش لزوم إزای ! لازم أعرفه ؟

سید — ضروری یعنی ؟

محمود — طبعاً .

سید — إنت ؟

محمود — أنا ؟ . أنا ؟ أنا ؟ [ مستفرقاً فی نوبة من الضحك ] ،

أنا ؟ . مش ممكن ، إنت بتضحك علیّ یا خال ؟

سید — با کلک جد یا محمود .

محمود — قول کلام غیر ده یا خال !!

سید — دی الحقیقه ، انت عارف أنا بجهها إزای ؟ !

محمود — میت صبا به .

سید — أهی هی کمان کده .

محمود — بتحبنی أنا ؟ لیه ، وبتاع إیه ؟ وعلشان إیه ؟ !

سید — اللی حصل .

محمود — لکن أنا ما عندبش أی شعور ناحیتها ، دی

مش النوع اللی یدخل مزاجی أبدأ ، دی واحده شریفه  
وعذراء ، وأنا لا احب الشرفا ، ولا العذاری .

سید — ماهی دی المصیبه . . ماهی دی السخریه . .

لو کنا احنا الاتین بنحبها وانت اللی فزت بیها کانت بقت



حاجه معقوله .. لكن أنا أحبها ، وهى مش حاسه بيه ،  
وهى تعبدك ، وانت مش حاسس بيها ، دى سخرية القدر  
اللى على أصولها .. دى مهارة الأقدار فى تعذيب الإنسان  
وإيلامه .. لكن على العموم أنا مش عايزها تحس باللى  
أنا حاسس بيه .. مش عايزها تتصدم الصدمه اللى أنا تصدمتها .  
مش عايزها تتألم زى ما أنا بتألم .. أنا مجرّب الشعور ده  
وعارفه ، وأنا لغاية دلوقت بالحبها ، وحافظ لقلبها طول  
عمرى ، وما اقدرش افكر إنها تتألم .. ما طيقش .

محمود — [ مندمناً ] إيه ياخويه ده ، والعمل ؟

سيد — العمل ما تكسفهش .. زى ما كسفتنى ؟

محمود — يعنى إيه ؟!

سيد — يعنى عايزك تحبها ، وكان تخلص فى حبك لها .

محمود — إيه ؟! أحبها ؟! وأخلص فى حبي لها ؟!

إيه أصل ده يا خال ؟! انت جرالك حاجه ؟!

سيد — اسمع يا محمود .. أنا باتكلم جد .. البنت دى

مش بنى آدمه عاديه ، دى ملاك ، وهى بتحبك حب ،

ما تستهوش أبداً .. لو كانت بتحبنى ربع الحب اللى

بتجهولك ده .. كنت حاسيت إن أنا أسعد مخلوق على ظهر

الأرض ، ولو كنت أعرف إن الحب دا يمكن الإنسان

يتقله بسهولة كنت نقلته ، لكن أنا عارف إن ما فيش فايده  
أنا يائس من حبها . . لكن حاسس إن أنا عايز أسعدها ،  
ولو كنت أنا أقدر أسعدها بنفسى كنت سعدتها لكن المصيبه  
اللى يقدر يسعدها انت ، وعشان كده لازم تسعدها . .  
لازم تحبها ، لازم تكون كويس معاها علشان تستاهل  
حبها . . لازم تبقى إنسان جد ، وتستقيم فى الدراسه علشان  
تبقى شخص محترم ولك مركز .

محمود — يفتح الله . . أنا لأنا عايز أحبها ولا استاهل  
حبها . . أنا مبسوط كده خالص ، كفايه على زكيه ولعه ،  
على اد إيدى ، وبسطانى وميآنى ، والأشيا رضا . . إبعد  
عنى ياخال وحيآة أبوك أنا لا بتاع حب ، ولا بتاع جد . .  
انت عارف من زمان ان أنا ماليش فى الكلام ده . .  
وما تنفاس إن البت زكيه نفعا نا برضه لولاها كنا متنا  
من الجوع ، أهى برضه بتنفعنا بقرشين بأكلتين ، وحكاية  
الاستقامه فى المدرسه دى عارف مَعْنَتها إيه ؟ إنى أنجح  
وأخرج ، وتنقطع الفلوس اللى يبيعتموها لنا م البلد ،  
ولا يبقى عندنا مصاريف مدرسه نضيعها ، ولا رسوم  
امتحان نتشبرق بيها ، ولا تمن كتب نسدد بيها ديوننا ،  
واقعد معاك كده على باب الله . لا شغله ولا مشغله ، انت



عارف إن أنا بتاع شغل؟ وحياة أبوك يا خال سبينا من  
السيره دى ، خيلنا كافرين خيرنا شرنا .. كفايه أم عبده  
واللى عاملاه فينا ، انت راجل بتاع حب .. حب زاي  
ماانت عايز ، ماחדش قال لك حاجه .. لكن تجرجرنى  
معاك ، وتقول عايزك تحب ، وعايزك تبق أهل للحب ،  
وعايزك تبق جد ، وتستقيم .. كفايه كده . يفتح الله .  
حد الله بينى وبينك .

[ بسمع فجأة صوت صياح فراخ وضجة في حجرة الفراخ ..  
ثم يفتح باب حجرة الفراخ ويخرج قرقر من الحجرة وهو يسب ويلعن  
محاولاً حبس الفراخ في الغرفة وفي يده قلة ، وفي الوقت نفسه يصيب الذعر  
محمود وسيد فيقفان ويجمعان الأشياء وراء الباب ]

محمود — أنا مش قلت لك أنا طول الليل أحلم بيها ..  
هات .. هات .. حط التراييزه كان .

سيد — بس يا أخينا .. كفايه كده .. هي كانت دبابه ..  
كفايه خالص .

محمود — وألعن من الدبابه .. دى صاروخ .. دى  
ديناميت ، يا بابى ، أنا يا عم حاخش المطبخ .. كان فيه حتة  
جنبه رومى قديمه . إياك يكون الفار ساب لنا منها حاجه .  
سيد — وانا اما خش أتوضا .

[ يخرج الاثنان من الباب المؤدى للمطبخ ويقف قرقر في السطوح ]

## المشهد الرابع



[ قرقر — عديله ]

قرقر — [ بمد أن بنتي من شلق الباب على الفراخ ] يا ناس  
يا هوه ، يا عالم ، حد في الدنيا يرضى بكده ، طول الليل  
ما اشوفش النوم . أنا قرقر المسيط ، يحكم على الزمان ،  
وأنا م في عشة فراخ !! لكن معلش ، علشان يرضى الست  
أم عبده ، وعلشان ينبسط شيخ السو ، الشيخ عجائب ، اللي  
طول النهار يزلط في حمام وفراخ وكباب ، ويعزم له تعزيمتين  
ويتهزله هزتين ، وآل ايه يطلع العمل ، ياخي عمك اسود  
ومهب على دماغك ، أنا قرقر ، أنطرد من أودتي ، وأترمي  
في أودة الفراخ ، وطول الليل ديك الكلب ده ، ينقر لي  
في بطن رجلي . . وأنا بغير من رجلي موت . خلاني بايت  
مسخن م الضحك ، حد في الدنيا يقول كده ، واحد  
ما ينامش من كتر الضحك ، طول الليل سهران اضحك ،  
وانا حالي يستاهل البكا ، وكل ما عيني تغفل شويه ، والا  
افكر شويه بزعل ، يروح نقرفني في بطن رجلي أروح



مفرهدم الضحك ، إلهى تنقصف رقتك يا ديك السفاله ،  
يا ديك التلامه . لكن تنقصف رقتك ليه ، ذنك إيه ؟  
إذا كانت رجلى اتغرزت فى أنجر الرده وفتحت نفسك ،  
اللى تنقصف رقبته الشيخ زفت ، اللى نايم يشخر فى الأوده  
وساينى أناقر طول الليل مع الفراخ . وياريت بلاقى ثانيه  
استريح فيها بالنهار ، إلا طول النهار ما تفرغوش طلبات ،  
اطلع يا قرقر ، انزل يا قرقر ، روح يا قرقر ، تعالى يا قرقر ،  
وياريت طلبات زى طلبات البنى آدمين ، الا طلبات لها  
العجب ، وآخر تقليعه طالع لى فيها حكاية القله ، علشان  
أدوخ ، علشان اموت ، أنا عارف هو مش حايسريح  
إلا لما يجيب أجلى . [ يضع القله على كف يده ويتحرك فى السطوح  
وهو يوازنها . تدخل عديله الخادمه وقد هملت سبت الفسيل وكيس المشابك ]  
عديله — إلهى يعد لها لك ، ايه اللى انت عامله دا يا واد  
يا قرقر ، انت حاشتغل مع بتوع النقرزان ؟ !

قرقر — [ يقف ويمسك القله من عنقها ] اصطبجى وقولى  
ياصبح ، أنا مش ناقصك ، ايه طلعت كده من النجمه ؟ !  
عديله — أنشر الهدمتين اللى غسلتهم امبارح العشا  
وبيتهم طول الليل منقوعين ، إذا كنتش اعمل كده ،  
حايضع منى النهار .

قرقر — ما يضيع ، يعنى وراكى إيه ، مؤتمر سان  
فرنسسكو .

عديله — سان ايه ؟! والله اتعدلت ولسانك مشى ،  
الله يرحم زمان ، أيام التريترو ، وجنيته الحوانات ، بقى أنا  
ورايا ايه ؟ الشغل اللي مطربق على دماغى ده كله وورايا ايه ؟!  
الكنس والمسح والغسيل والطبخ والمناكف والمناقره  
والمهابره ، كل ده وماورايش حاجه ؟ ياخى خلى حد يقول  
كده غيرك ، ليه .. هو انا زيك ؟ طول النهار قاعد لى فوق  
السطوح زى تنابله السلطان لا شغله ولا مشغله .

قرقر — اللي هو انا ؟ طيب معلش ، أنشرى الهدمتين  
وانزلى ، خليه نهار يفوت .. أنا اللي قاعد فوق السطوح ،  
لا شغله ولا مشغله .. حاقول إيه ؟

[ يضع القلة على كفه ثم يأخذ في السير بها كما كان يفعل ]

عديله — [ في دمهنة ] : هو إيه أصله ده .. ما تفهمنى  
بس إيه اللي بتعمله .. انت جراك إيه ؟

قرقر — مالكيش دعوه .. إنتى مش بتقولى لا شغله  
ولا مشغله .. سيبنى بقى فى حالى .. كفايه القرف اللي انا  
شايفه .

عديله — طب ماترعلش .. حقك عليه .. بس قوللى  
ايه اللي بتعمله ده ؟



قرقر — زى ماتى شايفه كده .. باتمرن .

عديله — تتمرن على إيه ؟

قرقر — ع الشغل .

عديله — شغل ؟ ! سلامات يا شغل ! ! شغل إيه اللى  
بتمرن عليه ده ياسى قرقر . يا ابن ام قرقر .. تكونشى  
بشغل فى سيرك ولا حناش عارفين ؟

قرقر — ومش عارفين ليه ؟ ماهو قدامكوا اهو .. على  
عينك يا تاجر .. فيه سيرك أكثر من السيرك اللى بشغل  
فيه ده .

عديله — سيرك إيه ؟

قرقر — سيرك أم عبده .. أم عبده والشيخ عجائب .

عديله — انت بهزر ؟

قرقر — بتكلم جد .. شوفى شغلك بقى خيلنا نشوف

شغلنا .. [ بماود سيره بالقله ]

عديله — [ متناظه ] بقى اسمع بقى يا قرقر ، والنبي واللى

نبي النبي نبى .. والولى اللى ولى الولى ولى . وال ..

قرقر — [ يقف فى ضيق ] إيه بس عايز إيه بلانبي بلاولى ؟

عديله — إذا ما كنتش تقول لى إيه اللى بتعمله ده .

قرقر — حاتعملى إيه ؟

عديله — حارقع بالصوت .

قرقر — مفيش لزوم ، حاقول لك .

عديله — قول .

قرقر — بقى انت عارفه إن الشيخ عجايب مفهم ستك

أم عبده إن معمول لها عمل .. وإن العمل ده هو اللي  
مطفش نوح افندى منها .. واللى مخليه مش طايقها .

عديله — معقول .. له حق .

قرقر — حق .. ياخى انشا الله ينكسر حقاك .

عديله — إن مشا الله انت .

قرقر — هي ستك ام عبده ناقصه عمل .. دى هي نفسها

عمل .. دى مش تطفش نوح افندى وبس .. دى تطفش بلد  
أنا مش فاهم الحكومه تايه عنها فين .. دى لو سابوها في  
القنال .. حاتطفش الانجليز في ليله .. دى كانت تجيب لنا  
الجلال في ثانيه .

عديله — المهم ، خيلنا في اللي احنا فيه هنا ، بتقوللى

إن الشيخ عجايب مفهم ستى إن معمول لها عمل ؟

قرقر — أيوه .

عديله — وبعدين ؟

قرقر — ولا قبلين ، عايز يطلعاه .



عدیلہ — له حق لازم یطلّعه .

قرقر — بس دا حایطلّعه علی عنیه .

عدیلہ — وانت مالک .. ایش حشرک ؟

قرقر — مالی ایزای ؟ ماہو کلہ علی دماغی ، هوآ

بیخلینی أون ثانیہ ، أنا المسئول عن کل الطلبات البایخه اللی  
بیطلبها ، ماہو لو کان العمل دا حایطلع کده زی کل حاجه  
ما بتطلع ، کانت هانت ، إلا العمل بتاع ستک أم عبده مش  
عایز یطلع ، إلا بحاجات ماوردتس ، ماهاش نظیر ،  
ما سمعتس عنها عمری .

عدیلہ — زی ایه کده ؟ ۱۹

قرقر — خدی عندک ، أول حاجه طلبها ، جدی احوال .

عدیلہ — وماله .

قرقر — وماله ایزای ؟ ۱۹

عدیلہ — هات له جدی احوال .

قرقر — وهوآ فیہ جدی احوال یامغفله ؟

عدیلہ — یوه ، ما فیش لیہ ، هو مش فیہ بنی آدم احوال ؟

قرقر — فیہ .

عدیلہ — یبقی لازم فیہ جدی احوال ، زی ما فیہ

بنی آدم اعمی وجدی اعمی ، وبنی آدم اعمور وجدی اعمور .

قرقر — أصل الأعمى والأعور دى فى إيدينا ، أقدر  
أجيب له جدى سليم واخزق له عنيه بيقى أعمى ، والا عين  
واحد بيقى أعور ، لكن الأحوال ده أحوله إزاي ؟  
عديله — زى الناس .

قرقر — يعنى إيه زى الناس ؟  
عديله — يعنى جيب له معزه على يمينه ومعزه على شماله  
تبص تلاقيه يحوّل ، هو البنى آدم بيحوّل من إيه ، من  
كثر البصبصه يمين وشمال ، من فروغية عنيه .

قرقر — طب افرضى طلع جدى ، تقى ، جدى مطمطم ؟  
عديله — حايحول أكثر .

قرقر — طب انتهنسام الجدى ، والفرخه الزعلانه ،  
دى أجيبها له منين ؟  
عديله — فرخه إيه ؟

قرقر — زعلانه ، ابن الرضى ، لازم يعقدها ، يعنى  
إذا كانت مبسوطه ما تنفخش ، ما يطلعش العمل ، أجيب له  
الزعلانه دى منين بدمتك ؟

عديله — بسيطه خالص .

قرقر — برضك أجيب لها ديكين ؟

عديله — لأ ديك واحد .



- قرقر — تقوم تزعل ؟
- عديله — حاتنبسط في الاول .
- قرقر — تبق مش نافعه .
- عديله — اصبر عليه شويه .
- قرقر — صبرنا .
- عديله — تجيب لها ديك وتسييه معاها .
- قرقر — سبناه معاها .
- عديله — حاتفرفش .
- قرقر — فرفشت .
- عديله — تكبس عليها بتلات فرخات ، مره واحده .
- وتسيهم مع الديك .
- قرقر — حاتزعل ؟
- عديله — تزعل وبس ، دى يمكن تنزل عليها نقطه .
- قرقر — ياسلام عليكى يا بت يا عديله ، يالى مفيش منك ، يسلم بقك ، ( يضع القلة على كفه ويماد السير ) عن اذ نك بقی أما أكمل الشغل .
- عديله ( في غيظ ) — بينلك ، بقی بعد دا كله ، وما تقوليش بتعمل إيه ؟ !
- قرقر — أبوه والله كنت حانسی ، حاتقول لك أهه .

عديله — قول .

قرقر — بقی یا ستی . . الرجل الضلّالی طول النهار  
ما كفاهوش الطلبات المعقده اللى بيطلبها ، واللى مدوخنى  
بيها ، لا ، آخر المتمه ، قال إن العمل ده مش حانعرف  
هو موجود فين اللى بطريقتة القله .

عديله — طريقه القله ؟

قرقر — أيوه يا ستي طريقه القله .

عديله — ودى تبقّى إيه دى كيان ؟ !

قرقر — قال نملا قله للآخر .

عديله — وبعدين ؟ !

قرقر — واحد يحطها على كفه ، كده .

عديله — بسيطه .

قرقر — لا مش بسيطه ، يفضل فارد دراعه بيها .

عديله — حاجه سهله ، انا أقدر أعملها .

قرقر — يا ستي اصبرى علىّ لما اكملك .

عديله — طيب كملّ ، أنا اصلى عارفك قليل الحيله .

قرقر — يفضل فارد دراعه كده ، وماشى بيها ، ماشى ،

ماشى . ماشى . ( بأخذ في السير )



عديله — وبعدين .

قرقر — يفضل ماشى ، [ وياخذ في السير ] .

عديله — خلاص ، فهمنا ، وآخرة المشى ؟

قرقر — لحد ما تتدغدغ رجله ، ويتقطم وسطه .  
ويتخذل دراعه ، ونقع القله تتكسر .

عديله — طب وبدال ما يفضل ماشى لغاية ما يجراه  
كل اللي حايجراله ده ما يدشدشها من الأول ويريح نفسه .

قرقر — ما ينفعشى ، لازم يسديها لحد ما تقع من نفسها .

عديله — طيب وقعت من نفسها .

قرقر — يطب وراها في الأرض ، والحته اللي تقع

فيها ، يفضل يحفر فيها لغاية ما يطلع العمل .

عديله — يا سلام ، أما طريقه مدهشه ، وجربتوها  
دى يا قرقر ؟

قرقر — جربناها .

عديله — ازاي .. احكي لى احكى ، حصل إيه ؟

قرقر — خرجت اول امبارح العصر . بعد ما مليت

القله لمت عينها ، وفردت ايدى بها كده ، ونزلت السلم .

وخرجت من الباب ، أقول لك الحق ، انا كنت مكسوف

وعارف إن الناس حاتضحك عليه ، وقلت اخرج بيها

كده قدام الست أم عبده ، أهو برو عتب ، وبعدين أدشها  
في أقرب حته بدل ما مشى بيها في الشارع وافرج الناس عليه ،  
لكن لما نزلت الشارع الفار لعب في عبي ، وقلت يمكن  
تكون الحكايه صحيح ، ولو وقعتا بالعينه يمكن ما يطلعش  
العمل ، قولى الشهامه مسكتنى وضميرى أنبنى وقلت يا واد  
امشى واستحمل .

عديله — لك حق ، طول عمرك شههم .

قرقر — مشيت ، من شارع السد على ميدان السيده ،  
والعيال حواليه والنقوره دايره ، شقع بقع يارب تقع .  
وكل من هب ودب يرقعنى بكلمه ، لحد ما وصلت شارع  
خيرت على عابدين ، حسيت ان دراعى خلاص ابتدا  
يتصلب وكتفى حايخلع ، ضغطت على نفسى . وفضلت  
ماشى ، ماشى ، ماشى ، لغايه ، ما حسيت زى اما يكون  
دراعى انشل ، ما بقيتش حاسس بيه خالص ، ومره  
واحد ، القله طبت انكسرت .

عديله — وبعدين ، عملت إيه ؟!

قرقر — رحط طابب وراها على الأرض ، ورافع  
الفاس اللى شايله في ايدى التانيه ، وهات يا حفر . فضلت  
احفر ، احفر ، احفر .



عديله — لغاية ما طلعت العمل ؟  
قرقر — لا ، لغاية ما جم العساكر وودوني القسم ،  
وبيتوني ليله على الاسفلت .

عديله — ليه ١؟  
قرقر — لأنى كنت بحفر فى وسط ميدان العتبه ومعدل  
حركة المرور كلها .

عديله — يا خساره ، والعمل ١؟  
قرقر — عمل اسود ، لازم سفلتو فوقوا تانى .  
عديله — والشيخ عجائب قال لك ايه ١؟

قرقر — ولا حاجه .. هو خامس عليه ايه ، قاللى  
اطلع تانى مره ، وامشى حسب القله ما تودينى يعنى مش زى  
ما أنا عايز .. أميل مطرح ماتمبل .. مالت فى عطفه ادخل  
فى عطفه ، مالت فى زقاق أدخل فى زقاق ، دخلت فى بيت  
ادخل فى بيت .. عشان المره دى .. مش يودونى قسم  
الموسكى وبس .. يودونى قره ميدان على طول ، إياك  
ينبسط شيخ السو .. إياك يرضيه ، أنا عارف هو مش  
حايستريج إلا لما يجيب داغى . لكن أنا مش حاسكت له ،  
مش كل الطير اللى يتاكل لحمه ، لازم أجيب داغه قبل  
ما يجيب داغى .. لازم أطربقها عليه .

[بندفع في نورة من الفضب ويرفع يده بالقلة ويهوي بها على سقف  
الحجرة التي ينام فيها الشيخ عجائب فتتكسر القلة وينزل ما بها من مياه  
على الشيخ عجائب من خلال فتحات السقف الخشبي ، ويسمع استغاثات  
الشيخ عجائب وتأفقه من المياه النازلة فوقه ]

عديله — يامنيل على عينك ، انت اتجننت والا جرى  
لعقلك حاجه .. الراجل يقول إيه دلوقت ؟

قرقر — ولا حاجه .. نظره .

عديله — نظره ؟

قرقر — أيوه نظره .. حاجه عجيبه ، السما ما بتنطرش  
أبدأ ..

عديله — والسما اللي نظرت دي مش بتنظر في كل حته ؟  
قرقر — لا .. بعض ساعات تنظر في حته وما تنطرش  
في الحته التانية .

عديله — يعني النظره ما عجبتهاش حته تنزل عليها في كل  
الدنيا الواسعه دي غير أودة الشيخ عجائب ؟

قرقر — أيوه .. لأن ده السطح البارد الوحيد اللي  
قابلته .. دي نظريات عليه ما تفهمهاش .. حاجات عرفتها  
زمان لما كنت في كتاب الشيخ زكي ، وعلى العموم علشان  
نسبها عليه نعمل لها شوية تحايش .



[ يخرج من جيبه بطارية ثم يضيئها عدة مرات سريرة متوالية ]  
دا برق [ يدق ضربات فوق سطح الحجره أشبه بالرعد ] ودا رعد  
[ بصفر صغيراً أشبه بالريح ] ودى العاصفه . . أظن بعد كده  
يبقى مالناش ذنب ، وإذا ماصدقش انها نظره . . عنه  
ماصدق ، أنا عملت اللى عليته . . يعنى هى السما بتعمل إيه  
أكثر من كده .

[ يسمع صوت أم عبده من بير السلم ]  
أم عبده — بت يا عديله . . بت يا عديله ، انت نمتي  
فوق والا إيه ؟ !

قرقر — يا حفيظ . . زمارة الخطر .  
عديله — أيوه ياست ، أصل الجبال كانوا وسخين  
قوى وكنت بامسحهم .

[ يسمع صوت أقدام صاعدة بالقباب ]

قرقر — يانهار اسود ، دى طالعه . . القضا المستعجل  
طالع .. اخلصى يا عديله ، دلوقت تخش للشيخ عجائب علشان  
يرقيها . . فتعرف اللى حصل ، وتشوف القله المكسوره  
إسمى أنا لازم استنجي .

عديله — خش فى أودة الفراخ .  
قرقر — ما فيش فايده . . حاتدور عليه وتقفشنى ،

أقول لك .. أحسن . حاجه أخش عند الجماعه دول  
[ يشير الى حجرة سيد ومحمود ]

عديله — لكن دول ساكين الأوده وبقالمه مده  
مايجوش .

قرقر — لا أنا عارف انهم موجودين بس بيطلعوا  
على مواسير الميه وبيدخلوا من الشباك علشان أم عبده  
ماتقفشهمش وتطالبهم بالأجره المتأخره .

عديله — طب وحايرضوا يفتحووا لك ؟

قرقر — طبعاً .. إحنا فيه بيننا وبين بعض عمار ،  
فيه موده .. أنا وهم على أم عبده . [ تنهمك عديله في النشر  
ويستمر صوت الققباق في الاقتراب ]

[ يطرق قرقر الباب وفي هذا الوقت يكون سيد خارجاً من دورة  
المياه يجفف وجهه استعداداً للصلاة ]

[ سيد يقف متمسراً في حالة فرع .. قرقر يعاود الطرق دون  
أن يجيب عليه أحد ]

قرقر — افتح ياسى سيد افندى .. افتح أنا قرقر ،  
افتح بسرعه .. أنا فى عرضك .

[ سيد يزعج ماوراء الباب ثم يفتحه ، فيدخل قرقر ويطلق  
اللباب وراءه ]

سيد — إيه ؟ فيه إيه ؟



قرقر - القضا المستعجل طالع .

سيد - القضا المستعجل ؟

قرقر - أيوه أم عبده .

سيد - يانهار اسود؟! طالعه هنا؟

قرقر - أيوه ، في السطوح . . طالعه للشيخ عجائب

عشان بيخرها ويرقيها ويلبسها الحجاب .

سيد - طيب وانت خايف ليه؟!

قرقر - أصل عملت في الراجل خازوق ، وخايف

لا تطلعه من عينه ؟

سيد - طيب اقعد لما أصلي ركعتين .

[ سيد يبدأ الصلاة ، ويجلس قرقر وراء الباب ينظر من خلال

الثقب ]

[ تظهر أم عبده صاعدة من السلم في السطوح ]

## المشهد الخامس



[ عديله - أم عبده - الشيخ عجائب ]

أم عبده - مش خلاص والا حاتفضلي تنشري

في الهدمتين دول طول النهار .. أمال فين قرقر ، لسه  
ماصحيش ؟!

عديله — ما اعرفش والنبي ياستي ، أنا من ساعة  
ماطلعت ماشفتلوش أثر .

أم عبده — لازم لسه بيشخر .. هوّا دا عنده دم ،  
عايز الخدامين بتوع أبوه يصحوه ، لازم ينام لى لغاية  
الضحى . [تترب من عشة الفراح] واد ياقرقر ، انت ياواد  
ياقرقر ، قوم فز اصحى .. هي نومة أهل الكهف ، قوم ياالله  
[لايجب عليها أحد .. تفتح التقيصة وتمد رأسها الي الداخل فلا تري  
غير الفراح] ماهواش نايم جوه .. هوّا راح فين يابت ؟!  
عديله — أنا عارفه ياستي .. هوّا حد عارف له قرار ،  
أهو داير ينط زى فرقع لوز .

أم عبده — يمكن نايم مع الشيخ عجائب ، مع إن انا  
قلت له يسيب له الأوده ولا يعتبش جواها علشان ما يضايقش  
الراجل ويعطله .. الراجل وراه شغله .. طول الليل  
ما بيدلش قرايه وكتابه وتعزيم .. ربنا ينجحه ، ويطلع لى  
العمل اللى ملبش لى الراجل ، ومهيججه .

[ تنقر بسبايتها على باب حجرة الشيخ عجائب ]

الشيخ عجائب — [ من الداخل ] ها .. مين ؟



أم عبده — [ بصوت رقيق ] أنا .  
الشيخ عجائب — [ لا يسمع ] مين اللي بيخبط ع الصبح  
مش كفايه التعب والسهر والدوشه اللي شايفينها طول الليل؟  
عديله — افتح ياسيدنا الشيخ دى الست ام عبده .  
الشيخ عجائب — طيب ياست ام عبده .. لا مؤاخذه ،  
حالا ..

[ يفتح الباب ويبدو مبتل الوجه والنياب ]  
الشيخ عجائب — عدم المؤاخذه .. أنا افتكرت ..  
الواد قرقر .

أم عبده — أنا صحيتك م النوم ؟  
الشيخ عجائب — هوّا انا باشوف النوم .. وآخر الليل  
جيت اغفل شويه .. لقيت النظره نازله ترخ .  
أم عبده — نظره ؟! نظرة إيه ؟! هي الدنيا نظرت  
يابت يا عديله ؟

عديله — [ مرتبكة ] والله ياستى مانا عارفه .. يمكن قبل  
ما اطلع .

الشيخ عجائب — لا .. لا .. دى نظرت حالا دلوقت  
السقف خر على غرقنى .

أم عبده — يمكن ندا ياسيدنا الشيخ ؟

الشيخ عجائب — ازای .. دی نظره .. برعد ، و برق ،  
وعواصف .

أم عبده — كان ؟

عديله — يمكن ياستى من عمایل الجن والعفاريت ..  
ماهو سيدنا الشيخ طول الليل ييحضر فيهم .. اللهم احفظنا .

الشيخ عجائب — على العموم ياست هانم أحسن حاجه  
تشوفى لنا أوده تانيه يكون سقفها كويس ، علشان لما النظره  
ترخ علينا تانى ماتبقاش تنزل تغرقنا وتلف شغلنا .

أم عبده — أنا برضه بفكر فى كده .. بقول إني  
أديك أودة الجماعه النصاين دول اللى بقى لهم ثلاث شهر  
مايدفعوش الأجره .. أحسن حاجه إن أنا أعز لهم  
وافضهاك .

الشيخ عجائب — كتر خيرك ياست هانم .. علشان  
نعرف نشوف شغلنا كويس .. الحاجات دى عايزه تعب ،  
وعايزه سهر .. اتفضلى جوه .. أما أوريكى أنا عملت إيه  
طول الليل .. اتفضلى .

[ تدخل ام عبده فى الحجره ، وتحمل عديله السبت وتهبط به ]



## المشهد السادس



[ سيد — محمود — قرقر ]

[ سيد ينتهي من الصلاة ... محمود يدخل من المطبخ ... قرقر  
يرقب من ثقب الباب ] .

محمود — الله !! إيه ده ؟ إيه اللي جابك هنا يا قرقر ؟!

سيد — لاجيء سياسى .. هارب من العدو المشترك.

محمود — يعنى إيه مش فاهم ؟ !

قرقر — طب بس ماتعلّيش صوتك ، الوليه قاعده بره .

محمود — ولية مين ؟

قرقر — أم عبده .

محمود — يا نهار اسود !! برّه .. برّه ! يعنى فى

السطوح ؟ !

قرقر — أيوه .

محمود — يا لطيف ، وقاعدين كده ساكتين ؟ !

سيد — يعنى حانعمل إيه ؟

قرقر — على العموم هي دخلت دلوقت في الأوده بتاعتي عند الشيخ عجائب ، ودلوقت زمانها ملخومه في الأحببه والبخور ، وزمان الراجل عمال يرقى فيها .

محمود — يعني ما فيش خوف ؟ ! فيه حال أمان ؟ !  
قرقر — أمان مؤقت .. وبعده .. الخراب المستعجل ..  
فيه أنباء سيئه جداً عرفتها دلوقت .

سيد — ايه هي ؟

قرقر — بعد عشر دقائق بالكثير . حاتصبجوا بلا مأوى .. حاتبقوا كده زى حالاتي .

محمود — يعني إيه ؟ !

قرقر — يعني حاتنطردوا ، الشيخ عجائب ، حاتنقل في الأوده بتاعتكم لأن الأوده بتاعتي اللي هو فيها دلوقتي سقفها بيخر .

سيد — بيخر إيه ؟ ! هوا ؟ !

قرقر — لأ .. ميه .

سيد — ومنين جات له الميه ؟ !

قرقر — نظره .

محمود — نظره ؟ ! مش ممكن ، الدنيا ما نظرتش أبداً .

قرقر — مطر صناعي .. مطر قناوى .



سيد — ايه يا سيدنا الكلام اللى بتقوله ده .. مطر  
فى الصيف ؟!

قرقر — لأ .. أصل أنا اتغضت منه وكسرت القله  
على نفوخه .. قصدى على نفوخ الأوده .. على العموم  
مش مهم دلوقت .. المهم إن القضا المستعجل قال إنه حايقله  
فى الأوده بتاعتكم دلوقت .. فياه العمل ؟!

سيد — ايه العمل ؟. دى تبقى كارئه .. دى تبقى نكبه  
حاروح فين وننام فين ، ونودى العفش دا فين .. دا حنا  
ما معناش اللضا .

قرقر — على العموم بسيطه ، نقعد سوا فى الأوده  
بتاعتى . واللاتاموا فيها وانا انام فى أودة الفراخ ، وعوضى  
على الله . بس المهم انكم تزوغوا دلوقت قبل ما تقفشكم .  
محمود — لكن ازاي تاخذ الأوده بتاعتنا .. دى  
ما لهاش حق قانونى .. احنا مأجرين منها أجره بالسنه ..  
ولنا الحق ان احنا نقعد لغاية آخر السنه .

سيد — أيوه يا أستاذ .. لك الحق لو كنت بتدفع  
الأجره .. أو لو كان معاك فلوس دلوقت تدفعها .. لكن  
عايز نقعد ولا تدفعا .. حاجه مش معقوله . إذا كنا  
عايزين نقاوح وتثبت فى الأوده لازم أقل ما فيها نكون

دافعين الأجره المتأخره .. بس لو تسيبنا يوم والا يومين ،  
كان الواحد قدر يدبر المبلغ .

قرقر — مافيش فايده ، بعد نص ساعه حاتكون  
مستوليه على الأوده ، أنا عارفها كويس .. دماغها ناشفه .  
سيد — ولا حد بس يشوف لنا سلفيه !

محمود — سلفيه منين يا خال ، داحنا مديونين للشارع  
كله ، المكوجي ، والبقال ، والخضري ، والجزار ، وبتاع  
البسبوسه ، وبتاع لحمه الراس ، وبتاع الفول والبليهه السخنه ،  
يعنى مفيش حد يأمنا أبدأ .

قرقر — بس يا جماعه أنا سامع صوت رجلين .

[ بيدوق السطوح عم علي بائم الفول ويتجه الى باب الحجره ويطرقها ]  
[ الجميع يصفون .. يزداد للطرق .. ]

عم علي — هو إيه أصله ده ، ده اسمه نصب ، انتوا  
عايزين تاكلوا بلاش ، بقالي خمس تيام وانا آجي  
علشان الشلن اللي انتوا واخدين بيه .. دا حتى حرام  
ما يرضيش ربنا .

[ يقف برهه .. ولكن دون مجيب .. يبأس الرجل وينصرف ]

قرقر — [ ينظر من ثقب الباب .. هامساً ] دا عم علي بتاع

الفول ، مشى خلاص .



[ الاثنان يتنفسان الصعداء ]

سيد — ها .. وبعدين .. العمل ايه ؟  
محمود — ولا قبلين .. مافيش قدامنا غير الطريق  
الوحيد ده [ يشير الى النافذة ] .

سيد — أيوه بس حانبات فين بعد كده ؟! والعفش  
والحاجه بتاعتنا حانعمل فيها ايه ؟

محمود — يا أخى يبقى يحلمها ربنا .

قرقر — هس .. فيه صوت رجل تانيه .

[ يدخل عم ابراهيم بائع لجة الراس .. ويترك الباب ]

عم ابراهيم — لا .. ماهو ما ينفعش ده .. أنا مافياش نفس  
أطلع كل يوم السلام علشان الريال من غير فايده .. دانتموا  
افتديه محترمين أمال خليتموا ايه للهلافيت .. لما انتوا مش  
أد الجواهر .. تاكلوا جواهر ليه ؟! كلوا أباه .. كلوا  
كرشه .. معلمش مسيركو تقعوا في ايديه ، وانا  
أوضبكوا كويس .

[ ينتظر برهة ولكنه يبأس فينصرف ]

قرقر — [ ينظر من ثقب الباب هامساً ] دا عم ابراهيم ..  
يا جابر .

محمود — يا ساتر .. هو لسه واقف ؟!

قرقر — لأ . . مشى والحمد لله .

سيد [ متهدأ ] — الذى لا يحمد على مكروه سواه .

محمود — ودلوقت يا الله بنا يا خال نزوغ بسرعه من الشباك قبل ما الوليه تطب علينا ونروح فى شربة ميه .

سيد — مش بس يا أخى تفكر فى الحكايه كويس ،

حانبات فين ، ونودى الحاجه بتاعتنا دى فين ؟ !

محمود — بعدين نفكر فى الحاجات دى كلها ، المهم

إننا نزوغ دلوقت .

[ يأخذان فى ارتداء ملابسهما ]

[ يسمع صوت أقدام أخرى تقترب ويبدو فى السطوح الشيخ زين

يرتدى جلباباً بلدياً . . بطرق باب الحجره ] .

سيد — ودا مين دا كان ؟

قرقر [ من تقب الباب ] — مش باين ، ما عرفش يبقى مين

شحط كبير قوى سادد الباب .

محمود — يعنى حايطلع مين ؟ مندوب البنك الأهلئ ؟

أهو لازم واحد من الديانته ، تلاقيه عم حلاوه بتاع البسبوسه ، والا الحاج عضمه الجزار .

سيد — لكن دا ما يتكلمش .

[ زين يستمر فى الطرق على الباب ]



محمود — لازم ناوی علی الشر ، لازم بیخمن لنا  
علی حاجه .

[ زين يمل من الطرق فيجاس أمام الباب ]

قرقر — یا نهار اسود ، ده قعد ، ده مبلط خالص ،  
یعنی مش ناوی یعمتکم أبدأ .

محمود — قلت لك يا خال ، النهارده باين من أوله ،  
ياالله وحياءة أبوك بنا نزوغ من الشباك ، أنا حلمت الليله  
اللى فاتت حلم وحش قوى .

[ يتجه الى الشباك ويهم باخراج ساقه ولكنه يتراجع ]

محمود — ياوعدى ، الظاهر إنها طبلت من كل ناحيه .  
سيد — إيه ؟ فيه إيه ؟ .

محمود — الطريق مقفول .

سيد — یعنی إيه مقفول ؟

محمود — یعنی الست بهيه ، بسلامتها واقفه فى البلكونه  
اللى تبص على المواسير ، یعنی حاتكشفتنا ، على كده مش  
حانقدر تنزل .

سيد — وبعدين ؟ !

محمود — [ يتقدم مرة أخرى الى الشباك ] — على العموم  
أنا حانزل ، ميت بهيه ولاواحد أم عبده ، یعنی حاتعمللى إيه ؟

سيد [مسك به] — مش ممكن .. ما يصحش نتفضح  
قدامها .. ما يمكش أخليك تنزل أبدأ .  
محمود — ياسيدي إنت مالك ، أنا يهمنيش .. أنا حانزل  
وحدى ، خليك إنت ، مادام مكسوف من الست بهيه  
[ بتقدم الي الشباك نم بتراج تانية في بأس ] خلاص ، اتقفلت  
من كل ناحيه .

سيد — في إيه تاني ؟ !

محمود — نوح أفندي واقف في الشباك اللي قصاها ،  
وعم على واقف في الشارع بعربية الفول والبليه السخنه ،  
يعني عاملين علينا حركة كاشه ، حصار من جميع الجهات .  
خلاص . رح بتلاش [ يجلس في بأس ] .

سيد — [ لقرقر ] وأخينا دا لسه برضه قاعد بره ؟ !  
قرقر — [ ينظر من الثقب ] دا مصمم ، ما فيش فايده .  
[ يسمع صوت أقدام .. تظهر عديله في السطوح ] .

سيد — ودا مين تاني ؟ !

قرقر — عديله ، لو اعرف انده لها يمكن تسرب لنا  
اللوح اللي مبلط على الباب ده ، بس حانده لها ازاي ؟ اهي  
دي اللي تقدر تنقذنا ، يا نهار اسود دي راحة الأوده  
التانيه ، استنوا شويه اما نشوف إيه اللي حايجصل .



[ تنجبه عديله الى باب حجرة الشيخ عجائب وتهرق الباب ] .

الشيخ عجائب — [ من الداخل ] مين ؟

عديله — أنا عديله .

ام عبده — عايزه إيه يا عديله ؟

عديله — الباميه حانعملها بالسلق والا بالقوطه .

الشيخ عجائب — انا احبها بالسلق .

ام عبده — استنى أنا جايبه لك .

[ تخرج أم عبده وقد عقلت على صدرها حجاباً ووراءها الشيخ عجائب ]

الشيخ عجائب — الحجاب ده ، ما تقلعش أبداً ، أنا

بقالى ثلاث تيام باعمل فيه ، وان شاء الله للنهارده حانشوف

حكاية العمل ، لازم أطلعه ياذن الله . بس أنا عايز آخذ

حته من أترك . اتفضلى جوّه شويه .

[ يعود الاثنان الى الحجرة ]

قرقر — [ يصف ما يراه ] أم عبده على الباب . . الشيخ

عجائب وراها . الشيخ عجائب دخل الأوده . أم عبده دخلت

وراه . عديله واقفه بتتقصع . . اللوح قاعد زى ما هو ،

ما بيتعشش ، أم عبده خرجت ، الشيخ هباب خرج .

## المشهد السابع



عجائب - أم عبده - عديله - قرقر



سيد - محمود - زين

[ أم عبده تخرج ووراءها الشيخ عجائب .  
الشيخ عجائب — ودلوقت وحياة ابو كى ياست أم عبده  
ابعتى لى الفطار .

أم عبده — عنيه يا سيدنا الشيخ ، عنيه .  
الشيخ عجائب — بس امبارح كان شويه وانت عارفه  
إن انا طول الليل سهران وتعبان .

قرقر — [ من الداخل ] قوى ، الله يكون فى عونك .  
الشيخ عجائب — وعازك تبعتى لى أدست بيضات مقليين  
وإذا كانت عندك حتمه قشطه على شويه عسل نحل ، يبقى



كويس ، بلاش الفول لأنه يعمللى عسر هضم ، إذا كان  
تقدرى تبعتى لى رطل بسبوسه علشان احلى ييه ما فيش  
مانع ، اصلى ما حبش اتقل كده .. طلبات خفيفه .

ام عبده — من عنيه ياميدنا الشيخ .

الشيخ عجائب — وحكاية الأوده اللى قلت عليها ؟

ام عبده — دلوقت حالا .. هات الحاجه بتاعتك كلها

وانتقل فيها دلوقت ، دول جماعه نصايين .. حراميه ..  
أنا حاعرف أورهم ازاي .

[ يدخل الشيخ عجائب لاحضار ملابسه وصندوقه ومعداته وتتجه  
أم عبده الى باب الغرفة ] .

قرقر — يا نهار اسود .. اسندونى .. خلاص .

محمود — حاتعمل إيه دلوقت ؟ قول قوام .

سيد — أنا عارف .

[ يجلس الثلاثة في بأس .. أم عبده تري الشيخ زين ]

أم عبده — وانت مين ؟

الشيخ زين — أنا الشيخ زين .

أم عبده — وعازن إيه ؟

الشيخ زين — عازن الجماعه اللى هنا .

أم عبده — ماييجوش .

الشيخ زين — حاستناهم .

أم عبده — مش حايجوا أبدأ .

الشيخ زين — برضه حاستناهم .

أم عبده — خليك مستنى [ الى عديله ] بت يا عديله ..  
انزلى قولى للاسطى أحمد النجار يبجى يكسر لنا الباب ده .  
عديله — حاضر يا ست .

[ الشيخ عجيب بحول مهماته أمام الباب ]

محمود — يا جماعه لازم نشوف لنا حل .. إحنا  
حانفضل قاعدین كده .. لازم نستخبي في حته .  
سيد — مافيش فايده ، دى حاتخش تدعبس هنا وهنا  
وحانتكش لو استخينا في أى حته .. ومش حايثوبنا  
غير الكسفه .

قرقر — [ بنظر الى الشوالات الفارغة ] اسمعوا يا جماعه أنا  
عندى فكره كويسه .

محمود — إيه هي ؟

قرقر — كل واحد منكم يدخل في شوال واربط عليه  
وأركنه جنب بقية الشوالات .. ومش معقول أبدأ  
حد حاي فكر في فتح الشوالات دى .

سيد — بقى معقول إننا نتحبس في الشوالات ؟

قرقر — مش معقول ليه؟! خمس دقائق لغاية ماتنزل  
أم عبده .. وبعدين أسرب لكم الشيخ عجيب .. وتزوغوا  
بعد كده .



سيد — لكن بس .. حكاية الشوله دى !

فرقر — مافيش حل غير كده .

سيد — أنا كان عندى أنزل أحسن على المواسير .

محمود — ما خلاص حكاية المواسير دى مافياش فايده

كل الطرق مقفله .. الظاهر إن حكاية الشوات دى مافيش

منها مفر .. هى الطريق الوحيد لإنقاذ ما يمكن إنقاذه .

سيد — يا ناس .. كل ده علشان تلاته أربعه جنيه ،

تلاته أربعه جنيه نسد بهم بق الوليه ، وتخلينا بقيمتنا بدل  
الهدله فى الشوات .

محمود — طب مانحط العفش ورا الباب زى ما كنا

حاطينه !؟

فرقر — مافيش فايده دى بعثت تجيب النجار ومصممه

على الاستيلاء على الأوده .. ولو أدى الأمر أنها تخلع

الباب .

محمود — طب وانت حاتعمل إيه !؟

فرقر — ولا حاجه حاعمل نفسى بردت بالليل من

أودة الفراخ ولقيت باب الأوده مفتوح فدخلت وسكيتته

عليه ونمت .

[ نحضر عديله ومما النجار الذى يبدأ فى كسر الباب ]

فرقر — يا الله يا جماعه .

[ يدخل كل منهما في شوال ويربط عليه ، ويضمهما بجوار بقية  
السوالات ، ثم يرتدى علي الفراش ويفط في النوم ]

أم عبده — [ تدخل فترى قرقر على الفراش ] . يوه . . .  
ودا إيه دا كان ؟!

عديله — دا قرقر ياستي .

أم عبده — ينيك يا قرقر . . إيه اللي جابك هنا ؟  
دا انا دخت عليه ، ولسه نايم لغاية دلوقت . . قوم فز . .  
قامت قيامتك وانتصب ميزانك .. متمطع قوى على السرير  
تقولشي في بيت ابوك .

قرقر — [ يقف وبفرك عينيه ] . . هوا إيه ده ؟! يعني  
أنا كفرت ؟!

أم عبده — أخرج يا الله ، فضى الأوده لسيدنا الشيخ .

قرقر — طب والناس اللي ساكنين فيها ؟

أم عبده — دول نصابين .

قرقر — والعفش بتاعهم ؟

أم عبده — أنا أحجز عليه لغاية ما يدفعا الفلوس ،

حانزّلوا عندي في الشقه ، إذا مادفعوش . . حايبعه . .

أما اشوف يا انا يا هما .

قرقر — تنزّليه في الشقه ؟! مش ممكن .



أم عبده — مش ممكن ليه يا عمر .. حايستعصى ؟!  
قرقر — لأ بس مش شايف انه يستاهل .. كله شوية  
كرا كيب على كام شوال .

أم عبده — أحسن من عندهم .. اللي بيعجى منه أحسن  
منه .. أنا ما يتكلش حق أبداً .

قرقر — بس طولى بالك .. ما تبقيش كده ياست طبعك  
حاي .. كل حاجه بالذوق كويسه .

أم عبده — ذوق؟ سلامات يا ذوق .. هما فاكرين إيه .  
فاكرينها تكيه .. فاكرينها أردغانه .. فاكرينها شفت ..  
فاكرينها نهب .. أنا لازم أفرجهم .. لازم أدوخهم زى  
مادوخونى . لازم أفضحهم فى الحى كله وأفرج عليهم اللي  
يسوى واللى ما يسواش .

قرقر — ياست ما فيش لزوم . دول ناس طيبين وطول  
عمرهم ما حدش سمع لهم حس ولا خبر .

أم عبده — اخرس انت .. ما حدش عمك محامى .  
خش ياسيدنا الشيخ ، [ الى عديله ] و انت يا بت يا عديله  
خشى حولى العفش ده مع قرقر ونزلوه تحت [ قرقر و عديله  
يحملان الشوال الذى به سيد ] .

عديله — هوا ماله تقيل كده ؟ حاطين فيه زلط ؟

قرقر — شيلي من سكات .. بلاش غلبه .. لازم  
تسجحي من لسانك . حاطين زلط حاطين زفت احنا مالنا .  
[ قرقر وهو خارج ينظر فيجد الشيخ زين مازال جالساً فينظر  
اليه في تمكم وغيظ ] .

قرقر — وانت يا أختينا .. مستنى إيه ؟  
زين — مستنى الجماعه .

قرقر — جماعه ؟ ! جماعه مين ، قوم ، قوم ، ما فيش  
لزوم .. الجماعه خلصوا خلاص .. الجماعه بقوا عفش ..  
والعفش انشال .

زين — يعنى ايه ؟ ! عزلوا ؟

قرقر — بيعزلوا دلوقت ، ماشيين قدامك أهم .

زين — طب واروح لهم فين ؟ !

قرقر — ما فيش فايده ، ما فيش داعى تروح لهم ابدأ .  
مش حاتعرف تاخذ منهم لاحق ولا باطل .. دول  
ما حيلتهمش اللضا ، مش حايدوك ولا مليم .

زين — ما حيلتهمش اللضا ؟ هو أنا جاي أشحت ؟  
هو أنا محتاج ؟ . وهو انا عايز منهم حاجه ، أنا جايب  
لهم قرشين من البلد ، معايا عشرين جنيه عايز أدبهم لهم .

قرقر — [ يترك الشوال يسقط من يده من فرط الذهول ] يابن  
القديمه !! معاك ايه ، عشرين جنيه ؟ ! الله يخرب بيتك بحق



جاه النبي . . وقاعد المده دى كلها ما بتقولش حاجه ؟! طيب هات الفلوس ، هات ، إيدك .

زين — أجييب الفلوس ؟ ليه أهبل ؟.. عبيط ؟.. أديك الفلوس ازاي ما يمكنش ، لازم أسلمهم لهم يدأ بيد . وبعد فحص وبحث وتمحيص وتدقيق واثبات الشخصيه والذي منه .  
قرقر — ما فيش لزوم لحكاية الفحص والبحث دلوقت . . اديني الفلوس الله يسترک وبعدين ابقى اخص وابحث زى ما انت عايز .

زين — إزاي ؟!

قرقر — لأن الفحص والبحث مش ممكن دلوقت . . لو بحثت عنهم دلوقت حاتلاقيهم هما والرز والفاصوليا والبقول المدشوش واحد . هات الفلوس تكسب فيهم ثواب .  
زين — أنا أديك الفلوس ؟ ليه ؟ اتهمت ؟ اتخبطت في نافوخي . عايز تضحك عليه . فاكرني غشيم . . يا ضلالى يا نصاب . . يا محتال . . يا حرامى . . أديك الفلوس علشان تضرب عليهم عواف . . فاكرني هفيه ، دا أنا أوديك البحر وأجيبك عطشان . . دا أنا أوديك فى داهيه .

قرقر — وعلى ايه ما فيش داعى ، أنا مالى ، خليمهم هم اللى يروحوا فى داهيه . أنا عملت اللى على وهم سامعين وشاهدين . شيلى يابت يا عديله شيلى ، الحكاياه مش باينه حاتنتهى على خير أبداً ، شيلى ، خليتنا نخلص شيلى . السلام عليكم .



## الفصل الثاني

صالة الجلوس والأكل في شقة أم عبده . على اليمين باب يؤدي الى السلم ، وعلى اليسار باب يؤدي الى داخل الشقة ، وفي الواجهة نافذة مسمرة بقطعة من الخشب حتى لا يمكن فتحها ، وفي الركن الأيمن البعيد أثاث سيّد ومحمود الذي أنزل من غرفتهما وبعض الشوالات وبينها الشوالات اللذان وضعا بهما ، وفي الركن الأيسر البعيد أريكة عليها عود وأمامها قانون ، وفي المنتصف منضدة عليها ورق ، وبالحجرة فوتيلات وبعض مقاعد متفرقة ودولاب للصيني والزجاج والطعام الجاف أشبه بنمليّة ، وفي الركن اليمين القريب منضدة صغيرة عليها جراموفون واسطوانات ، وفي الركن اليسار القريب راديو على منضدة صغيرة أخرى .





## المشهد الأول



[ أم عبده — فرور — بهيه — عديله ]

أم عبده — بس .. خليفهم محطوطين كده لغاية ما يدفعا  
الأربعة جنيهه اللي عليهم .. إذا ماجوش بعد جمعه ، حا بيعهم  
لبتاع الروبايكيا .. زى ما يجيوا .. إن شا الله يجيوا تلاته  
أبيض ، أحسن من حبابي عندهم ، الضلاله النصاين .

بهيه — ليه بس يانينه .. هم عملوا حاجه ؟

أم عبده — عملهم اسود ومطين على دماغهم ، مش  
كفايه مدوخيني على الأجره بقا لهم أربع تشهر ، عايزا هم  
يعملوا أكثر من كده إيه ، يسرقونا ، ينهبونا ، يدبحونا  
ويشربوا دمننا .

بهيه — يانينه الحكايه مش مستاهله دا كله ، يمكن  
مزنوقين ، يمكن معذورين .

أم عبده — المعذور مايسكنش فى بيوت الناس ..  
ويدوخهم على الأجره .

بهيه — أمال يعنى يعملوا ايه ، يناموا على الرصيف ؟

قرقر — أيوه حقيقي .. يناموا فين ؟  
 أم عبده — انسد انت ، ماتت حشرش في اللي مال كمش  
 فيه ، خلاص اتتهينا .. مش حايعتَبوا الأوده يعني  
 مش حايعتَبوها .. مفهوم .. رجليم مش حاتمد فيها .  
 قرقر — مفهوم قوى .. هم يقدرُوا يمدوا إيدهم لما  
 حايمدوا رجليم .

عديله — ما يمدوش ليه ، دول يمدوا ايديهم ورجليم ،  
 أمال بيتشعبطوا ازاي .

أم عبده — بيتشعبطوا ؟

قرقر — قصدها بيتشعبطوا على الترمای ، ما تاخد يش  
 على كلامها يا ست ، هي وراها ايه غير اهلوسه ، روجي  
 اقل البيض للشيوخ عجيب ، خلى الراجل يشوف شغله .  
 أم عبده — أيوه حقيقي ، مستنيه ايه ، أنا مش قولتلك  
 تحضري له الفطار ، هو انت كل حاجه تقنى تطقسي عليها  
 وتحضري نفسك فيها .. فوتي انجري اقل البيض وحضري  
 طبق العسل والقشطه ، يا الله قوام احنا وانا حاجات كثير ،  
 أدبكي شافيه ، البيت يضرب يقلب .  
 قرقر — [ شامتاً ] أهو كده ، أمال إيه ، الحكايه لعب .



بهيه — [ تنظر الي العنق وتتنهد ] بس انا صعبانين على  
الجماعه دول .

أم عبده — ما يصعبش عليكى غالى . . فوقى يا الله انتى  
كان شوفى شغلك ، احنا ما وراناش فضا ، شوفى المقلوب  
ابوكى قام والا لا ؟

بهيه — قام ونام تانى .

أم عبده — قام ليه ؟ . . ونام تانى ليه ؟ ! إلهى  
تعدلهاله .

بهيه — قام علشان يشرب .

أم عبده — يشرب ايه ؟ !

بهيه — أنا عارفه بقى ، يشرب م القزازه اللى حاططها  
جنب السرير .

أم عبده — طبعاً ، هوا وراه ايه غير كده ، وراه ايه  
غير البصبصه والشرب ، لكن معلش مسيرى أمشييه على  
العجين ما يلخبطوش ، مسيرى أدشدش القزايذ اللى هو  
مخبيها لى تحت السرير .

[ تبدو حركة من أحد الشوالات فيلحظها قرقر ويبدو عليه  
الاضطراب ويتنحج بصوت عال ] .

أم عبده — ايه أصله ده ؟ ! ايه اللى جراك ؟

قرقر — أصلي ، أصلي شرقت ، حكاية القزاين اللي  
حاتدش دى شرقتنى .

أم عبده — وانت مالك ، إيش حشرك .  
قرقر — أبدأ ما فيش حاجه [ تمود الحرصة ويمود الى  
التنحج ] ما بلاش ياستى حكاية دشدشة القزاين ، لحسن  
باين عليها مزعلاه خالص .

أم عبده — مزعله مين ؟  
قرقر — مزعله سيدى ، سيدى نوح افندى .  
أم عبده — وانت مالك انتة يابارد . . إيه دخلك . .  
اشتكالك ؟

قرقر — أنا مالى . . أنا قلبى على القزاين الفاضيه . .  
خساره تدشوش وتروح هدر ، نديعها احنا لبتاع الروبايكيا  
نستفيد بتمنها أحسن .

أم عبده — بقى كده ؟ القزاين الفاضيه بس هي اللي  
مزعلاك ، طب فوت يالله شوف شغلك ، هاتلى السبرتو  
وكنكة القهوة والبن .

[ تهم بالجلوس فيبدو القلق على وجه قرقر ]  
قرقر — ما تتفضلى ياستى تعملها فى المطبخ علشان  
ننصف هنا ، بعدين التراب يطلع عليكى .



أم عبده — ما لكش دعوه . . فوت اعمل زى  
ما بقول لك .

[ تجلس على الكنبه ]

قرقر — ياست أنا حاشيل الشلت والبياضات .

أم عبده — أكنس الأرض قبله .

قرقر — أصل الأرض لسه عايزه غلبه كثير . .

[ بسمع صوت نوح أفندى بنادي بهيه ]

نوح — بهيه . . بهيه .

بهيه — أيوه يا بابا [ تخرج ] .

قرقر — قومي ياستى شوفيه . . صبحى عليه ، يمكن

يكون عايز حاجه .

أم عبده — أسمح عليه ؟ الله لا يصبحه ولا يربحه .

قرقر — يعنى حاتسيه كده لغاية ما يبص من بلكونه

ولا شباك ، تقع عنيه على واحده من الجيران .

أم عبده — [ تقفز من مكانها كمن لدغتها عقرب ] تقع عنيه ؟

ياخى جه قلع عنيه ، ما يوعى يبص بيها لا يمين ولا شمال ،

ما انا عارفاه ، راجل دنى ورمرام ، والنبي لانا مسنكراله

بقيت الشبايك والبلكونات ، أما اشوف حايبص منين ،

هو خلا حد فى الحتمه ما يصلوش ، دا فاضخنى فى وسط الجيران

[ تخرج أم عبده .. يتبعها قرقر حتى الباب ]  
 قرقر — الله يكون في عونك يا ست ، خدى بالك منه  
 كويس ، امسكيه جامد . سنكرى الشبايك قوى .  
 [ قرقر يرد الباب وراها . . ويعود وهو يفرك يديه فرحاً ] .  
 قرقر — بس ، ولاكله ، ياسلام على حداقتك يا واد  
 يا قرقر ، يا اللى ما فيش منك فى الاربععاشر مديره ،  
 [ يقترب من الشواتل ويوجه اليها الحديث ] إيه رأيكم بقى ،  
 مش برضه عرفت أزوجهم ، اهو لو ما كانش ربنا ألهمنى  
 حكاية نوح افندى دى . ما كانتش عنكم حاتشوف النور  
 أبدأ ، كنت حاتخودها تأيده جوه الشواتل . لكن ربنا  
 ستر ، أصل نيتكم كويسه . دلوقت بقى ، فين سيد افندى ،  
 وفين سى محمود . اظن ده سى محمود . [ يحدث الشوال ] كنت  
 متأثر أوى على قزايز الويسكى وعمال ترفض كنت حاتودينا  
 فى داهيه . اتفضل [ يفتح الشوال فيخرج منه رأس سيد افندي ] الله  
 هو انت سيد افندى ، أمال كنت بتقلب قوى ساعة  
 ماجت سيرة الويسكى ليه ؟  
 سيد — ويسكى إيه يا سى قرقر ، أنا كنت باهرش ،  
 معرفش فيه إيه فى الشوال بيقرصنى .  
 قرقر — طب مش وقته اطلع قوام . لما أسيب سى  
 محمود راخر .



[ بهم بالذهاب الي محمود ، وبهم سيد بالخروج عند ما يسمع صوت  
بهمه مقبله ] .

بهمه — حاضر يا نينه ، حاضر ، أنا حاقظفها .

قرقر — يا نهار اسود . خش يا سيد افندى خش ،

خش لحسن ست بهمه جايه ، [ يربط عليه ] ما تمقلبش بقى  
لحسن تودينا فى شربة ميه ، ابقى استحمل القرص .

[ تدخل بهمه متقدمة الى قرقر الذي يقف بينها وبين الشوالات  
وقد تناول مكنسة كانت مستندة على الحائط ]

بهمه — [ فى عجلة ولهفة ] اسمع يا قرقر . أنا عايزاك فى

حاجه ضرورى .

قرقر — [ فى قلق ] حاجه ضرورى ؟ . طيب بس أما

أخلص الصاله دى ، عن إذتك شويه لحسن العفار يطلع  
عليكى [ وبأخذ فى الكنس ] .

بهمه — يا أخى استنى شويه ، الدنيا ما طارتش على

الكنس .

قرقر — ما طارتش على الكنس ؟ لكن حا تطير

على ابن الهرمه اللي فوق ، دلوقت حالا يرقع بالصوت ،

عايز الفطار ، وبعدين عايز الجدى الاحول والفرخه

الزعلانه ، والقله ، والكفته والكباب ، والسّم اللي يهرى

مصارينه ، كل دا دلوقت يطلبه ، وأنا لازم اخلص من الأوده

واللی فی الأوده . مش معقول أبدأ اسیبها وامشی ..  
دی تبقی مصیبه .

بیه — هوا ایه أصله ده . انت اتجننت؟ اسمع الكلام  
الی حاقو لولك ده من سكات .

قرقر — سمحت . اتفضلی .

بیه — الجماعه راحوا فین؟

قرقر — أنهی جماعه؟

بیه — سید افندی وسی محمود .

قرقر — وأنا إیش عرفنی .

بیه — إانت مش كنت فی الأوده معاهم؟

قرقر — لا ، لا یاست بیه ما تلخبطیش فی الكلام

لحسن الست أم عبده تسمعك تودینی فی داهیه .

بیه — تودیک فی داهیه إزای . انت مش كنت

فی الأوده قدامها؟

قرقر — كنت فی الأوده أبوه ، لكن معاهم لا .

بیه — إزای؟ إذا كانوا هم كانوا فی الأوده ، تبقی

ما كنتش معاهم إزای؟

قرقر — وإیش عرفك بقی انهم كانوا فی الأوده؟

بیه — وإیش عرفنی؟ أصل . أصل ..



قرقر — أصل إيه ؟

بهيه — أمال يعني حايياتوا فين إلا في الأوده ، مام لازم يكونوا في الأوده .

قرقر — يعني استنتاج كده ؟

بهيه — أيوه .

قرقر — إذا كان كده تبقي غلطانه ما كانوش في الأوده .

بهيه — بقول لك كانوا في الأوده يعني كانوا في

الأوده ، أنا متأكد خالص .

قرقر — متأكد منين بس ، إذا كنت أنا نايم في

الأوده لوحدي طول الليل .

بهيه — كذاب . أنا شفتم بعيني ، شفتم في الأوده

وانت ما كنتش فيها .

قرقر — يا نهار اسود . شفتم بعينيك ؟

بهيه — أيوه شفتم ، وعائزه أطمئن عليهم ، راحوا

فين ؟ جراهم إيه ؟

قرقر — راحوا فين ؟ . إيش عرفني !! أهم لازم ،

خرجوا يشطحوا زي عوايدهم .

بهيه — مش ممكن .

قرقر — لیه بس یا ست بهیه ؟ مش ممکن لیه ؟ ! لیه  
عدم امکانها ؟

بهیه — لان سی محمود کان راقد ، کان عیان خالص .  
قرقر — محمود لیه ؟ . راقد .. عیان . لا . دی انت بقی  
اللی ما عندکیش فکره عن الموضوع خالص .

بهیه — لزی ؟  
قرقر — لان محمود صحیح اربعه و عشرين قیراط ،  
صحتہ زی البب .

بهیه — بب لزی ، إذا كنت أنا شایفاه بعینی دی ،  
راقد و تعبان . و یقول آه .

قرقر — آه ؟ !

بهیه — آیوه .

قرقر — ممکن .. قادر ربنا یعیه و یعی آیوه ، لکن علی  
العموم اطمین قوی ربنا خد بیده خلاص ، آخر لحظه  
شفته فیها ما کانش یقول آه .

بهیه — لزی بس ! دا کان عیان قوی ، یاتری راح  
فین ؟ او حایر قد فین ؟ اسمع یا قرقر ، أنا عایزک تسیب  
الأوده دلوقت و تخطف رجلك تسأل علیهم ، تشوفهم  
راحوافین ، و جم منین .



قرقر - أسيب الأوده . ؟

بهيه - أيوه .

قرقر - ما يمكنش ، دا أنا قتل الأوده ، ماسيبهاش أبدأ  
ثم ... حكاية السؤال عنهم دى .. مش عايزه لا خطف  
رجل ، ولا سييان أوده .. اسمى ياست بهيه .. إتتى يهملك  
أمرهم قوى ؟

بهيه - أوى وبس .. أوى خالص .

قرقر - يعنى تخافى عليهم ، وتجى مصلحتهم ؟

بهيه - طبعاً .

قرقر - والله إنك أميره وبنت حلال ، طيب حيث  
كده .. أنا ح أقول لك على الحقيقة .. يمكن تقدرى  
تساعدنى .

بهيه - بس قبل كل حاجه أنا عايزاك تسأل عنهم ..

تشوفهم راحم فين وجم منين .

قرقر - حاضر .. من عنيه .. اطمنى .. هم لا راحم

ولا جم .

بهيه - يعنى مستخيين فوق ؟

قرقر - لا .. مستخيين تحت .. ومن جهة السؤال

حاسأل لك حالا عليهم [ يتجه الى أحد الشوات ويربت عليه ]

إزيك ياسيد افندى .

سيد - [ من داخل الشوال ] زى الزيت البتاعه لسه نازله  
فيه قرص .

قرقر - معلش .. تقدر تهرش شويه .. ما فيش حد  
غريب هنا .. [ برت على الشوال الآخر ] وانت ازيك ياسى  
محمود .. لسه بتقول آه ؟

محمود - [ من داخل الشوال ] آه .

قرقر - ليه بقى .. ما انا حطك فى الشوال سليم اربعة  
وعشرين قيراط لا بيك ولا عليك .. إيه اللي بيخليك تقول  
آه دلوقت ؟

محمود - الجوع .. جعان قوى .. حتة الجبنه الرومى  
اللى كنت شايها من امبارح .. لقيت الفيران واكله  
تلات ارباعها .

قرقر - والرابع الباقي ؟

محمود - نصه واكله الصراير والرابع واكله النمل .  
الظاهر كان عندهم عزومة حشرات .. آه .

قرقر - طب بس ماتز عش كده .. لحسن الست  
أم عبده تسمعك .. اصبر شويه أنا حا افتح لك دلوقت ..  
أصل ست بهيه عرفت خلاص .. بقت مننا وعلينا .

بهيه - [ فى زهول ] إيه ده ؟ إيه اللي عملته فيهم ، إزاي  
ترميهم الرميہ دى ؟



قرقر — آل إيه اللي رماك على المر ، قلت له اللي أمر  
منه .. قال إيه اللي رماك في الشوال ، قلت خو في لأقع في إيد  
أم عبده عرفتي بقى ياست بهيه ، ما كانش فيه وسيله للهروب من  
فتك الست والدتك غير الحكايه دى ، وأظن دلوقت ما فيش  
داعى نضيع وقت فى الأخذ والعطا .. المهم إننا نفرج عنهم  
ونخليهم يطيروا قبل ما نيجى ست ام عبده وتقفشهم .

بهيه — طب وبعدين حايرو حوا فين ، وينا مورا فين ؟  
قرقر — ياستى يحلها الحلال .. المهم دلوقت إن احنا  
نطلق سراهم .. نخرجهم بره اللشوله .. نخليهم ياخدوا  
نفسهم ، نخليهم يشموا النسمة .

بهيه — طب ومحمود ؟

قرقر — ماله محمود ؟

بهيه — مش بيتقول لك إنه جعان .. حانسيه كده  
جعان ؟

محمود — [ من داخل الشوال ] أيوه جعان .. جعان قوى  
واقع من الجوع .

قرقر — يا جدع أسكت انت الله لايسيتك .. لحسن  
أم عبده تسمعك .. إبقى شوف لك أى حاجه بره ، إنشا الله  
حتى لقمه بجينه .. المهم بس انكم تخرجوا .

[ ٣٠٠ بفتح الشوال عند ما يسمع صوت نوح افندى قادما ]

## المشهد الثاني



[ نوح — قرقر — بهيه ]

نوح — [ من الخارج ] دى ما بقتش عيشه . . دى بقت  
جهنم الحمرآ . . واد يا قرقر . . قرقر .

قرقر — لا .. الظاهر إن اليوم ده مش حايم على خير  
أبدأ . . ما فيش فايده .. باينكم حاتخدوها تأييده .. أصل لو  
نوح افندى اترستا فى الأوده دى . . ما حدش حايعرف  
يطلعها منها ولا بالطبل البلدى .. الحقيه ياست بهيه .. حوشيه  
شويه لغاية ما اخر جهم .

[ تم بهيه بالخروج عند ما يدخل نوح مرتديا الجلباب ، وقد أمسك  
زجاجة ويسكي في يده وارتدى فردة حذاء ، وأمسك بيده الفرده الأخرى ] .

نوح — ما بتدش ليه يا قرقر الكلب ؟

قرقر — [ فى بأس ] نعم ياسيدى . . أفندم .

نوح — فين فرده الشراب الشيكه أبو نقره واحده ؟

قرقر — أمال إيه اللي فى إيدك دى ؟



نوح — دى بنقرتين .. واحده عند الصباع وواحده  
فى الكعب ، لكن أنا فاكر إن التانيه كانت بنقره واحده  
عند الصباع ، تبقى راحت فين ؟

قرقر — تبقى برضه هيّ اللي فى إيدك .. بس ربنا  
أنعم عليها بنقره زياده ، وبكره كان تبقى بتلاته وأربعه .  
نوح — طب بلاش الشيكه ، هات لى أبو حربيه .. أنا  
آخر مره قلعته كان بحربه واحده ، دلوقت حلاقه بحربتين  
والا إيه ؟

قرقر — وافرض إنك لقيته بحربتين ، تزعل ليه ؟ !  
أهه زياده فى التسليح .. حد لاقى .

نوح — طيب زى بعضه .. حربيه حربتين .. هاته  
والسلام .

بيه — تعالى يا بابا .. أنا أجيبك اللي انت عايزه ..  
تعالى معايا .

نوح — لا .. مش جاى ، أنا مش عايز أشوف وش  
الوليه امك دى مره تانيه أبدأ .. أنا حاسيلها البيت .. أنا  
حافرجها .. أنا وهيّ والزمان طويل .

بيه — ليه بس يا بابا؟ هيّ عملت حاجه .

نوح — عملت حاجه؟ كل اللي عامله فيّه ده ..

وما عملتس حاجه ؟ . عايزاها تعمل إيه أكثر من كده ..  
هي مخلياني عارف اتنفس .. حاشره نفسها في كل شووني ..  
دا مش جواز ، دا أسر ، لكن معلش هانت ، فوت  
ياواد ياقرقر هات الشراب والبدله [ يجلس على الأريكة ]  
قرقر [ ينظر متردداً الي بهيه ] - حضرتك حاتقلع هنا؟  
نوح - أيوه .. إيه المانع ... هوا أنا حاتقلع  
في الشارع؟

بهيه - طب مااتفضل في أودتك يا بابا وأنا أجيب لك  
اللى انت عايزه .

نوح - أودتي؟! هي بقت أوده ، دي بقت ززانه ،  
انت عارفه عملت فيّه إيه ؟  
بهيه - عملت إيه ؟

نوح - أنا لسه بقول يا فتاح يا عليم لقيتها لك من غير  
مناسبة هاجمه زي الغول وفي إيدها الشكوش وشوية  
مسامير وهات يادق في باب البلكونه والشباك .. قال إيه  
عشان أبطل البصبصه للجيران .. هوا أنا لسه فتحت  
عيني ؟ . الوليه دي لازم اتجننت .. اتخبلت .. ومع كل هي  
البصبصه حرمت . طيب أدبني خارج دلوقت .. أما أشوف  
حا تقدر تمنعني من البصبصه ازاي ؟



ببيه — طيب يا بابا قوم البس هناك وبعدين اخرج  
زى مانت عاين .

نوح — [ فى اصرار ] لا . . أنا حلفت ما أنا داخل  
الأوده لأجل خاطرها . . فوت يا واد يا قرقر هات لى  
البدله والشراب أبوحربه ، وحمالة الشراب ، وهات عليه  
السجاير من فوق المكتب . . بس اوعى تلتطش منها حاجه .  
ببيه [ تشير الى قرقر أن يبقى مكانه ] — خليك انت يا قرقر  
شوف شغلك أما اروح أدورّ انا على الحاجات اللى هوّا  
عاينها .

[ نخرج ببيه ]

نوح [ وهو بدنن على العود ] — وبعدين يا واد يا قرقر ،  
وأخرتها ؟

قرقر [ وهو يكنس حوله متبراً الفبار لمضايقته ] — آخرتها  
فى إيه ؟

نوح — فى إيه ؟ ! فى ستك أم عيده . . هو اربنا مش  
حايتوب علينا منها . . ده مش عدل أبداً . . دانا أعرف  
واحد قتل قتيل خد فيه عشرين سنة سجن ، واليومين  
دول طلعم السجن ، بقى حر . . يعمل زى ماهو عاين ،  
يبصبص للجيران زى ماهو عاين . . ويروح البيت وقت ماهو

عايز ، ويشرب ويسكى زى ماهو عايز ، ويغنى زى ماهو عايز ،  
وأنا اللي ماقتلش ولا حاجه .. لغاية دلوقت فى السجن ، مش  
عارف اتفلفص .. تقدر تقوللى بقى ليه أفضل أنا ويخرج هو؟  
قرقر — لازم كان حسن السير والسلوك .

نوح — والله لو اعرف انى لو بقيت حسن السير  
والسلوك ، ربنا يتوب علىّ منها .. لكنك صليت من بكره  
لكن أنا عارف ما فيش فايده .. يبقى لانا بساط ولا حريه ؟  
قرقر — معلش ياسى نوح .. استحمل ، أدحنا كلنا  
مستحملين .

نوح — أنا كنت زمان باستحملها .. لكن دلوقت  
ما بقتش تنطاق أبدأ .. فى حد فى الدنيا يسنكر الشبابيك  
كلها كده زى ماهى عامله ؟! هوا دا بقى بيت يتسكن ،  
والنضافه اللي هى طالعالى فيها دى .. أقوم من النوم افتح  
عيني على طاخ .. طاخ .. يتهاى لى إن التنظيم بيهد البيت  
وبعدين ألاقها بتنفض الشبابيك .. ما يجكش مسح السلام  
إلا الساعة اتنين وأنا جاى .. علشان مية المسح كلها تنزل على  
نفوخي ، هوا أنا عمرى شفت البيت فى حاله طبيعیه أبدأ ..  
لازم السجاجيد فوق الكراسى ، والكراسى فوق التراييزات ،  
والتراييزات جنب الحيط والأرض مبلطه ، ترحلق بلد



بجالها ، ده بيت ينقعد فيه ده .. أنا أقدر أقعد قاعده هاديه .. اشرب لى فيها كاسين ولا أتنتن لى تقسيمتين .

قرقر — هوا انت يعنى بتقعد ياسى نوح افندى ؟

نوح — أقعد فين .. هو افيه حته ينقعد فيها ، دى حاجه تخلى الواحد يهيج ، وآخر المتهمه .. الشيخ اللى جايبهولى فوق السطوح .. تقدر تقوللى جايباه ليه ؟

قرقر — عشان يطلع العمل .

نوح — عمل ؟! يعنى إيه العمل ؟

قرقر — أصل فيه ناس قالوا لها إن الحاله اللى انت فيها نتيجة عمل اتعمل لك .

نوح — حالة إيه اللى أنا فيها ؟

قرقر — ولا مؤاخذه .. البصبصه والعريده ، وفروغية العين ، والشرب والمهيصه والهيجان بره البيت ، والـ ...

نوح — مفهوم .. مفهوم .. ماله ده كله ؟

قرقر — كله ده صاييك .. علشان حد متغاض منها فعمل لك عمل علشان يطفشك منها .

نوح — وبعدين ؟

قرقر — ولا قبلين ، قالوا لها على الشيخ عجائب إنه

راجل مجرب واحجته ما تنزلش الأرض .

نوح - يعنى حايعمل إيه ؟

قرقر - حايطلّع العمل .. ويعمل شوية تعازيم

واحجبه .

نوح - والنتيجه ؟

قرقر - النتيجة إنك تنلم ، وتبطل الشرب والسكحه  
والبصيصه وتقعده فى البيت .. وتجب ست أم عبده  
وما تبصش لغيرها .

نوح - [متزعجا] يامغيث .. يا حفيظ .. الراجل ابن

اللثام اللى فوق ده حايعمل فيّيه كده ؟

قرقر - دا المفروض .

نوح - دا أنا أقتله ، ودى تبقى أنهى عيشه دى ..  
أنا أقعد فى البيت ولا اشربش ولا اهيصش ، وما اعماش  
حاجه غير إن أنا أبص لأم عبده .. ياهوه .. الراجل  
المجرم ده عاين يعمل فيّيه كده ، وتفتكرك إنه يقدر يعمل  
الحاجات دى يا قرقر ؟

قرقر - مين يعرف .. أهو إذا ما كانش ده يقدر غيره  
حا يقدر .. هى يعنى حاتسكت .. حاتسيك كده لغاية ما تطير  
من إيدها .. أهى حاتها وراك كده .. لغاية ما تسنسلك .



نوح — قال الله ولا فالك يا شيخ .. على العموم  
الحمد لله ، اللي ربنا ألهمنى المشروع اللي أنا ماشى فيه دلوقت  
هو الوحيد اللي حايقنقذنا من المصيه دى .

قرقر — مشروع ؟ .. مشروع إيه ؟

نوح — قرّب .. قرب هنا .. إدينى ودنك ..  
[ يقرب منه قرقر ] مشروع جمعيه سريره .

قرقر — جمعيه سريره ؟ .. بتساعة إيه ؟ .. وعلشان  
إيه ؟ .. واسمها إيه ؟

نوح — اسمها جمعية قتل الزوجات .

قرقر — يا ساتر .. مره واحده كده ؟

نوح — أيوه .. مايفيش طريقه لإنقاذ العالم من السيطره  
النسائيه ولإعطاء الرجل حريته غير كده .

قرقر — ودى خلاص عملتها ؟

نوح — أمال ! دا انا ماشى فيها جد قوى .. أنا لازم  
أجيب خبرها .

قرقر — هى إيه دى ؟ .. الجمعيه ؟

نوح — لأ .. أم عبده .. لازم أقضى عليها هى وأمثالها ،  
قبل ما يضيعونا فى شربه ميه ، أنا فكرت فيها من زمان ، وكل  
الشه اللي باقعد معاها وافقتنى على المشروع ، وقالوا لى دى

فكره هايله ، وكنت بادرس الموضوع شويه شويه  
على مهلى ، لكن حكاية الشيخ عجائب واللى ناوى يعمل فيه  
خوفتى أوى ، المسألة دلوقت لازم نمشى فيها بجد ، دى  
مسألة حرب ، ياهم يلمونا فى البيوت ، يا احنا نجيب داغهم ،  
دا صراع على تقرير المصير ، أنا أقعد فى البيت ولا أبصش  
لغير أم عبده .. ياهوه .. يا جاه النبي .

قرقر - على العموم مافيش داعى للخوف كده ..  
الحكاية مش مستعجله أوى .. والجماعه دول اللى زى  
الشيخ عجائب معظمهم نصابين ، يعنى هى أول مره تجميعهم أهى  
بقالها سنين تترقى وتشبشب وتلبس فى أحجبه وتطلع فى عمل ،  
علشان ربنا يتوب عليك وتهدى ، ما بتهديش ، هى تنتقل  
من شيخ لشيخ ، وانت تنتقل من واحده لواحد ، مافيش  
حاجه بتحوق فيك أبداً ، لغاية ما رسيت على الشيخ عجائب  
وانت رسيت على زكية ولعه ، أما نشوف مين اللى  
حا يغلب ، الشيخ عجائب والا الست ولعه ؟

نوح - إيه يا وادده ؟ إنت اتجمنت ؟ وطى صوتك ،  
إنت عايزها تسمعك تبجي تطلع على جنتنا البلى !!  
قرقر - إنت لسه بتخاف منها بعد الجمعيه اللى عملتها ؟  
دا انت رئيس جمعية قتل الزوجات على سن ورمح ؟



نوح — قولتلك متزعقش، دى جمعيه سريه، لازم تفضل  
مستخيبه كده، تعمل فى الخفاء.. إنت عمرك ما اشتراكش  
فى جمعيه سريه أبداً؟!

قرقر — أبداً، لا سريه ولا علميه.

نوح — على العموم تقدر تشتريك.

قرقر — لكن أنا مش متجوز؟

نوح — مش مهم، الجمعيه حاتجوزك. وبعدين هى  
نفسها تتولى أمر تخليصك من مراتك.

قرقر — وعلى إيه.. لما اتجوز، يبقى يحلها ربنا.

نوح — ماتضيعش الفرصة من إيدك، واسمع نصيحتى  
اشترك من دلوقت أحسن لك، دى أحسن طريقه لضمان  
حريتك ولتأمين حياتك، وللقضاء على أم عبده وأمثال  
أم عبده.

[ بتحرك أحد الشوالات ويصدر الآخر صوت آه ]

قرقر [ فى نزع ] — يا نهار اسود وهو فيه حاجه

حانتجينا من أم عبده؟ ولا ميت جمعيه سريه، ولا انقلاب  
كامل، [ تستمر الحركة ] اصبر شويه، يا ويكا.

نوح — أصبر أكثر من اللى صبرته، مش ممكن،

أنا لازم أقضى عليها خالص، بس عايزين أعضاء، عايزينها  
تسكبر، لازم تشتريك، فاهم.

قرقر - حاضر حاشترك ، بس عن إذنك شويه ،  
أنا عايز أنفض الكنبه اللي انت قاعد عليها ، تسمح تفضل  
في أودتك شويه .

نوح - إنت كان بتجيب سيرة التنفيض ، إخص ،  
إخص عليك ، ياخية أملى فيك ، خلاص مش حاتنفع  
أبدأ معنا .

قرقر - ليه بس ياسى نوح أفندى ؟

نوح - عايز تدخل الجمعيه وانت بتنفض ؟ عايز تبقى  
عضو ، وإيدك ملوثة بجريمة التنفيض ؟

قرقر - وفيها إيه يعنى ؟ مش جمعية قتل ؟

نوح - أيوه قتل ، لكن مش تنفيض ، قتل بطرق  
شريفه نضيفه مش قتل بإثارة الغبار ، مش قتل بتحطيم  
الأعصاب ، دى من أول الحاجات اللي بتنادى بها الجمعيه ،  
المطالبه بحرية الوساخه ، وحق الكركبه والفركشه  
واللخبطه واللخفنه ، تقوم تيجى حضرتك وتقوللى قوم  
علشان أنفض .. انفوا عليك .

قرقر - الله يسألك ، طب بلاش التنفيض ، قوم  
عشان تظفر .

نوح - مالياش نفس ، أنا حاخذ بقم القزازه كفايه



[ يشرّب ] الله . . بالصحة والعافية . . بالهنا والشفاء .

قرقر - قوم بقي يامى نوح أفندى الله لا يسيتك ،  
قوم الله يستر عرضك .

نوح - مش حا قوم خلاص ، أنا عايز أدندن شوويه  
عندى كيف للغنا ، ناو لنى العود ، ناول .

قرقر - عود؟ لا ، الظاهر إنها حا تطبل على دماغنا  
[ بناوله العود ] مادام مسك العود يبقى مش حا يطلع من  
هنا أبداً .

نوح - تعرف تشتغل معايا على الرق؟

قرقر - رق؟ رق إنك شوويه ، وقوم . . قوم الله  
يجبر بخاطرك أنا لاليه فى طبله ولا فى رق . . انت عايز متى  
تيجى تلاقينى ماسك الرق تقطع عيشى ، إنك يا سيدى بتقدر  
عليها ، لكن أنا غلبان ، على قد حالى .

نوح [ يبدأ فى ضرب العود والغناء ] - يا سيدى زعلان ،  
يا روى زعلان [ قرقر يمد يده تحت الأريكة ويخرج منها لافتة  
يعلقها أمام نوح مكتوب عليها : « ممنوع الغناء بأمر أم عبده » فلا يكاد  
يراه حتى يصيبه الذعر ويصمت ثم ينهض ويقبلها فيبدو عليها « ممنوع  
البصبة بأمر أم عبده » فينتزعها ويقذف بها تحت الأريكة ثم يعاود الغناء ]  
نوح - يا سيدى زعلان . . يا روى زعلان .

[ يتحرك سيد ويتأوه محمود ]

[ قرقر يزداد ارتباكاً ويقرب من الشوالات ويربت عليها فى غفلة  
من نوح أفندى ]

قرقر [ للسؤال ] — حاضر .. اصبر شويه .. دلوقت  
أجيبك ساندوتش جنبه ، بس لما أخرج الكاينه دى حالا ،  
ربنا يسهل .

نوح [ ملتفتا الى قرقر ] — إنت بتعمل إيه عندك ..  
بتكلم مين ؟!

قرقر — لا ما فيش حاجه .. دانا بس بدندن .  
نوح — بتدندن ؟! إنت جنسك إيه .. حيوان ..  
تدندن وانا با اغنى .. إنت ما عندكش إحساس .. إنت  
جماد .. لما أنا أغنى يبقى لازم الدنيا كلها تسمع .. وإيه  
اللسوله اللى عندك دى .. إيه دا كله ؟!

قرقر — دا عفش الجماعه اللى كانوا ساكنين فوق  
السطوح .

نوح — وإيه اللى جابه هنا ؟

قرقر — ست أم عبده نزلته .

نوح — علشان إيه ؟

قرقر — حاتبيعه .

نوح — تبيعه ؟ .. وأصحابه راحوا فين ؟

قرقر — طردتهم .

نوح — كده على طول .. وليه تظردهم ؟

قرقر — علشان تسكن الشيخ عجائب .



نوح — أما وليه دون .. تطرد الناس الطيبين الأمرا  
علشان تقعد الرجل النصاب المحتال .. طب وحاتبيع  
عفشهم ليه؟

قرقر — علشان تاخذ أجرة الأوده من تمنه .

نوح — إخص على السفاله والإجرام .. تبيع عش  
الناس علشان تاخذ الأجره .. لا .. أنا مااسكتش على  
كده أبدأ .

قرقر [ فرحا ] — إيه ! أطلعته تاني؟

نوح — لا .. لا .. ما فيش فايده .. لو طلعتاه  
حاتنزله تاني .

قرقر — أمال إيه؟ ! نعمل إيه؟

نوح — نعهقد جلسه غير عاديه .. جلسه مستعجله .

قرقر — جلسه .. لإيه؟ .

نوح — للجمعيه .. ما فيش غير ..

قرقر [ مقاطماً بخيبة أمل ] — دا كل اللي تقدر تعمله؟

نوح — وده شويه .. لازم نجمع الجمعيه .. لاتخاذ  
قرار ضدها .

قرقر [ بيأس ] — طب ، اجمعها .

نوح — لكن ، لكن حاتجتمع إزاي إذا كان ما فيش

أعضاء ، عايزين أعضاء ، لازم تشترك .

قرقر - حاضر .. حاشترك .

نوح - وتجبب كان حد يشترك .

قرقر - حاضر .. حاجيب لك حد يشترك .. المعلم

عضمه الجزار لسه متخاق مع مراته وراقعاه علقه لما قطعت

نفسه .. أجهولك يشترك ؟

نوح - أيوه ، ده ينفعنا كويس ، مش يعرف يدبج ؟

قرقر - قوى .. دى شغلته .. بس .. عن إذناك

بقي دلوقت .. خمس دقائق .. حل عن الأوده شويه .

نوح - علشان إيه ؟

قرقر - أصلى .. أصلى .. عايز أنكشها شويه ..

وفيه شوية زباله بره .. عايز أدلقها على الكنبه .. علشان

القعهده تحلى .

نوح - لا .. مافيش لزوم .. ما تتعشب نفسك ..

أنا أقدر أستحملها كده .. ناولنى العود ناول .. واقعد

جنبى هنا لما أشنف ودانك .

قرقر - أنا عارف .. مافيش فايده أبدأ .. اتفضل

ياسى نوح أفندى [ بناوله المود ] وأدى قاعده [ يجلس على

الأرض بجواره ، وهو يلتفت الى الشواتل ] أنا عملت اللى عليه ..



وفوق اللى عليه .. لكن أعمل إيه .. لازم يشنف ودانى ،  
اتفضل اشنف .

نوح [ يأخذ في العزف والغناء ] — يا سيدى زعلان ..  
ياروحى زعلان .. لان .. لان .. آه ياسيدى زعلان ..  
ياعيني زعلان .. ياروحى زع .. لان يا .. عيني زع ..  
لان يا .. يا .. يا .. سيدى زعلان .. وكان زعلان .  
قرقر [ يصبح بجأة متفجراً بالبكاء ] — آه .. يانى .. آه

### المشهد الثالث



( أم عبده — نوح — قرقر )  
[ تدخل أم عبده مهرولة . ونوح أفندي منهمك في غنائه ]  
أم عبده — إيه .. مالك ياواد .. انطق قول ؟  
قرقر — آه .. يانى .. آه .  
أم عبده — مالك .. بتعيط ليه ؟  
قرقر — با اعيط على سى نوح أفندى .. بقاله نص  
ساعه .. زى مانتى شايفه كده .. لا يسكت .. ولا بيتقول  
زعلان ليه .  
أم عبده — طب بس انسد .. قوم شوف شغلك ..

وانت التانى ما كفاكش غنا .. جايب الواد مقعده جنبك  
ومعطله عن شغله ؟

نوح - يعنى وراه إيه .. المفاوضات ؟  
أم عبده - انتهينا .. قوم بقى من فضلك كفايه غنا .  
نوح - ليه .. الغنا حرم ؟ !  
أم عبده - ما حرمش ولا حاجه .. بس مش وقته ..  
قوم بقى علشان تلبس وتروح تشوف شغلك .  
نوح - وانت مالك .. عملوكى وصيه على .. أما  
دى مصايب .. ياستى أنا مش قلتلك ميت مره مال كيش  
دعوه بي .. هو اتى لكى عندى حاجه ؟  
أم عبده - بقى اسمع أما أقول لك .. أنا العفاريه  
بتتتطط فى وشى .. وإذا ..

[ تصدر فجأة صبيحة من محمود وهو داخل السؤال ]

محمود - آه .

أم عبده - [ تتلفت حولها فى ذعر ] إيه ده ؟ ! انتم سامعين ؟

قرقر - يا نهار اسود ، جالك الموت يا تارك الصلاة .

أم عبده - إيه ده ؟

قرقر - ده .. ده [ يتلفت حواله فى حيرة ] دول ، دول

لازم العفاريه .



أم عبده - أنهو عفاريت ؟

قرقر - العفاريت ... اللي كانوا بيتنططوا في وش  
حضرتك .. الظاهر .. إن واحد منهم ، طب وقع  
في الشوال .

محمود - آه .

قرقر - يا نهار اسود .

أم عبده - الحقوني ، أنا جتتي حاتتلبش ، إلحقوني  
بالشيخ عجائب .. أنا بقالي ليلتين حاسه إن فيه حاجه في  
الشقه .. اندهولى الشيخ عجائب قوام .. ما فيش حد  
حايطلعهم غيره .

نوح - هم ايه دول اللي حايطلعهم ؟

أم عبده - العفاريت اللي مالين البيت .

نوح - عفاريت ايه يا وليه ، انت مش حاتبطلي بقى  
شغل الهفه دى ، مش حاتعقلى أبداً ؟

أم عبده - اسكت انت .. ما تتداخلش في اللي  
مالكش فيه .. اطلع يا قرقر نادى لى الشيخ عجائب ..  
الحقنى بيه .

قرقر — أيوه ، علشان تكمل ، ما هو مفيش غير هوا  
 اللي ناقصنا ، علشان ينبسطوا ، أنا مالي ، أنا خاسس على  
 حاجه ، أنا واقف على رجلى ، الدور على المقرفين جوا  
 الشوات .

أم عبده — هم مين ؟

قرقر — العفاريه .

أم عبده — يا هوه ، يا مغيث ، ماتفسرش بقى لحسن  
 جتى بتتلبش .. اجرى الحقتى بيه .. مد شويه .

[ يخرج قرقر .. وترتمى أم عبده وهى تلهث .. وفى اللحظه نفسها

تدخل بيه ]

### المشهد الرابع



[ نوح — بيه — أم عبده ]

بيه — [ فى دهشة ] ايه ؟ فى ايه ؟ ، مالك يانيتيه ؟

أم عبده — هس ، ماتز عقيش .

بيه — ليه ؟ جرا [ ايه ؟ ]



أم عبده - قولتلك ما تزعقش كده ، لحسن بعدين  
يتفزعوا ، خليمهم مكنونين زى ما هم .

بيهه - هم مين دول؟

نوح - اللي فى اللشوله .. أصل الدنيا ضاقت بيهم ..  
مالاقوش حته يطبوا فيها غير اللشوله .

بيهه - [ فى فزع ] انتوا عرفتم؟

أم عبده - وانتى كان كنت عارفه؟

بيهه - أيوه يانينه عرفت ، وصعبوا على قوى ، والنبي

دول غلابه .

نوح - هم إيه دول الغلابه ؟! عفاريت غلابه ؟!

حلوه دى ، أول مره اسمع على عفاريت غلابه .

بيهه - عفاريت ؟ . [ تنهد فى راحة ] أيوه برضه فيه

عفاريت غلابه .

محمود - [ من الداخل ] آه .

أم عبده - يامصيتى ، يا وقعتى .. متفسر وش بقى ..

كفياه ، أنا خلاص مابقاش فيه نفس ، فين هوا ده الشيخ

هباب يلحقتى قبل ما اروح فطيس .

بيهه - هو الشيخ عجائب حايطلعهم؟

أم عبده - أيوه قرقر طلع ينده له .

بهيه — [ في فرع ] طلع ينده له ؟ .. وبعدين .. وبعدين  
لما يطلعهم حقيقي ، يروحوا فين ؟

نوح — يطلعوا على جتنا .. يشاركونا في عيشتنا ..  
علشان تنبسط أمك ويهدا بالها .. أمال .. العفاريه بتتنطط  
في وشها ، ويطبوا في الشوات ، وبعدين تطلعهم على جتنا ،  
هي وراها ايه غير تطلع على جتنا التراب والعفاريه .

أم عبده — ياراجل اسكت بقى وانسد ، ما تقعدش  
تجيب سيرتهم وتهيجهم .

نوح — أنا برضه اللي بهيجهم ؟ .. أنا اللي بعث أجيب  
لهم الشيخ عجائب علشان يطلعهم من اللشوله ؟ .. مالك وما لهم  
إذا كانوا قاعدين في اللشوله مستريحين تطلعهم ليه ؟  
بهيه — أيوه يانينه حقيقي .. تطلعهم ليه ؟ ! ما تخليهم

قاعدين مستريحين !

أم عبده — اتوا اتجنتوا ، أخليهم كده قاعدين معنا؟  
باركين على نفسنا ؟

نوح — مش باركين على نفسنا ولا حاجه ، الناس  
مكونين جوا الشوات ، والشوات مش بتاعتنا يبقى  
حايخس علينا ايه ؟

أم عبده — يعني حايفضلوا كده قاعدين ؟



بهيه — أيوه يفضلوا .. لغاية ما يزهقوا ويمشوا  
من نفسهم ؟

أم عبده — وإذا ما زهقوش ؟

بهيه — نعتبرهم ضيوف ، يعني حايكلفونا ايه غير لقمه  
بجبنه ، والا شوية خضار .

أم عبده — وكان حيا كلوا .. ؟

نحمود — [ من داخل الشوال ] آه .

أم عبده — يا مصيبي ، الحقوني ، يا ناس ، أنا مش  
قادره ، يا واد يا قرقر ؟

[ يدخل قرقر ومعه الشيخ عجائب حاملا كيس في يده أشبه بالخرج ]

## المشهد الخامس



[ نوح — أم عبده — قرقر — عجائب ]

قرقر — آدى الشيخ عجائب .. اتفضللى .. اتفضل  
يا سيدنا الشيخ اتفضل .

عجائب — يا ساتر .

أم عبده — اتفضل يا سيدنا الشيخ .. اتفضل .

عجائب — بسم الله الرحمن الرحيم .

أم عبده — إلقنا ياسيدنا الشيخ .. إلقنا .  
عجائب — يا أرحم الراحمين ارحمنا .. يا لطيف الطف  
بنا .. يا لطيف الطف بنا .. فيه إيه ياست هانم؟ فيه إيه؟  
نوح — عفاريت ياسيدنا الشيخ .. يعني حايكون فيه  
إيه غير كده .. إانت لك اختصاص في إيه غير العفاريت؟  
عجائب — همَّ فين؟؟ همَّ فين؟

قرقر — جوه هنا في اللشولة .. مع العفش المحجوز  
عليه .. أصل الست أم عبده حجرت على العفش بالعفاريت  
اللى فيه .. لكن دلوقت استغنت عن العفاريت .. يعني ممكن  
إنك تطالعهم؟

نوح — بس تاخدمهم معاك .. مش تطالعهم من اللشولة  
على جتتنا .. مفهوم؟

عجائب — مفهوم ياسيدنا الافندى مفهوم .  
نوح — إذا كنت عايزهم فوق معاك .. ما فيش مانع  
خدمهم يونسوك .

عجائب — لا .. لا .. دول صنف بطلال ما ينفعنيش ،  
أنا حااطلعهم وأودهم في داهيه .

بيهه — [ مترعجة ] في داهيه ازاي .. ياسيدنا الشيخ !!  
حرام عليك .



عجائب — ما يمكنكش .. أنا لازم أفنك بيهم .. لازم  
أفنيهم ، أيدهم .

بيهه — تفنيهم ؟ حرام .. حرام عليك [ تبكي ]  
أم عبده — هوا إيه أصله ده .. إيه اللي جراك  
يا بت ؟

بيهه — مش سامعه يا نينه بيقول إيه ؟ .. بيقول إنه  
حاي فنيهم .. يعنى حايعوتهم .

قرقر — ياستى بهيه .. بس لما يطلعهم بيتي يحلها ربنا ..  
هوا طلوع العفاريات بالساهل ، دول لما يتبتوا فى الشوال  
ما يطلعوش أبدآ .. دول يطلعوا حبابي عنين اللي حا يطلعهم .  
دول يطلعوا على جتته البلا قبل ما يطلعهم .. أسألينى أنا  
ياست بهيه ، دول لما يقرقصوا فى الشوال ، ما يطلعوش  
ولا بالطبل البلدى ، يبقوا وحشين قوى ، وخطرين ..  
يعضوا ويشنكلوا ، ويعملوا حاجات وحشه قوى .

عجائب — اللهم احفظنا .

قرقر — أسألونى أنا عنهم ، أنا أعر فهم كويس قوى ،  
عفاريات اللشوله دول .

عجائب — معلش ، ربنا يقدرنا عليهم ، اتفضلوا انتوا  
بقى من غير مطرود .. فضوا لنا الأوده .. خلونا نشوف

شغلنا .. بس ابعتي لنا واپور سبرتو و طاسه و حله فاضيه .

نوح — إنت حاتطلعهم ، والا حاتطبخ لهم .

عجائب — دا شغلنا ياسيدنا لفندي .

قرقر — على العموم هم جعائين قوی .

عجائب — إيش عرفك ؟

قرقر — باين كده من صوتهم .. يعني لو طلبت لهم كام

سندوتش .. حايبقوا ممنونين خالص .

عجائب — سندوتش؟! الظاهر إنك عمرک ما اشتغلت

مع عفاريت .. سيهم لي انت بس .. أنا حا اطلعهم بالطريقة

بتاعتي .

قرقر — انت حر .

عجائب — يا الله اتفضلوا .

[ تخرج أم عبده ووراءها بهيه ]

عجائب — وابتعوا لنا كان شوية دره عويجه .. أد

حفته كده .

قرقر — عويجه ؟

عجائب — أيوه عويجه .

قرقر — وليه العويجه ؟ يعني لازم تصعبها .. ما تخليها



دره عاده .. والا قح .. يمكن يعملوه بلبه .

عجائب — إنت حاتعلني شغلتي ، دي صنعتي ياسي قرقر  
وانا اعرف الأصول كويس .

قرقر — عدم المواخذة .. عويجه .. عويجه .. أنا  
مالي ، هو انا اللي حا كله .. إنشا الله تطلب قرطم .

عجائب — [ ملتفتا الي نوح الذي أمسك بالعود وأخذ في تصليحه ]  
وسيدنا لفندي مش حاتفضل ؟

نوح — أتفضل فين ؟

عجائب — شويه كده ، لغاية ما نطلع الكام عفريت .

نوح — واتفضل ليه ؟

عجائب — بس علشان الشغلانه دي متعبه شويه ..  
ويمكن أعصابك ماتستحملهاش .

نوح — ماتخافش أنا أعصابي تستحمل أبوها .

عجائب — وكيان عايزين هدوء تام .

نوح — وآدى الهدوء التام [ يلقي بالعود جانبا ] هه ..  
ولاكله .. اتفضل شوف شغلك .

قرقر — ولزومه إيه ياسي نوح افندي .. ما تسببه  
لو حده في الأوده .. يمكن يكونوا العفاريت ما يبدانوش  
على حد غريب .

نوح — یعنی إيه .. عفاريت حريم؟

قرقر — جايز .

نوح — يبقی مش حاطلع أبدأ .. أنا قتيل العفاريت ،

أموت فی العفاريت .

عجايب — معلش .. تقدر تخليك زى ما انت؟

[ تدخل عديله وهي تحمل السبرتو والطاسه والحله وكوز به الذره المويجه ]

عديله — انفضل ياسيدنا الشيخ .

عجايب — وحياة أبوكى ولعى لى السبرتو .

عديله — عنيه ياسيدنا الشيخ .

عجايب — تسلم عنىكى .

[ عديله تولع السبرتو ]

عجايب — حطى لى عليه الطاسه ، وحطى فيها حفته دره

وقلبه لغاية ما يتحمص .

[ عديله تنفذ المطلوب ]

[ يفتح الخرج ويخرج منه بعض أوراق وكتاب أصفر وأحجبه وبخور ]

[ يضع بعض البخور فوق الذرة ثم يضع الحجايبين فى الحلة ويكتب

فى ورقة يضع جل ويضعها فيها ]

الشيخ عجايب — عايزين أتر من أى حد .

عديله — يعنى إيه؟



عجائب — یعنی ای حته من الهدوم بتاعت ای حد  
من البيت .

نوح [ بقده بفردة الشراب ] — خد الشراب ابو نقر تین ،  
ما بقاش یلز منی .

عجائب [ یضع فردة الشراب فی الحله ] .

نوح — کل ده حیا کلوه العفاریت ؟ دا أنت متوصی  
بیهم قوی .

قرقر — متوصی بیهم إزای ! دی فردة الشراب دی  
حا تكون القاضیه علیهم . حاتموتهم خنقاً بالغازات السامه .

عدیله — هم مین دول ؟

قرقر — العفاریت یا ست عدیله .

عدیله — عفاریت ، یا مغیث ، یا منجی . أشتاتاً  
أشتوت ، وهو أنا أقدر علی طلوع العفاریت قدامی ، عن  
إذنك یا سیدنا الشیخ ، أنا جتی ما تستحملش .

عجائب — ما تخافیش یا بنیه اطمنی خالص ، ما دام أنا  
واقف جنبك ما تحملیش هم .

عدیله — البركه فیک یا سیدنا الشیخ ، بس أنا ركبی  
بتر عش .

عجائب — اقری آیه الكرسي خمس مرات .

عديله — حاضر ، بس إنت فاكّر الحاجه اللي طلبتها منك ؟

عجائب — فاكّر قوى ، وإن شاء الله حاديكي حجاب تلبسيه ، وأقول لك على وصفه تنفعك خالص .

قرقر — هو إيه دا يا ست يا عديله ؟ !

عديله — اسكت إنت دى حاجات ما تعرفهاش .

قرقر — إتنى كان بتعملي حاجات عند سيدنا الشيخ . والله عال ربنا يجعلنا من بركاتك يا سيدنا الشيخ ، مش حا تبتدى الشغل بقى . والا عايزلك جدى أحول ؟

عجائب — لأ ما فيش لزوم ، الحكايه مش مستاهله . بس عايزك تقرب من الشوالات وتحط الحله على كفك وتمسك ودنك الشمال بايدك اليمين .

قرقر — حاضر ، من عينيه ، أما شوف آخرتها .

[ يضع الحله التي على المنضدة في كف قرقر ثم يقب فيها الطاسه الذره والبخور ويضع عليها الغطاء ويشمر أكامه ويخرج من الخرج كيبساً صغيراً مدلى من خيط ويأخذ في لفه بحركة دائره حول الحله وهو يتعم بكلمات غير مفهومه ] .

قرقر — [ في ملل ] — وأخرتها . أنا ذراعى خلاص

تمل .

عجائب — [ يقرأ ] أينك يا زوبعه ، أينك يا لوبعه ..



أينك يا صاحب الروس الأربعة . [ يدمغه بكوعه ] اسكت .  
ما تخسرش الشغل .

قرقر — أصل الحق مش عليك ، الحق على العفاريات  
اللى ساكتين لك لغاية دلوقت .

عجائب — يعنى عايزهم يعملوا إيه ؟

قرقر — يخلوا عندهم نظر ، يشكوك مقلب والاي يلهفوك  
مقص ، والاي يعنى حافضواوا سايبني كده لغاية ما دراعي  
ينقطع . أنا مالي ، أهى حاترسى على دماغهم .

[ يتحرك شوال محمود في قلقة بطيئة حتى يقترب من أقدام عجائب  
ثم يدمغه في قدميه دفعة مفاجئة تلقى به على الارض ] .

عجائب — آه ، آه يا دماغى ، الحقونى . وسطى انقطع .  
عديله — سلامتك يا سيدنا الشيخ ، إيه اللى جرى ؟

[ لا يكاد ينهض متباعداً في خوف حتى يتلقاه سيد فيدمغه في قدميه  
دفعة تواقه مرة أخرى . فينهض متحاملماً يمدو مندفعاً خارج الحجره  
بأقصى سرعة ] .

[ عديله تنطلق مولولة من الحجره . نوح افندي يتناول رشفة من  
الزجاجة ثم يتناول المود ] .

قرقر — إيه يا سيدنا الشيخ ، حد يجرى كده من  
العفاريات !؟

عجائب — [ وهو يمدد في الخارج ] هم دول عفاريات ،  
دول بلطجية .

نوح — أنا مع العفاريات ، فلتحى العفاريات ، لو منهم  
اتنين فى جمعة قتل الزوجات . كنت سويت بيهم الهوايل .  
يا رب اتنين بس . زى دول . . وأنا امشى بيهم أم عبده  
على العجين ماتلخبطوش .

[ أم عبده تدخل مندفة على صوت الضجة ] .

أم عبده — إيه ؟ . حصل إيه ؟ . هم طلعا ؟

قرقر — إيه هم دول ؟

أم عبده — اللي ما يتسموش .

قرقر — لا ، ده هو اللي طلع .

أم عبده — هو مين ؟

قرقر — اللي يتسمى ، الشيخ عجائب . كبير محتالى القطر .

أم عبده — طلع ليه ؟

قرقر — عاد إلى قواعده ، فى السطوح .

أم عبده — يعنى إيه ؟ مش فاهمه ؟

نوح — [ ضاحكا فى سخريه ] ودى عايزه فهم ، عاد إلى

قواعده .. يعنى انسحب . عقب هزيمة منكره ، ارتد بعد

خسائر جمه . برضه ماتيش فاهمه ، بالعربى زاغ بعد ما

نقحوه علقه جابت داغه .

أم عبده — هم مين دول ؟



قرقر — اللي ما يتسموش .

أم عبده — ضربوه ؟ يوه ، يا مغيث ، ياساتر يارب  
والعمل إيه ؟ إذا كان هو ما اقدرش عليهم مين حا يقدر  
عليهم ؟ وإننت ياراجل ، قاعد ساكت كده !؟

نوح — أنا مبسوط كده ، أنا مع العفاريث ، نموت  
وتحيا العفاريث [ بمسك العود ويفني ] يا غائبا عن عيوني ،  
وساكتنا في شوالى .

أم عبده — هوا انت فيك فايده .. وبعدين ياقرقر ؟  
إيه العمل ؟ !

قرقر — إيه العمل ؟ [ مفكراً ] إيه العمل .. أقول لك  
ياستى خليها على الله .

أم عبده — أخليها على الله ؟ ! دا اللي قدرت عليه ؟  
قرقر — أيوه خليها على الله هوّا فى حد بيدبرها غيره  
خليها على الله ، وعلى .

أم عبده — عليك انت ؟

قرقر — أيوه علىّ أنا ... أنا حا اعرف إزاي  
أطلعهم لك .

أم عبده — انت حا تطلعهم ؟ ! ما بقاش اللي انت ياسى  
قرقر .

قرقر — یاستی یوضع سره فی أضعف خلقه .. جربی  
انتی حایخس علیکی حاجه ؟

أم عبده — طب بس انبط .. تعالی معايا نطلع  
نشوف الراجل جراه إيه .. یمکن تقدر ننزله تانی .

قرقر — مافیش فایده یاست .. دی العلقه اللى خدها ،  
مش حاتخلیه یرجع هنا أبداً ، دی نوك أوت .

أم عبده — یادی النصیبه ، وبعدين ؟

قرقر — قلتك جربینی .. مش عاجبك .. أعمل

لك إيه ؟ جربینی یاستی انت حایخس علیکی حاجه ؟

[ یزوم محمود من داخل الشوال ]

أم عبده — آه .. آه یانی .. أهم ابتدوا .

قرقر — قلتك خلینی اجرب .. مانتش راضیه .

أم عبده — طب جرب .. جرب .. زى ما انت عایز .

قرقر — آیوه .. كده الكلام .. اتفضلی انت بقى من

غير مطرود خلینی أشوف شغلی .

أم عبده [ وهى تهم بالخروج ] — ابعت لك شویة دره

عویجه ؟

قرقر — عویجه إيه یاست .. أنا حاطّلع عفاریت

مش کتاکیت .



أم عبده — أmaal أبعث لك إيه ؟

قرقر — تبعنى إيه ؟ إيه . . . ؟

[ محمود بزوم ]

قرقر — أيوه افتسكرت ، ابعنى حتة جنبه حلوم .. على  
طبق فول بالزبده .. على السبع بيضات اللي كنت حاتبعتهم  
للشيخ عجائب المهزوم ، وما فيش مانع تبعنى حتة القشطه  
وشوية عسل النحل اللي كان حايتمهم .

أم عبده — ليه دا كله ؟

قرقر — مش حاطع عفاريت ، يمكن يطلعوا جعانين  
ابنى أخليهم يا كلونى ؟ والا أسيبهم فى البيت يخربوه ويلهفوا  
اللى فيه ؟ مش برضه الاستحراص أحسن ؟!

أم عبده — برضك أحسن ، حالا حابعت لك اللي  
انت عايزه .. هى جت على كام بيضه .. أهو بجملة .

[ نخرج أم عبده ]

قرقر — وانت يانوح افندى .. مش تتفضل شويه ،  
علشان نشوف شغلنا .

نوح — شغلك ؟ ! انت كان ناوى تطلع عفاريت ؟ .

قرقر — دانا حاطع أبوهم ، دول ما يعصونيش أبداً ،  
إشاره واحده تطلعهم .

نوح — طيب ما تيا لله تورينا الشطاره كده .

قرقر — بس لازم أكون لوحدى .

نوح — بقی كده .. انت اتعلمت شغل النصب ،  
أنا مش حاسيب الأوده .. لازم أشوفك وانت بتطلعهم .

قرقر — ليه بس ياسى نوح افندى .. ليه تلخبط لنا

الشغل .

نوح — مافيش فايده .. لازم أشوفهم يعنى لازم

أشوفهم .

قرقر — حد فى الدنيا .. يشوف العفارىت ؟

نوح — كينى كده .. أحبهم ، أنا حاسس ان انا حلاقى

فيهم حاجه حلوه .

قرقر — لامن الناحيه دى .. اطمن جدآ ، مافيش فيهم

حاجه حلوه أبدأ .. دول ذكرين ، زى الحنشات ، الله

لايورك .

نوح — برضك حاشوفهم .

قرقر — يادى الواقعه السوده .. ياسيدى قوم الله

لايسينك ماتعطلش شغلنا ، قوم لحسن بعدين يعملوا فيك

اللى عملوه فى الشيخ عجائب .



نوح - ولو .. برضه حاقد .

قرقر [بمد أن تد صبره] - لا ، الظاهر الحكايه مافياش  
فايده أبدأ [ لنفسه ] مافيش طريقه غير إني أقول له الحقيقه  
وياطابت يا اثنين عور [لنوح] بقى اسمع ياسى نوح افندى ..  
أنا مش حاخبي عليك .. أنا حاقول لك على كل حاجه ،  
باختصار القول .. الحكايه ومافيا ، إن اللي فى الشوالات  
دول مش عفارييت .

نوح - أمال بيتقوا إيه ؟

قرقر - بنى آدمين ؟

نوح - بنى آدمين ؟ اللي هيدوا الراجل العلقه دى  
كانوا بنى آدمين ؟ ياسلام عليهم .. أحبهم .. لايمنى عليهم ،  
علشان أبو سههم من عنينهم .. هم فين طلعههم لى [ يقذف بالعود  
وينض مقترباً من الشوالات ]

قرقر - طب بس اصبر ما تزعقش كده ، علشان  
أفهمك بقية الشغلانہ .

نوح - مش عايز أفهم .. أنا عايز أسلم عليهم وأهنينهم  
وأحضنهم [ بهجم على شوال آخر غير الذي به محمود وسيد ويحتضنه ]  
أهنيك .. أهنيك من كل قلبي ، ياسلام ، أد إيه انت فشيت

غليلي ، اما مقص اللي نتشتهوله .. مش بتاع بني آدمين ،  
مقص عفاريتي حقيق .. انت خليتني أتمنى انك تكون  
بني آدم علشان أضحك للجمعيه .. لسه كنت بقول لقرقر ،  
لو منكم اتنين في جمعيه قتل الزوجات كنت سويت بيكوا  
الحوائل ، إيدك لما أهنيك . مبروك [ يفك الشوال ويمد يده  
فيجد به عدس بجبه فتبدو عليه الحبيبه ] إيه ده ؟ إيه ده ياواد  
ياقرقر ؟ ده بجبهه ؟

قرقر — جبهه ؟ واجها منين الجبهه دي ؟ ده ما كانش  
لابس جبهه أبداً يمكن لبسها جوه .. على العموم معلش .  
نوح — معلش ازاي ؟ بقول لك بجبهه ؟ يعني لا يعرف  
يشنكل ولا يضرب مقصات .

قرقر — ليه بس .. تفكر يعني إن الجبهه حاتحوشه ،  
على العموم لو حاشته نبق نقلعها له .

نوح — هو إيه اللي نقلعها له .. ونبلسها له .. ده  
عدس بجبهه .

قرقر — عدس إيه ؟ وربني كده [ يمد يده ] ياسيدي  
خضتني انت غلطت في الشوال .. أنا راخر بقول ماله قاعد  
ساكت كده .. لا يهرش ولا يبصرخ ، أصلهم اتنين .. واحد



بهرش علشان حاجه بتاكله والتانى يبصرخ من الجوع .

[ محمود يبصرخ ]

قرقر - حالا .. دقيقة واحده ، لغاية مايجيبوا  
الأكل ، أكله على كيفك عمرك مادقت زيها .. كانت من  
نصيب الشيخ عجائب .. أهى دى اللى يقولوا عليها تكون  
فى بقك وتقسم لغيرك .

نوح - يا الله يا أخى طلعمهم بسرعه علشان نعقد  
الاجتماع .

قرقر - اجتماع إيه ؟

نوح - الجمعيه .. هم مش حاينضموا ؟

قرقر - أيوه حاينضموا .. بس مش كده خبط لزق ،  
مايصحش تاخدهم كده على مشمهم .

نوح - يعنى إيه مش خبط لزق؟! الحكاياه مستعجله ،  
ولازم نشوف شغلنا ، ونعقد اجتماع عاجل سريع ..  
علشان نبت فى أمر أم عبده وتتخذ ضدها اجراء حاسم ،  
والايعنى عاجبك الشبايبك اللى مسنكراها دى؟!

قرقر - لا .. لا ، عاجبانى ازاي .. بس انت عندك  
فكره عن شخصية العضوين دول .. يعنى تعرف هم  
يقوا مين؟!

نوح — مش عايز اعرف .. اللي أعرفه عنهم كفايه  
جدأ ، كفايه انهم رقعوا عجائب الكلب الهدرين اللي خدمهم .  
كفايه مهارتهم في فن الشنكله ، والمقصات .. كفايه ...  
قرقر — مفهوم .. مفهوم .. بس أنا عايز أقول لك ..  
إن ظهورهم هنا مستحيل .

نوح — ليه ؟

قرقر — لأن البيت ده محظور عليهم .. ده يعتبر منطقته  
محرمة عليهم .

نوح — علشان إيه ؟

قرقر — لأن دمهم مباح فيها .

نوح — مين أباحه ؟

قرقر — عدوك اللدود .. الست أم عبده .

نوح — وليه ؟ مالها ومالم ؟ تطارد هم ليه ؟ وتبيح دمهم  
ليه ؟ هي متجوزاهم ؟

قرقر — متجوزاهم ازاي ياسيدي .. بقول لك أم عبده

مرات حضرتك ، تقول لي متجوزاهم ؟

نوح — أصلك مخلتني ، لأنني مش فاكر إنها بتبيح دم  
حد غير جوزها ، مش فاكر إن الخصومه المستحكه دي



تنشأ بينها وبين حد إلا إذا كانت بينهم صلة جواز ، طيب  
إذا ما كانتش متجاوزاهم تبقى مالها وماهم ، لها عندهم إيه ؟  
قرقر — أجرة الأوده .

نوح — آه .. بقى قولتلى .. يعنى همّ دول الجماعه اللى  
كانوا ساكنين فوق ، واللى استولت على عفشهم ؟

قرقر — أيوه ، أهم همّ ، استولت عليهم ضمن العفش .

نوح — وإيه اللى زنقهم الزنقه السوده دى ؟

قرقر — طبت عليهم ماعرفوش يروحوا فين وكانوا

متعودين ينزلوا من على المواسير ، لكن حضرتك كنت

واقف فى البلكونه اللى تطل على المواسير نخافوا منك

وملاقوش حتة يستخبوا فيها غير الشوات .

نوح — قلت لى ، طيب يا الله ، أطلق سراحهم حالا .

قرقر — بس اصبر شويه ، لغاية ما البت عديله تجيب

الأكل ، وبعدين نقفل الباب ونطلعهم ياكلوا لقمه ، والا

ياخدوا الأكل معاهم وينوغوا .

نوح — والاجتماع ؟

قرقر — تبقوا تنفقوا عليه بعدين .

[ تدخل عديله وهى تحمل الصينية وعليها الفطار ]

عديله — الأكل أهه .

قرقر — حطيه على الترايبزه .

عديله — أمال فين الشيخ عجائب ؟

قرقر — تعيشى انتى .

عديله — يعنى إيه ؟ جرا له حاجه ؟

قرقر — العفاريت جابوا له الكافيه . طيروه على فوق .

عديله — أمال الأكل دالين ؟

قرقر — للعفاريت .

عديله — العفاريت بياكلوا عسل وقشطه ؟

قرقر — ما ياكلوش ليه . . عفاريت ذواتى . . مش

واخذين على التقشف .

عديله — بقى كده ؟

نوح — كده والامش كده ، إنتى حاتفتى له محضر

سببى الأكل واطلعي بره خليه يشوف شغله ، هو احاطلعك

والاحاطلع العفاريت .

عديله — هو اللى احاطلع العفاريت ؟ ياخى عفاريت

لما ينططوه .

[ تخرج عديله ويفاق قرقر الباب خلفها ]

نوح — يا الله ياعم . . يا الله قوام ، إفرج عنهم حالا ،



خليلهم يشموا نسيم الحرية ، وخليتي أشد على أيديهم وأهنيهم  
بعضوية الجمعية .

قرقر - حاضر .. حافكهم أهه .. بس خد بالك من  
الباب كويس .

نوح - ماتخافش ، أنا حا اسنده بظهري ، مافيش حد  
حا يقدر يخش أبدأ ، أنا باعتبار نفسي مسئول عن حياتهم ..  
دول أعضاء جمعيتي ، دول سندي ، يا الله بقي طلعمهم .

## المشهد السادس



[ نوح — فرقر — سيد — محمود ]

[ يسند نوح الباب الموصل الى بقية الغرف بظهره ]  
 [ يسرع فرقر فيفك الشوال الذي به محمود فيقفز الى صينية الأكل  
 ويأخذ في التهامه ]

محمود — لو صبرت على دقيقه واحده ، كنت مت من  
 الجوع .. أما حتة صينيه ياسلام سلم ، أنا مش عارف آكل  
 إيه وأسبب إيه ، أنا قتيل العسل النحل ده .

[ بتجه فرقر الى شوال سيد وينفكه فيخرج سيد وهو يهرش ]  
 سيد — يا سلام ياهوه ، أنا أول حاجه حان انادى بيها  
 هى المطالبه بالحريه الخامسه ، ربنا مايجرمش حد منها .

نوح — إيه هى الحريه الخامسه ؟  
 سيد — حريه الهرش يا أستاذ ، ربنا مايجرمك منها  
 أبد آ . . . إنت مجربتش لما تكون حاجه بتقرصك ونفسك  
 تهرش ومانتاش قادر ؟

نوح — لا والله ماجر بتهاش .  
 سيد — يعنى مافيش حاجه قرصتك أبد آ ؟



نوح - لا ، بس عمرى ماقدرتش اهرش ، أنا جايب  
عصايه مخصوص للهرش ، دى يمكن الحريه الوحيدته اللي  
باتمتع بيها فى البيت حريه اهرش ، أما باقى الحريات فممنوعه  
لا حريه كلام ، ولا حريه غنا ، ولا حريه بصيصه ، ولا حريه  
وساخه ، ولا حريه لخطبه . . الله لا يوريك . . على العموم  
دا كله حانحققه إن شاء الله بالجمعيه بتاعتنا ، بس دلوقتى تعالى  
كل لك لقمه على ما قسم .

[ يتجه سيد الى الصينيه وأخذ فى الأكل ]

نوح - ما تأخذو ناش يا جماعه فى الأكل الطيارى اللي  
ع الواقف ده ، لكن نعمل إيه فى سى قرقر ، مادام عملكوا  
عفاريت .

[ يعتمد من أمام الباب قليلا ]

قرقر - إوعى الباب ، إوعى ، لحسن القضا المستعجل  
يطب ويكشف الحكايه ، ونروح كلنا فى شربه ميه .

محمود - القضا المستعجل؟ يا بابى ، أنا حازور .

سيد - أحسن حاجه نعمل ساندويتشات وناخذها  
فى جيوبنا .

نوح - ما تخافوش ، أنا سادد الباب كويس ما حدش

حايستجری یخش ، کلو ا علی مهلمک ، علشان بعد کده نقدر  
نعقد الاجتماع علی راحتنا .

قرقر — اجتماع ایه ؟! مش وقته دلوقت ، یا الله یا جماعه  
اعملوا کل واحد ساندوتش ، وزوغوا دلوقت ، ما حدش  
عارف الظروف بعد کده ایه .

نوح — والجمعیه ؟

سید — [ وهو یحتو رغیفه ] نتفق علیها بعدین .

نوح — بعدین ازای ؟! المسأله مستعجله خالص .

محمود — طیب ممکن نتفق دلوقت علی حته نتقابل  
فیها . أصل هنا منطقة خطر .. خطر جدآ .

قرقر — آیوه خطر علینا کلنا ، دی لو طبت علینا مش  
حاتسبنا الا قتلی .

نوح — طیب نتقابل فین ؟

قرقر — اتقابلوا النهارده بعد الضهر فی القهوة اللى علی  
ناصیه الشارع .

نوح — بعد الضهر کتیر ، احنا عایزین نشوف شغلنا .

محمود — طیب نخلیها الضهر والا الصبح زی ما انت

عایز ، بس اظن دلوقت نخرج قبل ما حد یقفشنا !

قرقر — آیوه .. یا الله زوغوا بسرعه ، وانا حاخبی



الشواتل الفاضية، وأنعكش الأوده.. قال يعني حصلت  
بيتنا خناقه جامده، وانا انتصرت عليكم .

[لايكادان بهمان بالخروج حتى يفتح الباب المؤدى الى السلم وتندفع  
منه زكيه وامه ] .

### المشهد السابع



نوح — قرقر — سيد



محمود — زكيه

نوح — [ صارخاً في فرع ] زكيه ؟ ايه اللي جابك هنا  
دلوقت يا زكيه ؟

محمود — الله !! زكيه !!

زكيه — أيوه زكيه ، مالكم بتبصولي كده زي اما يكون  
التقيتوا عفريت ؟

قرقر — والله العفريت أهون ، أنا لسه دلوقت مطلع  
عفريتين بشوية عسل .. لكن انت اطلعك بيايه .. ايه  
اللي جابك ياست زكيه ؟

زكيه — اسكت انت انسد يابوز الإخص .  
قرقر — حاضر ، انسديت ، حاسكت خالص ، وانا  
بقي عندي حاجه .. كل اللي عندي خلاص قلته .. لغاية  
ماطلعت العفريتين دول ، لكن انت بقي ما اظنش فيه فايده  
منك ، ما كنتش عامل حسابي عليكى أبدأ ، أنا أحسن حاجه  
اقعد كده واتفرج على اللي حايجرى ، انفضلى ياست كبريته .  
زكيه — ولعه ياروح امك .

قرقر — ولعه ، كبريته ، أهو كله محصل بعضه ، أهى  
حاجه تلسع وخلص .

زكيه — قلت لك ولعه يعنى ولعه .. يعنى مشعوطه ..  
بت تلعب بالببيضه والحجر .

قرقر — أنا مالى يا ستى العبي باللى تلعبى بيه ، أهم كلهم  
قدامك ، بيض على حجاره ، العبي زى ما اتقى عايزه .. بس  
خدى بالك بقى ياست ولعه .. إن فيه ورا الباب ده ..  
عاصفه .. اسمها أم عبده .. تاخذ فى وشها ميت ولعه .

زكيه — وانا مالى يا عمر ، بتخوفنى والا ايه ؟ أنا  
ما كلش م الكلام ده .

قرقر — أنا مالى تاكلى والا ما تكليش ، أنا حبيت بس  
اعمل اللي عليه ، ودلوقت عن اذنكم ، آكل لقمه ، على  
الأقل لما يجرى لى حاجه أبقى ميت شعبان ، حضرتم ياست  
ولعه .. الأستاذ نوح ، والأستاذ محمود والأستاذ سيد .

زكيه — عارفاهم ياروح ستك .



قرر - - یعنی اطلع منها خالص .. حاضر .. حاضر ..  
تفضلوا .

محمود - الظاهر ان اليوم ده مش حايفوت على  
خير أبدأ .. أنا بافكر آخذ الرغيف بتاعى وادخل الشوال  
تانى ، هى حقيقتى القعدة مش مريحه ، لكن آهى مامونه ،  
بعيد عن الخطر .. والشوال اللى تعرفه أحسن م اللى  
ما تعرفوش .

[ بهم محمود بالدخول فى الشوال ]

زكيه - رايح فين ياسى محمود افندى ، اطلع لى بره  
يا خويا ، أنا ليّه عندك حساب .

نوح - ما تزعقيش كده ياست زكيه الله لا يسيتك  
وطى صوتك شويه ، قولى لى بس ايه اللى جابك هنا ؟  
زكيه - [ تكشف عن ساقها ] رجله يا حبيبي ، وحشين ؟!  
سيد - هم من جهة الخلاوه حلوين ، بس يعنى جابوكى  
هنا ليه ؟

زكيه - جابونى ليه ؟ علشان أصنى حسابى معاكم ،  
علشان أشوف لى طريقه ، علشان أرسى لى على بر .  
محمود - طيب انتِ مش جايه لنوح افندى ؟ عن  
اذنك احنا .

زکيه — اقعدهنا ، أنا جايه لكم انتوا لاتنين ، لازم  
تشوفوا لى خلاص ، انتوا فاكرينها ايه ؟ سايبه ، فوضى ؟!  
نوح — طيب يا زکيه يا ختي ، الخلاص ده ممكن نشوفه  
فى أى حتة تانيه . الحکايه ما اظنهاش مستعجله أوى كده  
وانتى عارفه إن خالتك أم عمده لو دريت . . .

زکيه — حاتمعل ايه يا ادلعدى ، أنا عايزاها تدرى ،  
لازم أجيها على بلاطه .. ما فيش فايده غير كده ، هو كل  
الطير اللى يتاكل لحمه .. كل ما جيلكوا من هنا تجوفى من هنا ..  
الحمد لله اللى قفشتكم هنا مع بعض ، علشان نرسى لنا على حل .  
سيد — حل فى ايه بس ياست زکيه ، هوا دا وقته ؟ .  
زکيه — اسكت انت واطلم بلسانك ما تداخلش فى اللى  
مالكش فيه [ توجه الحديث الى نوح ] هه . . قلت ايه ؟

نوح — فى ايه بس يا زکيه ؟

زکيه — ماتتاش عارف فى ايه ، فى اللى فى بطنى يا عومر .

نوح — اللى فى بطنك ؟ ! ماله ؟ !

زکيه — عايزه له أب يا حبيبي . . عايزه له والد  
يا سيدنا لفندى .

محمود — عايزه له ايه ؟ !

زکيه — أب ، أب ، مش فاهم يعنى ايه أب ، زى أبوك ،  
وأبو أبوك .



محمود — أيوه .. أيوه فاهم .. بس وطى صوتك .

نوح — ومستعجله قوى ، على أبو لسلامته ، ليه ؟!

زكيه — مستعجله ليه ؟!

محمود — أيوه حقيقي ، يعنى مش كان يبقى أحسن

لو تسليبيه لغاية ما ينزل ويكبر ويميز ، ويختار الأب  
اللى يعجبه ؟!

قرقر — [ وهو يمزج الطعام ] أى والله فكره ، أنا  
شخصياً ، لو خيرونى ما كنتش اخترت أبويه دا أبدأ ، كان  
شحات ابن شحات ، وكان شكله وحش قوى ومورى أم  
الويل . لكن أعمل إيه ، طلعت لقيته الله رحمه أبويه ،  
وما قدرتش أقول لهم غيروه ، لكن والله لو كان بايدى  
كنت مؤكد نقيت واحد تانى .

نوح — مضبوط . لك حق ، أهى دى حريه جديده  
م الحريات اللى حاطالب بيها الجمعيه . حرية اختيار الآباء .

زكيه — بتقولوا إيه ؟ حرية اختيار الآباء ؟ يا أخى بو  
لما يشتحك منك له . آل يختار الأب اللى هوا عايزه آل ،  
خش فى عبي يا خويا خش ، استكردنى يا خويا استكرد ،  
ما انتم أصلكم فاكرينى هفيه ، لا ، أنا ما باكش من الكلام  
ده . لازم أشوف له أب حالا .

محمود — ليه بس يازكيه يا اختى ؟ ليه العند ده ؟ دا مش

وقتہ اُبدآ ، خلینا بعدین ندبر المسأله سوا علی رواقه .  
 زکیہ \_ ما کانش يتعز یا حیبی ، عالی والطلب رخیص  
 یاروحی ، آل علی رواقه آل ، یاریت کان ممکن یاسی  
 حوده .

نوح — هوا ِیہ أصله ده ؟!  
 زکیہ — ما انتش عارف أصله ِیہ ؟! حانعیده تانی  
 أصل أنا عایزه أب للواد الی جی بعد کام شهر ، عرفت بقی  
 أصله ِیہ ؟ . أصل أنا ماش عایزه ینزل یلاقی نفسه یاضنایا ،  
 من غیر أب ، یعنی ابن حرام ، فهمت یاروحی ، والافهمک  
 کان ؟! یعنی بالعربی واحد منکم لازم يتجاوزنی حالا .  
 سید — حالا ؟!

زکیہ — آیوه حالا ، حالا ، یعنی یطلع معایا من هنا  
 علی المأذون ، رجلی ، علی رجله ، قلت ِیہ بقی ؟  
 نوح — یاستی زکیہ ، الحکایه ما تجیش کده .  
 زکیہ — خلاص اتینا ، کله واحده ، أنا ماش حادوخ  
 نفسی ورا کم بعد کده ، لازم اطلع من هنا بعریس . فاهمین  
 والا لا ؟

نوح — ِیہ هوا دا ؟ هی الحکایه ، عافیہ ؟  
 زکیہ — عافیہ ؟ . بقی کده ؟! طیب أنا حا اوریک



العافیه تبقی [زای] [ترقم بالصوت] یوه .

قرقر [قافراً من مكانه في فرع] — یا نهار اسود ، أنا  
فی عرضك یا ست زکیه یا اختی ، أنا مفهم الست أم عبده  
إن العفرتین اللی حاطلعم لاتین دکره ، ما کانش عندی  
فکره أبدأ انک <sup>ب</sup>حاشرفی هنا کنت عملت مقدمه وقلت  
لها إن معام نتایه ، اعملی معروف و طی صوتک لحسن تطب  
علینا تجیب أجلنا ، یا الله یا جماعه ، خاصونا ، شو فوا لنا  
حل قوام .

نوح — حل [زای] بقی؟

زکیه — ما نتاش عارف حل [زای] . حانعبده تانی ،  
واحد منکم یتجوزنی .

قرقر — آیوه ، واحد منکم یتجوزها ، مافیش غیر کده .  
نوح — أنا ما اقدرش ، ما اقدرش أبدأ . دی أم  
عبده ، کانت تعلق لی المشنقه فی وسط میدان السیده ،  
دی کانت تاکنی ، اتجوزها إنت یا سی محمود ، إنت فاضی ،  
وعلی کیفک .

محمود — أنا؟! أنا اتجوزها؟! ده برضه معقول؟!  
اتجوزها وأنا مش لاقی آکل ، اتجوزها وأنا لسه تلبیند ،  
وأروح لهم فی البلد بدل ما یکون فی إیدی شهاده یکون

فی ایڈی زکیہ ولعه ! ویا ریت زکیہ ولعه وبس ، إلا وعلی  
کتفها کمان ولد !! ماشاء الله ، دول کانوا یخفقونی ، لا  
یا عم ، أنا ما لیاش فی الجوازه دی أبدأ ، إنت راجل  
مقتدر مبسوط ، وکان قدامک فی حساب الشرع ، تلاته  
[ الی زکیه ] خلاص یاست زکیه ، نوح أفندی حایتجوزک ،  
اتجوزها یا نوح أفندی .

نوح — ما یمکنش ، ما أقدرش ، حرام علیکم یا جماعه .  
زکیه — [ فی ملل ] یا الله بقی خلصونی ، أنا مش فاضیه لکم .  
قرقر — أحسن حاجه ، نعمل قرعه .

زکیه — اعملوا الی انتوا عایزینہ ، بس خلصونی قوام ،  
شوفوا لی جوز حالا ، حالا دلوقت ، فاهمین والا لا .

[ یسمع صوت أم عبده من الخارج ] .

أم عبده — خلاص یا قرقر !؟

[ یحدث هرج ومرج وهم محمود وسید بالفرار ، فتقف زکیه  
فی طریقهما ] .

زکیه — خلیک عندک منک له لحسن ارفع بالصوت .

قرقر — [ یجیباً أم عبده ] اصبری علیّ یاست شویہ ،

لحسن دول معصلجین قوی ، [ الی محمود ونوح وسید ] یا الله  
یا جماعه شوفوا لنا حل بسرعه ، حد منکم یقول لها إنه  
حایتجوزها ، وخلصونا ننتهی .



زكيه - يقول لى إيه يا عمر؟! هو أنا باكل من الكلام  
ده .. يخرج من هنا على المأذون إيدته فى إيدى .. هى  
الحكاية سايبه والا إيه؟

نوح [ يرتقى على الأريكة فى بأس ] - لا .. الظاهر إن  
أجلى قرب .. يا خسارة الجمعيه .. يا خسارة المشروع ..  
يا خسارتك يا نوح افندى .

محمود [ بمسك الشوال محاولا ادخال نفسه فيه ] أنا يا عم  
حادخل جوه الشوال تانى ، ومش حاطلع منه أبدآ .  
قرقر - بقى ده اسمه كلام؟! يعنى عايزين أم عبده تيجى  
تموتنى أنا؟! يعنى هى المسأله مالهش حل؟! ما فيش حد  
عايز يضحى؟

سيد [ بعد تفكير ] - أقول لكم . أنا حاضحى . حاضحى  
لكن مش علشان خاطر كم أو خاطر أم عبده ، أنا  
حاضحى علشان خاطر مخلوقه واحده .. عارف إنها  
حاتألم لو واحد منكم اتجوز زكيه .. حاضحى علشان خاطر  
واحدة حاتتصدم لما تلاقى أبوها اتجوز على أمها فى آخر  
العمر ، وحاتتصدم أكثر لو تعرف ان البنى آدم اللى فاكره  
مثل أعلى اتجوز الست زكيه ولعه ، وبقي أب لابن مجهول  
الأب .. أنا حاتجوزك باست زكيه .. وأمرى لله لأن  
ما فيش حد حامس بيه ولا حايزعل عليه .

زكيه — [ و ذمول ] إنت بتكلم جد ؟ ! والا عايز  
تلفنى .. خد بالك كويس أنا ماينضحكش على أبدأ .  
سيد — أنا ماعرفش ألف .. كل اللى اتى عايزاه  
حاعملهم لك .. بالله بينا يا جماعه .

[ يهون بالخروج عندما يسمع صوت الشيخ عجيب من وراء باب السلم ]  
عجائب — وآه يا قرقر .. ما طلعت ليش الفطار ليه ؟ ! أنت  
عايزنى أموت م الجوع .. مش كفايه اللى جرالى .  
قرقر — يادى الوقعه السوده .. نعمل إيه دلوقت ؟ !  
حانخرجوا منين [ الى عجيب ] طيب ياسيدنا الشيخ اطلع  
دلوقت وأنا أجيب لك الصينيه .

عجائب [ من الخارج ] — مش طالع إلا لما تديها لى دلوقت  
قرقر — أعمل إيه فى ابن الأروبه ده !! هاتوا يا جماعه  
الأكل اللى معاكم .. [ يحاول جمع الأكل واخراجه من الأرنجة  
واعادته الى الصينيه عندما يسمع صوت أم عبده من وراء الباب الآخر ]  
أم عبده — واد يا قرقر .. إنت حاتضيع اليوم عندك  
والا إيه ؟ .

نوح — خلاص ما فيش فايده رحنا فى داهيه .. الحصار  
تم من جميع الجهات . وقعنا واللى كان كان . جالك الموت  
ياتارك الصلاه أشهد أن لا إله إلا الله .



[ يقفر قرقر من مكانه وينزع أغظية الأرائك فيضمها فوق محمود  
 وسيد وزكيه . . وبمطي لسكل من محمود وسيد رق . . وزكيه طبله ]  
 قرقر — اسمعوا يا جماعه دى آخر محاولة . . دى آخر  
 حاجه نقدر ننفذ بيها بعمرنا . . يا تخيل عليهم يا نروح فى  
 داهيه . . أنا حافتح لكم الباب وانتوا تخرجوا على بره  
 جرى وكل واحد منكم يدق باللى فى إيده قوى ويفقر . .  
 وانت يا نوح أفندى امسك العود بتاعك ، وتتن لهم . .  
 فاهمين ؟

[ تفتح أم عبده الباب فتذهل مما تراه ]  
 أم عبده [ صارخة ] — يا حفيظ . . يا مغيث . . دول  
 إيه دول يا واد يا قرقر ؟ !

[ يبدأ الدق ويندفع الطا بور وهو يترنح الى الخارج ]  
 نوح — [ وهو يعزف على العود ] :

تَرَلِّلى . . تَرَلِّلى تَرَلِّلى . . تَرَلِّلى  
 محمود [ منشدأ ] — أنا الولى . . أنا الولى .

سيد [ منشدأ ] — وأنا ابن عمه الشيخ على .

زكيه [ منشدأ ] — وأنا اللى بزف الصالحين .

[ يفتح قرقر الباب أمام الموكب . . بينما م يرددون الأنشودة مراراً ]  
 [ عجايب لا يكاد يرى الموكب حتى يصرخ فرعاً ويفر هارباً ]

[ يسدل الستار ]



### الفصل الثالث

[ المنظر : بعد سنة . والوقت قبيل العشاء في ليلة صيف . صالة في الشقة العليا لمنزل أم عمده التي استأجرها سيد ومحمود . في الواجهة باب يؤدي الى شرفة بها بعض قصارى زرع . وفي اليمين بابان أحدهما يؤدي الى دورة المياه والثاني الى السلم ، وفي اليسار باباً يفضي الى غرفة النوم ، وشباك يطل على منور وقد وضعت عليه صينية قفل . في الركن اليميني البعيد أريكة استامبولي . وفي الركن اليسار البعيد بعض السلال والشوالات . في الوسط منضدة كبيرة حولها مقاعد خيزران . في الركن اليميني القريب بوفيه وفي الركن اليسار القريب المنضدة القديمة وعليها كتب وأوراق والمرآة المشروخة . وبجوارها غاية أشبه بسنارة الصيد في آخر الدوارة التي بها مشبك غسيل .. يبدو سيد جالسا أمام المنضدة وقد أتم كتابة رسالته وبدأ في تلاوتها لنفسه . ]





## المشهد الأول



سيد — محمود  
سيد — [يقراً]:

أكتب إليك ياساحرة وأنت منى على قيد خطوات ،  
أكاد لو أنصت أسمع هبة أنفاسك وخفقة قلبك .. أكتب  
إليك لأنى أشعر عند الكتابة بما يشبه متعة اللقاء ، وأحس  
أنى أنقل إليك ذوب نفسى وخلصة روحى ، وأكاد أتوهم  
وأنت تقرئين ما أكتب أنى طاو فى الصفحات قابع بين  
السطور ، وأنى أمتع العين بسحر عينيك وأدفىء الروح بجر  
أنفاسك .

إنى أحسك ياساحرة فى كل ما أحس .. أحس بك  
فى كل زهرة ندية وروضة بهية ، وطير شاد ونجم هاد ،  
وعطر زكى ولحن شجى .

أنت معى دائماً .. فى كل صحوة وغفوة .. أنت معى  
غائبة أو حاضرة ، واصلة أو هاجرة .. أنت باقية فى روحى  
وفى ذهنى وفى قلبى .. بقاء الروح والذهن والقلب ،

المخلص محمود

[ يطوي الرسالة ثم يشبكها بمشك غسيل مربوط في السنارة  
وتحين منه التفاتة الى شكله في المرآة فتخرج منه تهيدة مبررة ساخرة  
ويحدث نفسه ]

سيد [نفسه في المرآة] - وأخرتها؟ وإيش بعد دا كله؟  
إيه آخره الهوى المتسكر ، والحب المقنع ده .. انت ..  
بخلقتك دى ، وبكياتك ده .. مفيش فايدته منك مش حاتجك  
مش حاسه بيك ، ولا حاتحس بيك أبداً .. خلقتك كده !!  
تعمل إيه؟ طب ما أنا عارف انها مش حاتجبنى ، أنا يائس جداً  
من حبها ، أنا ما بعاملش كده علشان تجبنى .. أنا بعمل كده  
علشان ما اخذهاش ، أنا عايز امنحها الأمل الللى أنا فقدته ،  
وأعتقد أن أنا نجحت فى كده .. أنا عملت كل حاجة  
علشانها .. أنا كرمت جهودى وحياتى كلها علشان أسعدھا  
وأحقق لها أملها .. أنا قبلت أضحي بنفسي وأتجاوز زكيه ،  
علشان ما أصد مهاش فى محمود ، ولولا ربنا ستر ، والحكاية  
طلعت لاجل ولا حاجة .. كان زمانى جوز ست زكيه ولعه ،  
وأبو ابن ربنا يعلم مين أبوه .. قبلت دا كله علشان خايف  
عليها لتألم ، وفضلت ورا الحيوان محمود أله من البارات  
والكباريات وأذاكر له وأسهر بيه الليالى لغاية ما خلبته  
ينجح ويأخذ الليسانس ، وفضلت أجرى ليل مع نهار  
وانظ من ديوان لديوان .. وأجيب فى واسطه ورا واسطه



لغاية ما ربنا سهلها له وبقى موظف محترم وقعدت أدبق  
واقصد وأحرم نفسى لغاية ما بقلنا شقه محترمه نظيفه  
عليها القيمة بعدما كنا مش قادرين ندفع أجرة الأوده اللي  
فوق السطوح وخرجتنا منها الوليه على ملا وشنا مجوسين  
فى الشوالات ، وطول المده دى كلها عمال أهدى فيه  
وأحاول أن أخليه يجيبها واكتب لها فى جوابات باسمه ،  
وأناجيبها بلسانه .. أناجيبها بلسانه هو ، وبقلي أنا .. دال المنفذ  
الوحيد .. اللى بنفسه بيه عن مشاعرى ، وبخرج فيه حبي ،  
وبتلقى منها الردود بتاعتها ، اللذيذة الحلوه الهايمة .. حقيقي ،  
مكتوبة له .. لكن بحس منها بعزاز كبير ، بحس ان ولو  
أنى مش مقصود بيها .. لكن بلاقى فيها الرد على جواباتى ،  
وعلى هيامى ، وعلى حبي .. أنا مش حاسس أبدأ لما بقعد  
أحاسب نفسى إن أنا خسران كثير .. أنا حاسس إن الشعور  
بتاعى مردود ، مش ضايع فى الهواء .. هى حقيقى ماتحبيش  
الشكله الظاهر ده [ يشير الى نفسه فى المرآة ] ، ولها حق ..  
لكن متيأ لى انها بتحب الحاجه المستخيه .. بتحب القلب  
والشعور ، والروح ، ودا كله أبقى وأدوم وأحق ،  
[ يطلق تنبيده مريرة ساخرة ] أهو كلام بنعزى بيه نفسنا ، آمال  
حانقول [ به لو ما كانش كده ، كان الواحد زمانه ماتم اليأس .

[ ينفض من مكانه ومعه الخطاب والسنارة والدوباره، ويتناول الناي من فوق البوفيه ثم يطفىء النور ويتجه الى الشرفة . يقف بياها . . ويعزف برهة على الناي ، ثم يتقدم من حافتها على أطراف أصابعه ويقذف بالرسالة ممسكاً بيده طرف السنارة ]

[ في هذه اللحظة يفتح الباب المؤدي الى السلم بمفتاح من الخارج ويدخل محمود يحمل لفائف بها سندويشات ومأكولات وزجاجات بيده ويفتح النور ويضعها على الترابيزة ويرفع عقيرته بالفناء ]

محمود — ما كانش كده طبعك يا غزال ، والنبي  
أنا مقدر على دى الحال .

[ سيد يفزع خشية أن تفضح بهيمة الأمر ويحاول اسكاته بإشارات من يده ، ولكن محمود لا يشعر به ويستمر في الفناء ، فيترك السنارة مستندة على سور البلكون ويهرول الى الداخل ]

سيد — هس . . الله يفضحك . . زى ما حتفضحننا ،  
هو دا وقت غنا؟

محمود [ يفاجأ ويفزع ] — إيه ده ؟ انت طلعت منين  
نشفت دى .

سيد — هس ، وطى صوتك لحسن تسمعك . . تبقي  
فضيحة ، وتضيع كل تعبنا هدر . إطفىء النور لغاية ما تاخذ  
الجواب ، والا يعنى لا منك ولا كفاية شرك .

[ محمود يطفىء النور ثم يتسلسل سيد الى الشرفة ويمديه فيسحب السنارة ]

محمود [ هامساً من داخل الحجرة ] — ها . . غمزت ؟



سيد [يشير برأيه بالاجابة ثم يعود متسللا الى داخل الحجر] —  
كنت حاتودينا في شربة ميه ، مالك جاى عيارك قالت  
قوى ، وداخل فارد قلو عك .. إيه حكايتك ؟  
محمود [بضىء الحجر] — حكايتى أنا ؟ والا حكايتك  
انت ؟ إيه اللى قعدك انت لغاية دلوقت . . انت مش قلت  
إنك مسافر تجيب قرشين ومش راجع غير بكره بعد الظهر .  
سيد — دا اللى كان مفروض .

محمود — وبعدين ؟

سيد — ما حشاش قسمه . . الحساكايه حصل فيها الخبطه  
واضطريت ألغى السفر .

محمود [ق انزاج] — تلغى السفر ؟ يعنى مش حاتسافر ؟  
سيد — مالك بتصرخ كده !! انت مش لسه قابض ،  
ولاطيرت الماهيه زى عوايدك ، على العموم بكره ربنا  
يفرجها ويرزقه من حيث لا يحتسب .

محمود — قوى . . أنا معاك خالص ، من جهة بيرزق  
من حيث لا يحتسب فيرزق أوى . . بس بقى يرزقه بإيه ؟  
عمرك ماتعرف . . بمصايب . . بيلأوى .

سيد — بلاوى إيه اللى رزقك بيها ؟  
محمود — فيه أكثر من كده بلاوى .

سید — ما تقوللی بس ایه هی البلاوی دی ؟

محمود — وجودك الليله دی .

سید — وجودی أنا ؟

محمود — آیوه .. کان لازم تسافر .. أنا کنت عامل

حسابی علی إنک تسافر الليله دی .

سید — ولما ماسافر تش حصل ایه ؟ قعدت علی قلبک

کتمت أنفاسک ؟

محمود — حاجه زی کده .

سید — یعنی ایه ؟

محمود — یعنی بالعربی أنا عازم زکیه هنا الليله دی ..

عملت حساب إنک مسافر ، وقلت بدل ما روح أمهر بره

أهو أجیب شویة الشرب والأکل ونقعد نمز مز هنا ، جیت

إنت بسلامتک خلیت بی ، وقعدت فی البیت وخسرت لی

کل الشغلانہ ، تبقى دی بلاوی من حیث لا أحتسب ،

والا لا ؟ ایه العمل ؟ مش تقوم تسافر أحسن ؟

سید — إنت بتقول ایه ؟! إنت اتجنذت ؟ زکیه جیالك

هنا فی الشقه عشان تسهروا سوی ؟ دی آخر أنواع الفضایح

اللی عایز تعملها ؟ عایز الجیران یقولوا علینا ایه ؟ إنت مش

حاستریح الا لما تودینا فی داهیہ . وبسلامتها جایه إمتی ؟



محمود — [ بنظر الى الساعة ] أهو كان نص ساعه .

سيد — [ و فزع ] نص ساعه ؟ انت مجنون ؟ انت مش  
عارف بعد نص ساعه مين حايجيك هنا .  
محمود — مين ؟

سيد — مش فاكر قلتك إيه النهارده الصبح ؟

محمود — لأ .. مش فاكر .

سيد — مش فاكر الجواب اللي قريتو لك ساعة ما صحيت  
من النوم ؟

محمود — أبدأ أبدأ .. أنا لما باصحي من النوم باقعد يبجي  
نص ساعه في حالة غيبوبة تامه .. أنا مش فاكر الجواب ،  
أنا مش فاكر إن أنا شففتك النهارده الصبح خالص .  
سيد — يا نهارك اسود .

محمود — اسود ليه بس .. ما تقول مين اللي حايجي  
وتريجني .

سيد — بهيه ؟! افكرت والا لسه ناسي .

محمود — بهيه ؟ وإيه اللي حايجيها هنا ؟

سيد — يا محمود يا اخويا .. أعمل فيك إيه ، أكثر من  
إني أقرأ لك الجواب بتاعها .. وأكد عليك إنك تستناها  
عشان حانطلع تقابلك ، وأترجاك إنك تبقى لطيف معاها ،

وإنك توريها إنك بتحبها ، وتخليك رقيق وما تقلش أدبك  
ولا تمد إيدك ، وتقول لها إنك عايز تتجوزها ، وإنك  
حاطخطها من أبوها .

محمود — إيه !! إنت قلت لى الكلام ده ؟

سيد — أيوه قاتهولك .. أنا قعدت نص ساعه ألقنك  
الدرس وأحفضك حاتقول لها إيه .

محمود — بس .. هى النص ساعه دى اللى اكون فى  
حالة غيبوبة فيها ، وقتلك إيه ؟

سيد — قلت لى حاضر .. حاضر .

محمود — حاضر إيه ؟

سيد — حاضر حاطخطها .

محمود — لا .. دانا لازم كنت فى ذهول تام .

سيد — يعنى إيه ؟ مش حاطخطها ؟

محمود — أنا أخطب ! . فال الله ولا فالك .. بقى أنا  
سايك تسكتب عنى جوابات حب زى ماانت عايز ومديك  
توكيل تصفر وتغنى باسمى وقت ما تحب .. لكن لغاية  
الخطوبة .. وفرمل .. ستوب .

سيد — إيه ده ! إنت مجنون ؟ أقعد أتعب التعب ده  
كله .. وبعدين تقول لى كده .. أقعد أربى فيك ، وأنجحك



وأوظفك علشان خاطرها ، والآخر تيجي تخلا بيّه كده ،  
مش ممكن ، مايمكنش أبداً .

محمود — إيه هو اده اللي مش ممكن ؟! أنا ما اخطبش  
ولا اتجوزش أبداً . الشهاده بتاعتك خدها ، مش لازمانى ،  
والوظيفه كان ، أنا ما أبعش حريتى أبداً ، ولا بالدكتوراه .  
لا ياخال ، دا حتى حرام عليك .

سيد — يا محمود ياخويا ، يا حبيبى ، الله لايسيتك ، خلىنا  
نتكلم على رواقه ...

[ يدق الجرس ... يفرع الاثنان ويرتبكان ]

محمود — ودى تبقى مين فيهم اللي جايبه بدرى ؟ إسمع  
ياخال : إذا كانت بهيه ، أرجوك تقول لها إن أنا مش هنا .  
سيد — مش ممكن ، لازم تقابلها بأى طريقه ، مش  
ضرورى تخطبها ، قل لها كلمتين لطف و خلاص . وبعدين  
يبقى يحلها ربنا ، أرجوك علشان خاطرى .

محمود — موافق .. بشرط .

سيد — إيه هو ؟

محمود — إنها تنزل بسرعه .

سيد — حاضر .

محمود — طب واذا كانت زكيه ؟

سيد — حاشيلها لك على راسى .. اللى انت عايزه أعمله  
 أسافر لك لمدة شهر ، بس اوعى تزعل بهيه .  
 محمود — خلاص اتفقنا .

[ يدق الجرس ثانية فيذهب سيد ليفتح الباب فيفاجأ بنوح افندى ..  
 يدخل مندفعاً وهو يحمل حقيبة ]  
 سيد — [ فى ذهول ] الله !! نوح افندى؟! !

### المشهد الثانى



[ سيد — محمود — نوح ]

نوح [ وهو يضع الحقيبة على المنضدة ] — أسعد الله التماسى  
 كيف الحال؟  
 سيد — الحمد لله .

محمود — الذى لا يحمد على مكروه سواه .  
 نوح [ وهو يخرج أوراق و منشورات ] — الليله دى عندنا  
 شغل كتير .. خلاص ابتدينا الجد .. اقعدوا .  
 سيد ومحمود يتبادلان نظرات الحيرة والتردد ويسترقان النظر الى  
 الباب فى خوف ]

نوح [ وهو بلبس نظارته ويأخذ فى ترتيب الأوراق ] —



الطلبات نازله علينا زى النظره .. المنشور الأول عمل  
مفعوله .. الظاهر إن الحال من بعضه .. ما فيش حد أبدأ  
راضى عن حاله .. [ يرفع بصره فيجد الاثنين مازالا يتبادلات  
نظرات الحيرة والارتباك ] الله .. إتم واقفين ليه ؟ ! ماتقعدوا  
إحنا ما عندناش وقت .. لازم نفحص كل الطلبات دى ..  
ولازم نراجع قانون الجمعيه .. ونبتدى فى تشكيل مجلس  
الإداره .. وتكوين الشعب .. دى كلها عايزه جهد كبير ..  
جلسة النهارده حاتكون جلسه تاريخيه كبيرى .. إن شاء الله  
حاتغير وجه التاريخ .. وحاتكون أول خطوه فى سبيل  
إعطاء الراجل كل حقوقه وحرياته وإنقاذه من براثن المرأه  
وتحريره من قيودها .. اقعدوا .

سيد - لكن .. [ يتنحج ] .

نوح - لكن إيه ؟ ! فيه حاجه ؟ .

سيد - لا .. ولا حاجه .. بس قصدى أقول إن ..

أنا شايف إن الوقت وخرى شويه .. والدنيا ليلت .

نوح - ليلت ؟ .. أمال عايزنا نعقد اجتماع فى عز

الضهر .. إيه ده يا أستاذ ده ؟ ! دى جمعيه سريره .. انت

عمرك ما اشتركت فى جمعيات سريره ؟ ! الجمعيات دى

ما تجتمهش إلا فى ستر الليل .. تحت جنح الظلام .. ده

عز وقت اجتماعها . . اقعدها بلاش تضيع وقت . . يا الله  
خلينا نشوف شغلنا .

سيد [ ينظر الى الباب فى قلق ] — بس . . مايمكنش نقدر  
نأجل . . . .

نوح [ فى غضب ] — نأجل إيه ؟ ! هت لعب ، دى  
مصالح أزواج ، دى حياة أو موت ، المسألة خطيرة جداً  
يا أستاذ ، إذا ما كناش نلحق نفسنا حانروح فى شربة ميه ،  
الوليه أم عبده ، خلاص فجرت ، بعد ما خلت الشيخ عجائب  
يستوطن فى الأوده اللى فوق ، وجوزته البنت عديله ،  
واستولت عليه ، وطول النهار يشبشب ويسحر ويعمل  
أحجبه ، ويطلع فى عمائل ، خلاص فضى لنا ، ما بقالوش  
شغله غيرنا ، هو وراه إيه ، آكل شارب نايم ، وأشيته رضا  
مع البت عديله ، يبقى وراه إيه غير خدمة أم عبده وأذيتنا  
لا ، لا ، الحكايه ما تستحملش التأجيل أبداً ، اقعدها ،  
محمود — اقعده بقى ياخال ، مافيش فايده ، الليله باينه  
من أولها .

[ يجلس محمود وسيد ويضع نوح أمامهما بعض الأوراق ]

نوح — دلوقت نقدر نعقد الجلسة . . أنا حاتولى  
الرئاسه . . وانت يا سيد أفندى تتولى السكرتاريه . . وانت



ياسى محمود .. عضو مجلس الاداره المنتدب .. [مفكراً]  
لكن بالطريقة دى مش حايبقى فيه أعضاء .. لازم يكون  
فيه ولو عضو واحد .

[ يبق الجرس فيقفز سيد من مكانه فرعاً ويجري نحو الباب ويقف  
وراءه برهة متردداً ]

نوح [ يحاول جمع أوراقه .. ناظراً الى الباب فى حذر ومتسائلاً فى  
صوت خفيض : ] — إئتوا مستنيين حد ؟ !

محمود — لا .. أبداً .. ما فيش حد .. أبداً ! .

[ يبق الجرس ثانية .. فيفتحه سيد ببطء ، ويمد عنقه من خلال  
الفتحة ليرى الطارق .. يسمع صوت الشيخ عجائب من خارج الباب ]  
عجائب — السلام عليكم ياسى سيد أفندى .. عدم  
المواخذة .. وحياة والدك أقدر ألاقى عندك قطنه بصبغة  
يود أحطها على البطحة اللى فى دماغى .

[ سيد يفتح الباب ويدخله ]

سيد — الله .. الله .. إيه اللى جراك كفى الله الشر ؟

[ يرتقى الشيخ عجائب على الأريكة وقد بدت احدى عينيه سوداء  
أتر كدمة ووضع يده بالمنديل على جرح فى رأسه ]

## المسرح الثالث



[ سيد - محمود - نوح - عجائب ]

نوح - الله .. إيه الحكاياه يا شيخ عجائب ؟  
 محمود - الظاهر إن عين صابته .. حسدناك والله  
 يا شيخ عجائب .. لسه كنا بنقول عليك آكل شارب نايم ..  
 وأشيتك رضا مع عديله .

عجائب - الله يخرب بيتها بحق جاه النبي .. إلحقتني  
 يا سى سيد أنا فى عرضك لحسن خلاص .. دى ساح ..  
 إذا ما كانش بصيغة يود .. تبقى بتلقيمة بن ، بس أوقف الدم  
 سيد - حاضر .. حالا .. بس خليك كابسك بالمنديل .

[ سيد يخرج من البوفيه زجاجة صبيغة يود وقطعة قطن ثم يضمد جرح  
 الشيخ عجائب ]

نوح - إيه اللي جرالك يا راجل .. إيه اللي عمل  
 فيك كده ؟

عجائب - عديله ياسى نوح أفندى .. خدتني غدر ..  
 دشدشتني خالص .



نوح — ليه بس ١٤ عملت لها إيه ؟ .

عجائب — ولا حاجه والله . . النهارده الصبح الوليه  
زهرة بتاعة الفول الثابت فانت علينا سابت لنا نص قدح  
فول . . وقالت لى إن بقالها خمس سنين من غير خلفه وان  
جوزها ناوى يتجوز عليها إذا ما كانتش تخلف . . وطلبت  
منى وصفه للحمل . . الوليه صعبت عليه قولتلها فوتى عليه  
آخر النهار أكون عملتك اللازم وقعدت أحضر لها فى  
حجاب كويس محبش ما يخيبش أبداً . . وقرب المغربه  
خبط الباب ودخلت زهره . . رحى مديها الحجاب . .  
الوليه خدته وقلبته فى إيديها وقول زى ماتكون استقلته . .  
قالت هوا دا يا سيدنا الشيخ اللى حايجيب الجبل . . قولتلها  
ياستى إلبسيه دلوقت وإذا ما نفعش نعمل واحد تانى . .  
برضه لقيتها موسوسه ، حيت أطمئنا . . قولتلها ياستى  
ما تخافيش إطمئنى . . أنا مش حاسيك أبداً إلا لما تجبلى . .  
غلطت فى كده ١٤

نوح — أبداً .

عجائب — أنا يدوبك خلصت كلام . . وألاقك الباب  
انفتح وحاجه كده هجمت عليه . . زى أما يكون صاروخ . .  
أتانى كلامى كان فى دخلة عديله . . وسمعتة وهى ورا الباب

الظاهر الفار لعب في عبها خلاها شعلت .. وهجمت عليه ..  
عاديك .. ما خلثش فيه نفس .. ولا قدرت أفهمها ولا  
أشرح لها ولا آخذ منها حق ولا باطل .

نوح - ما تخافش ، بكره حاناخذ منها الحق والباطل ،  
اكتب يا سيد أفندي بسرعه ، العضو الرابع ، الشيخ عجائب  
محمد عجائب ، قوم يا شيخ عجائب قوم ، خد محلك على  
الترايزه ، قوم ، دا انت ربنا يبجك ، العلقه اللي إانت اترقعها  
دى ، حا تكون نقطة نحول في حياتك . حا تكون سبب  
في تخليد ذكرك في سجل الخلود ، دى اللي حاتدخلك التاريخ  
من أوسع أبوابه . بدال ما كنت حتة هلفوت نصاب دجال  
محتال ماشى في ركاب شيخة مجرمات الشرق الأوسط ،  
دلوقت حا تبقى عضو مؤسس في أكبر جمعيه سريه عرفها  
التاريخ . أكبر جمعيه حا تقضى على الطغيان والظلم والاستبداد .  
قوم يا شيخ عجائب قوم .. إانت أمك داعيه لك ، صدق  
من قال ، رب ضارة نافعه . أو كما قال ، تيجى مع العمى  
طابات .

عجائب - [ في دهشة ] إيه أصله ده ، أقوم أروح فين؟  
محمود - قوم ، قوم ، إانت وقعت والالهوا رماك ،  
آل من عديله لنوح يا قلبى لا تحزن ، قوم يا حلو ، قوم



خش التاريخ من أوسع أبوابه ، قوم لحسن المسأله مستعجله  
قوى .

عجائب — بس مش تفهموني إيه الحكايه ؟

سيد — دلوقت تفهم ، بس قوم خد محلك .

نوح — يا الله يا جماعه بقی علشان نبتدی الجلسه ،  
الوقت كالسيف ، أو كأم عبده ، إن لم تقطعه قطعك .

عجائب — قطيعه ، تقطع أم عبده ، وتقطع الزمن  
اللى رمانا فى بيتها .

نوح — قضاك كدا يا شيخ عجائب ، أمال أنا أقول  
إيه ، اللى بقالى عشرين سنه ، أم عبده مع الاشغال ، لكن  
معلمش ، هانت .

فيا قلب صبراً ان جزعت فر بما

هوى الزمن على رأس ام عبده بالصرم

مكسور البيت شويه يا أستاذ سيد ؟ معلمش ، مدام  
مكسور على دماغ ام عبده . يبق الكسر حلال ، يا الله  
بيننا يا جماعه ، فتحت الجلسه .

سيد [ ينظر الى الساعة فى قلق ] — احنا حان طول يا نوح  
أفندى ؟

نوح — إحنا والنساهيل ، نبتدى دلوقت نقرا قانون

الجمعية ، أنا بقالى شهر با اوضع فيه ، وأعتقد إن أنا ما سبتش  
حاجه أبدأ ما وفيهاش حقهها ، خد يا سيد أفندى باعتبارك  
سكرتير عام الجمعية ، اقرا القانون .

سيد — [ يتناول الأوراق ويأخذ في القراءة ] خطك وحش  
أوى يا نوح أفندى .

نوح — الله يبشرك بالخير ، دائماً العظاء ورؤساء  
الجمعيات السريه يبقى خطهم وحش كده ، لكن على العموم  
شويه شويه حتاخذ عليه ، اقرا .

سيد [ يقرأ ] قانون الجمعية السريه لقتل الزوجات .

مادة ١ — تنشأ جمعية سريه لتحرير الأزواج من طغيان  
الزوجات .. يكون مركزها العام مكان ما بمدينة القاهرة  
على أن تنشأ لها في المستقبل شعباً مختلفه في جميع انحاء القطر .

مادة ٢ — الغرض من إنشائها :

(١) وقف استبداد الزوجات .

(٢) المطالبة بالحريات السبع للأزواج وهى :

(١) حرية البصبصه وشبرقة العينين ، شبرقه بريئه مبدئياً .

محمود — أنا معترض .

نوح — علشان ؟

محمود — علشان مسأله البراهه دى ، أنا ما احبهاش أبدأ .



نوح — يا أخى قولنا ، مبدئياً ، يعنى تبتدى بريئه ،  
وبعدين يسهلها ربنا ، والا المسأله هبش كده ؟ .

محمود — إذا كان كده معلش ، موافق .

نوح — استمر يا سيد أفندى .

سيد — (ب) حرية الفوضى المنزليه ، وتحريم جميع  
أنواع النظافه من كئس ومسح وتنفيض فى حضور  
الأزواج ولا سيما أيام الجمع والعطلات الرسميه .

محمود — [ يصفق طرباً ] ، حلوه الفقره دى ، قلها تانى  
يا خال وحياء والدك ، أصل أنا أحب الفوضى قوى .

نوح — اقراها له تانى يا سيد أفندى .

سيد — هو إيه أصله ده ؟ إحنا ماورناش وقت .

نوح — طيب كمل .

سيد — (ج) حرية الغياب عن البيت لدواعى العمل ،  
مع عدم الاستفسار قطعياً عما هى دواعى العمل هذه ، حتى  
لا يرهق الزوج فى التفكير .

(د) حرية الكذب . مع عدم التدقيق فى الاستجواب  
حتى لا يكشف الكذب .

(هـ) حرية الاحتفاظ بسرية آثار أحمر الشفاه فى  
المناديل ، والروائح العطريه والشعرات المنتصقه بالجackets

وعدم الإباحة بمصادرها خشية الحرج .

(و) حرية التصرف في نقوده الخاصة مع تحريم وضع يد الزوجه في جيب الزوج لعدھا . أو لسلبھا كلها أو بعضها . أو لحسابه علیھا .

(ز) حرية انتقاء الخدم ، مع منع طرد الخادماٲ الجمیلات منعاً باتاً ، ومنحهن حق الالتجاء إلى مجلس الدولة فی حالة الطرد ، والعودة إلى المنزل بحکم مجلس الدولة .

مادة ٣ —

نوح — استثنى شویه لما ناخذ الرأى ، إیه رأیک فی الحریات السبع دى ؟

الشیخ عجایب — ناقصین واحده .

محمود — إیه هی دى ؟

عجایب — حرية التحمیل .

نوح — حرية ایه ؟

عجایب — حرية التحمیل .

نوح — كلام ایه ده یا شیخ عجایب .. ده كلام عیب ، ما نقدرش ننص علیھ فی صلب القانون .

عجایب — عیب ؟ ! واللی فات دا كله مش عیب ؟

سید — أصل یا شیخ عجایب .. حرية التحمیل .. حاجه



مفروغ منها .. كل واحد له الحق فيها .. من غير ما ننص  
عليها .. فيه حد مالوش حق في تحميل زوجته ؟  
عجائب - زوجته ؟. زوجته ايه ياسى سيد ؟ أنا قصدى  
زوجات الغير .

نوح - يانهارك اسود ، عايز تنص على كده فى القانون ؟  
عجائب - أيوه .  
نوح - أيوه ازاي بقى ؟  
عجائب - أيوه .. يعنى أيوه .. هى دى فيها حاجة ؟ .  
حرية التحميل بواسطة الأحجية والشبشبة والسحر والذى  
منه .. ياتنصوا عليها فى القانون ، يامستقيل .. السلام عليكم  
[ وينهض ] .

نوح - طيب اقعد بس .  
عجائب - اقعد ازاي .. مش كفايه اللي جرائى ..  
انتو عايزينى أقع فيه تانى .. هوا اللي جرائى دامت من  
تحت راس إن الحريه دى مش مكفوله .. أمال ايه بقى  
فايدة الجمعيه .. سلام عليكم [ وينهض ] ؟  
نوح - طيب اقعد .. حاننص لك عليها .. اكتبها  
عندك دى ياسيد افندى واكتب بين قوسين ( خاصة  
بالشيخ عجائب ) .  
محمود - واشمعى بقى الشيخ عجائب .. هوا فيه  
خيار وفاقوس ؟

نوح — يا أخى دى حاجه تدخل فى نطاق عمله .. يعنى يا كل  
 منها عيش .. وانت لازماك ليه .. حاتمعل أحجبه انت كان؟  
 محمود — مين يعرف .. حد عارف الظروف ، خليها  
 سمايه كده من غير تحديد .

نوح — حاضر .. خليها كده عامه مافيش داعى  
 للتخصيص ، اقر المادة اللى بعدها .

سيد — مادة ٣ : شروط العضوية ...

[ يندق الجرس فيقفز سيد الى الباب ، ويبدو الخوف على الجميع ،  
 يفتح سيد بجزر ولكن الباب يدفع ويدخل منه قرقر لاهتأ ] .

### المشهد الرابع



نوح

محمود

سيد



قرقر

عجايب

قرقر — [ متدفماً فى الحديث قبل أن يرى الموجودين ] الحق  
 يا سيد افندى ... عرفت ايه اللى حصل .. مش دلوقت



[ بلخ نوح افندی فتصیبه دهشة و فزع و یقف الکلام علی شفتیه ]  
الله .. هو سیدی نوح افندی هنا ؟ !

نوح — ایه الحکایه یا واد یا قرقر .. مالک ؟

قرقر — لا .. ما فیش حاجه .. دا انا بس .. اصلی ..

سید — أصلک ایه ؟ ! فیه ایه ؟ ! حصل حاجه ؟ !

قرقر — [ یغمز سید بطرف عینیه و یقترب منه هامماً ] حصل

کارته .. الست أم عبده قفشت الجواب اللى کان مدلدل من

البسکونه لأن ست بهیه ما کانتش موجوده وهى اللى کانت

قاعدته فى البسکونه .. واستقرته .. وعرفت اللى فیه .. وعامله

هیجان وحاتو دیکو فى داهیه .. شو فولکوا طریقته بسرعه .

سید — [ مذهولاً ] طریقته ؟ ! طریقته ایه بقى ؟ ! دى

اتنيلت خالص .

نوح — بتتوشوشوا بتقولوا ایه ؟ ! قرب هنا یا واد

یا قرقر .. قرب ؟ ! ایه الحکایه ؟ !

قرقر — [ یقترب مرتبکاً ] ما فیش حاجه .. ده موضوع

کان کلفنى بیه سید افندی .

نوح — طب اقعد .

قرقر — اقعد ازای ؟

نوح — اقعد .

قرقر — أنا ورا یا شغل .

نوح — قلت لك اقعد يعني اقعد .

قرقر — والسبت أم عبده ؟

نوح — ولا تهك .. انت مصيرك بقى فى إيدى  
حسب قانون الجمعية .. المادة (٢) الفقرة (ز) .. للأزواج  
حرية انتقام الخدم .. اقعد .. اكتب اسمه عندك يا سيد  
افندى .. أهو دلوقت بقى مجلس إداره محترم .. احنا  
ممكن كان نعمله سكرتير عام مساعد .. ده ينفعك أوى  
يا سيد افندى .. بقدر يساعدك ، فى كنس الجمعية .. فى  
رشها ، برضه الأمر ما يخلص .

سيد — [ بكتب ] عبد الجليل الجرجاوى وشهرته قرقر  
سكرتير عام مساعد لشؤون الكنس والرش .  
قرقر — ما بلاش حكاية الكنس والرش .. خليها  
عائمه .. يمكن تحتاجولى فى حاجه تانيه .

نوح — برضه أحسن ، اشطها ياسى سيد ، كمل قرابه .  
سيد — المادة ٣ : شروط العضوية :  
(١) أن يكون إنساناً عاقلاً محترماً .

محمود — [ صائحاً ] ايه هوا ده ؟! عاقل إيه ومحترم  
إيه؟ الظاهر انكم مش عايزين حد ينضم للجمعية أبداً ..  
دى شروط معبزه .. دى هى دى الشروط الللى يجب  
إنها ما تتوفرش فى العضو .



- نوح — إزای بقی ؟
- محمود — لانه إذا كان عاقل .. مش حایتجوز .
- سید — وإذا كان محترم ؟
- محمود — مش حایتخش الجمعیه .
- نوح — طیب شیل الشرط ده .. اقرا الی بعده .
- سید — (۲) اتین .
- نوح — خلیها (۱) واحد علی طول .
- سید — طب (۱) واحد .. أن یکون زوجاً تعیساً .
- قرقر — الله ؟ ! وإذا ما کانش متجوز زی حالاتی .
- نوح — الجمعیه تجوزه .
- قرقر — طیب وإذا ما بقاش تعیساً ؟
- نوح — الجمعیه تتولی إتعاسه .
- قرقر — ما اتعشش ؟
- نوح — تطلقه وتجوزه واحده تانیه تعسه .
- قرقر — برضه ما اتعشش .
- نوح — یبقی طابور خامس .. یجب فصله .
- قرقر — وإذا ..
- سید — احنا مش حانخلص والا إیه ؟ ! بس بقی یاسی
- قرقر خلینا نكمل .

قرقر — يعنى ما استفهمش ؟

سيد — ابقى استفهم بمدين .. خلينا نخلص دلوقت ،

[ ناظراً الى الباب فى تلقى .. ثم الى نوح فى استعطاف ] أظن كفايه  
كده النهارده ؟

نوح — كفايه ازاي .. انتوا ايه ؟ مش حاسين بخطورة  
الحاله .. احنا لازم نشغل ليل نهار .. الحاله وحشه جداً ،  
احنا اذا ما كناش نتقذ نفسنا .. حانروح فى داهيه .

[ دقائق متواصلة من الجرس .. طرقات متوالية على الباب .. وبسمع

صوت أم عبده من الخارج ]

أم عبده — افتح يا ضلالى منك له ، والنبي لأوديكوا

النيابه يا خباصين يا هلاسين .

نوح [ قافراً من مكانه وهو يلم الأوراق فى الحقيبة ] — يانهار

اسود دى أم عبده .. الحقونى .. لازم فيه وشايه بالجمعيه ،

خلاص ، روحنا فى داهيه .

[ يهرول بحقيبه وأوراقه مندفعاً الى باب الحجره وخلفه الشيخ

عجائب ]

قرقر — جمعيه ايه وبتاع ايه ؟ ايه العمل دلوقت ..

حانقولوا لها ايه على الجواب اللى بعتته سى محمودم البلكونه؟

محمود — أنا ياخويه ما بعثش حاجه .. حد الله بيني



وبينهم ، حد في الدنيا يجب بنت أم عبده !! يجب بنت  
 طور بيد ؟ بنت بركان !! ياساتر يارب .. أنا حازوغ ياخال  
 واصطفل انت معاها .. أنا طول عمري لا بااحب حد  
 ولا حد ييجيني ...

[ يتجه الى باب المطبخ ]

قرر - وأنا إيه اللي يخيليني أقابلها .. هوأ أنا مستغنى  
 عن نفسي .. خدني معاك ياسى محمود .. أنا مش حملها .  
 [ يختفي وراء محمود ]

[ يزداد الطرق والدق فيتجه سيد الى الباب مرتجفاً ويفتجه في تردد  
 فتدفعه أم عبده وتندفع نائفة الى الداخل وفي يدها الجواب ]

## المشهد الخامس



[ سيد - أم عبده ]

أم عبده - هوأ فين هوأ ده ، الضلالى الخباص الى  
 مايتشيش .. هوأ فاكرها إيه ، سايبه ؟ وكاله من غير  
 بواب ؟ مال من غير صاحب .. عايز يتلف البنت ويحبب  
 أملها ويخسر أخلاقها ، لا يا حبيبي .. لا يا عومر .. إحنا مش

من أهل ذلك .. احنا ناس أحرار ، مش بتوع مسخره .  
سيد — هدى نفسك بس ياست أم عبده .. هو  
لاسمح الله حد قال عليكوا حاجه ؟  
أم عبده — يقدر .. دا انا كنت قصفت رقبته ، وأطلع  
البلا على جتته .

سيد — طيب أمال مزعله نفسك ليه ؟  
أم عبده — مزعله نفسى ليه ؟! على اللى حصل ، هوا  
اللى حصل شويه .. عايزنى أرفع بالزغاريط .. عايزنى أتحمز  
وارقص .. هى دى عامله تتعمل هوا مافيش خشا مافيش حيا  
دا احنا ناس أشراف .

سيد — هوا فيه حد قال إنكم مش أشراف؟! دا اتم  
أسياد الناس .. دا اتم سمعتكم زى الجنيه الذهب .  
أم عبده — ولما اتوا عارفين كده .. يبقى لزومه  
إيه ده [ تشير بالخطاب ] لزومه إيه المسخره وقلة الأدب .

سيد — ياست أم عبده ، هوا فيه مسخره وقلة أدب!  
أم عبده — لا .. فيه حكم ، فيه وعظ ، حوش ياخويه  
الآيات اللى بتنقط منه حوش ، حوش الأدب اللى بيختر  
حوش ، آل فيه إيه ؟ .. فيه انت معى دائماً ، فى كل نومه  
وقومه ، ياخى إن شا الله بنام مايقوم ، معاه ازاي الضلالى



اللى ما تحتشيش على عرضه .. بنت زى دى لسه عندها ما تفتحتش  
يقول عليها انها معاه فى كل نومه .. إزاي !! دا أنا أوديه  
النيابه ، دانا أبيتته فى السجن .

سيد — ليه بس ياست أم عبده .. الراجل قصده  
برى و نيتته طيبه .

أم عبده — طيبه؟! ياخى ما طاب له عيش ، آل طيبه  
آل ، بعدما يقول لها انت نايمه معايه دايمآ .. يبقى برضه  
طيبه ، أمال كان ناقص يقول لها إيه؟

سيد — ياست دا قصده توريه .. يعنى فى ذهنه دايمآ ،  
وهو نايم وهو صاحى .

أم عبده — لا يا حبيبي .. لا يا نضرى .. احنا مش من  
بتوع التوريه ، احنا ناس جد .. ناس أصله .

سيد — احنا عارفين ياست أم عبده .. احنا عارفين  
قيمتكم كويس خالص ، ومحمود قصده شريف .. محمود  
بيحب بييه ، وعازن يتجوزها .

[ نسمع نحنة محمود من وراء باب المطبخ ]

أم عبده [ تايين بفض الشئ ] — واللى عازن يتجوز الناس  
ياسى سيد يقوم يتجوزهم بالسنانير والحبال ومشابك الغسيل  
من الشبايك والبلكونات .. برضه دا يضح ، هى ماهاش

أب .. مالهش أم ، افرض حد من الجيران كان شافه ،  
 يقولوا ايه .. يقولوا البنت دايره على حل شعرها ، يقولوا  
 مالهش حد يلها .. انت عارف الناس لساتها وحشه ازاي  
 ياسى سيد ، وماحدث بيقدر ولايعرف .  
 سيد — معلش يا خالتي أم عبده .. حقك عليه ..  
 امسحيا فيه أنا ، محمود برضه معذور أصله بيحب بهيه قوى  
 ويموت فيها .. يتمنى التراب اللي بتدوس عليه ، والنسمه  
 اللي بتمر بيها .. هي حياته ، هي روحه .  
 أم عبده — حيلك .. حيلك ياسى سيد ، احنا مش بتوع  
 حاجات زى دى .. احنا مانعرفش الحب .. احنا ناس جد .  
 سيد — وهو ده هزار ياستى أم عبده ، أمال يبقى ايه الجد؟  
 أم عبده — الجد عندنا يعنى جواز .. إذا كان عايزها ،  
 يجي يتقدم ومعاه الشبكه والذى منه .. ماذا والا ...  
 سيد — وجب ياست أم عبده .. دا برضه اللي حايعمله .  
 [ تسمع نحنة احتجاج من محمود وراء الباب ]  
 أم عبده — أهو كده الكلام .. الحكايه مش سايبه .  
 سيد — لا سايبه ازاي .. احنا ناس نعرف ونقدر .  
 أم عبده — أنا مستنيا كوا .. متأخروش .  
 سيد — نتأخر ازاي .. الليله دى نقرا الفاتحه .. وبكره  
 نجيب الشبكه .



أم عبده — أمال هوا فين سي محمود ؟  
 سيد — سي محمود .. أبوه .. بس وصل كده لغاية  
 مشوار بسيط وزمانه جاي .. اتفضلتي انت .. وانا أول  
 ماييجي حانزل لسك على طول .. مع السلامه .  
 أم عبده — خيلتك بعافيه .. مستنياكم .  
 سيد — الله يعافيكى .

[ لا تكاد تقرب من الباب حتى يذق الجرس بشدة ، فيرتك سيد  
 ارتباكا شديداً ويسرع نحو الباب ولا يكاد يفتحه حتى يجد عديله قد  
 اندفعت الى الداخل وهي تلهث ]

عديله — ستى .. الحقى يا ستى .. البوليس كابس على  
 البيت ويقولوا عايزين يفتشوا شقتنا والشقه دى كان .  
 أم عبده — [ تضرب على صدرها ] بوليس !؟ يا ندامه ..  
 حد عمل حاجه .. هم فين هم .. أما شوف ايه الحكاياه ؟  
 عديله — أهم طالعين فى رجلى يا ستى .

[ لا تكاد تم حديثها حتى يدخل ضابط مباحث ومعه اثنين من المحبرين ]

سيد — [ مذهولاً ] ايه ؟ فيه ايه ؟  
 الضابط — خليكوا زى ما انتو كده .. ما فيش حد  
 يتحرك .. فيه واحد هنا اسمه نوح افندى ؟

أم عبده — [ فى ذعر ] ماله نوح افندى ؟ ! جراله ايه ؟  
 فيه ايه ؟ !

الضابط — هوا فين ؟

سید — هوا فین ؟

الضابط — أبوه هو فین ؟

سید — ایش عرفنی .

الضابط — مش دی شقته ؟

عديله — لا يا حضرة البیه . . شقته تحت . . و دی

الست بتاعته .

الضابط — حضرتك ؟

أم عبده — أبوه أنا .. ماله نوح افندی ؟ مش تقوللی

يا حضرة الضابط وتریحنی .

الضابط — متهم بعمل جمعیه سريه لقلب نظام الحکم .

أم عبده — قلب ايه ؟ !

الضابط — نظام الحکم .

أم عبده — ياخى إن شا الله تنقلب دماغه ويتوجع

قلبه . . هوا ده يعرف يقلب نظام حکم . . ودا مين بقى

بسلامته اللی قال لك عليه الحكايه دى ؟

الضابط — يا ست احنا عندنا اثباتات . . احنا مش

بنهزر . . تعالوا كده شويه خلونا نفتش .

سید — وفتشوا هنا ليه ؟ ! إذا كان نوح افندی

مش ساکن هنا ؟



الضابط — لأن المعلومات التي عندنا ان الاجتماعات بتاعته مع أعضاء الجمعيه يعقدتها هنا .

أم عبده — بقي كده ؟! نوح افندى يعمل جمعيه واجتماعات !! طيب انفضلوا فتشوا .. إن شاء الله حاييجي نقبكم على شونه .. هوا نوح افندى فاضى غير للبصبصه والغنا . خشوا فتشوا .. الشقه أهى قدامكم .

سيد — [ مرتبكا ] لكن ..

الضابط — [ للمخبرين ] ياالله ابتدوا ..

[ يأخذ المخبران فى تفتيش الصالة ويتجه هو الى باب الحجره ]  
الضابط — [ مشيراً الى الباب ] وهنا فيه ايه ؟

سيد — [ مرتبكا ] هنا فيه .. فيه .. لا ما فيش حاجه ،  
ما فيش حاجه أبدأ .

الضابط — متأكد ؟

سيد — جداً .

أم عبده — ياخويا خش شوف وريح نفسك ..  
آل نوح أفندى آل .. دا تلقينه زمانه سطيجه من السكر ..  
هوأ يفوق لنفسه لما حايفوق للجمعيات .

[ الضابط يدفع الباب فيفاجأ بنوح افندى واقفا خلفه ممسكاً بالحقيبته  
والأوراق فيترجع فى دهشة ]

الضابط — الله ؟! ايه ده ؟

أم عبده — [ تقرب على صدرها ] نوح افندى .. يا نهار  
مهيب ومنيب .. انت بتعمل ايه هنا يا راجل !

الضابط — هوا دا نوح افندى .. هه .. بقى كده !!  
ما فيش حاجه أبدأ ؟ ! زمانه سطيحه من السكر !! اطلع  
يا نوح افندى .. اطلع .

[ يدخل نوح افندي فيبدو وراءه الشيخ عجائب وهو معصوب الرأس ]  
الضابط — ودا ايه كان ؟

عديله — [ تشق من فرط الدهشة ] الشيخ عجائب ، ينيلك  
انت كان بتعمل إيه هنا ؟

الضابط — خش .. خش .. وانت تبقى إيه يا شيخ  
عجائب .. عضو مجلس إداره منتدب ؟

عجائب — أبدأ والله .. أنا عضو عادى .. عضو  
مستجد ، بقالى خمس دقائق بس ، ولولا العلقه اللي اترقتها  
دلوقت ، ما كنتش دخلتها أبدأ .. الله يخرب بيتك يا زهره  
بحق جاه النبي ، إنت اللي كنت السبب .

أم عبده — يا ناس ، يا هوه ، أنا فى حلم والا علم ..  
نوح افندى والشيخ عجائب يعملوا جمعيه ، لقلب نظام الحكم ؟  
حقه بطواده واسمعواده .



عديله — يا ما تحت السواهي دواهي .. الواحد يشوفهم  
يقول عليهم غلابه وعلى نياتهم .

الضابط — [ لأحد الخبيرين ] خد منه الشنطه حطها على  
الترابيزه ، وطلع اللي فيها .

[ بهم الخبر بأخذ الأوراق والحقيبة ولكن نوح يتشبث بهما ]

الضابط — إديها له .

نوح — ما يمكنش .

الضابط — [ ف دهشة ] ما يمكنش ليه ؟

نوح — ما يمكنش يطلع اللي فيها قدام الحریم دول  
[ ويشير الى أم عبده وعديله ] .

الضابط — ليه بقى ؟ فيها قباحه ؟

نوح — وهم الستات يكرهوا القباحه ؟

الضابط — أمال فيها إيه ؟

نوح — بعدين أقول لك ، بس أرجوك تأمر ياخراج

صنف الحریم اللي هنا علشان نعرف نتفاهم على رواقه .

أم عبده — أنا أخرج ؟ يا اخي ان شا الله تخرج على

ضهرك يا بعيد .. وايش عجب .. أنا اللي أخرج بس ، أنا

لوحدي من دونهم كلهم اللي تخاف مني ، أنا اللي مستحملك

طول العمر ، ومستحمله همك وبلاويك .

الضابط — طب ياست انفضلى برّه شويه ، أما نشوف  
آخرتها معاه .

أم عبده — أنفضل برّه .. ليه عدوتّه؟ ا ضبا به على  
عينه؟ والنبي ما اخرج إلا اما اشوف إيه الحكايه .. أنا  
عارفاه ، وعارفه وحايده ، المسأله لازم فيها سر .

الضابط — ياستى خيلنا نشوف شغلنا .

أم عبده — دا بيتى .. ما اخرجشى ولا اتحر كشى .

الضابط — طب ياسى نوح افندى ، إديله الشنطه .

نوح — [ متشبثاً بها بشده ] أبدأ .. هوا أنا مجنون أوريها  
اللى فيها إيه .. أنا قتيل الشنطه .

الضابط — طيب خيلها معاك [ للخبزين ] كلوا تفتيش ،  
خش انت فتش فى بقية الأود [ يشير الى باب المطبخ ] ودا إيه؟  
سيد — المطبخ ودورة الميه .

الضابط — وفيهم إيه؟

سيد — عضو مجلس الاداره المنتدب .. والسكرتير  
العام المساعد .. لشئون الكنس والرش .

[ يفتح الباب .. ويخرج قرقر منفلا ]

قرقر — ماقولنا اشطبوها دى .. سكرتير عام مساعد

بس .. ما فيش لزوم للفضايح دى .



أم عبده — يابن الصرمه القديمه .. إنت كان بتشتغل  
فى الجمعيات السريه ؟! دى لازم جمعيه وقبع خالص .. سيهم  
يا حضرة الضابط سيهم بلاش تضيع وقت .. دول جماعه  
مخاييل .. أنا عارفهم كويس .. مافيش فيهم عاقل غير  
سى محمود أفندى .. لو كان هنا كنا قدرنا نعرف منه  
الحكايه وما فيها .

[ محمود يخرج متنحنجا ]

محمود — السلام عليكم .

أم عبده — يا نهار اسود .. إنت كان معاهم !! لا ..  
أنا خلاص .. برج من عقلى حايطير .. لازم أعرف إيه  
الحكايه ؟! إيه السر ؟!

الضابط — وده إيه كان ؟

نوح — عضو مجلس الإدارة المنتدب .

أم عبده — منتدب ؟! يا أخى إلهى يندبوا عليك ..  
يا راجل يا شايب يا عايب .. مش حاتوربنى إيه اللى فى  
السنطه دى ؟ .

نوح — مايمكفش . أنا مجنون أودى نفسى فى داهيه !

الضابط — إنت لسه حاتودى نفسك فى داهيه ..

دا انت حاتروح اللومان .

نوح — معلش لومان لومان .. برضه اهون من اللي  
حايجر الى لوشافت اللي في الشنطه .

أم عبده — آه يا نارى .. لو أتم على اللي فيها .. لأوريك  
نجوم الضهر .

نوح — شفت .. مش قلت لك .

الضابط — على العموم اتفضلوا قدامى كلكم .. كده  
بجالكم بمالكم .. اتفضلوا على المحافظه .

نوح — يا الله بينا .

محمود — يا الله بينا إزاي؟! هوه إيه أصله ده؟! ..  
إنت عايز تودينا في توكر .. لازم نقول لهم على الحقيقه .

نوح — حقيقه؟! .. إنت مجنون؟! .. دى هي دى اللي  
حاتودينا في توكر .. اسكتوا اتم من فضلكم أنا الرئيس  
وأنا مسؤول عن كل حاجه .. يا الله بينا .. أتمسى بالخير  
يا أم عبده .

أم عبده — الله لا يمسك ولا يصبحك بالخير زى  
ما انت محيرنى ومفرج على الناس .

[يتجهون نحو الباب وبهم أحد الخبرين بفتح الباب عندما يدق  
الجرس فجأة]

سيد [متزعجا] — وده بيق مين ده كان؟! ..



محمود — واحده من الفردتين .. هم اللى فاضلين ..  
مابقاش حد تانى بره أبدأ .

[ يفتح الباب فتبدو زكيه ولعه ]

محمود — مش قلت لك .. آدى فرده .. ببقى  
فاضل التانيه .

زكيه [ في ذهول ] — يا نصيبتى ؟ .. إيه الحكايه ؟ ..  
إيه أصله ده ؟ .. جرى إيه كفى الله الشر .. إحنا جاين  
نتعشى ونسهر ونتبسط والاجاين نفتح محضر .

أم عبده — بقى كده .. قولتولى .. يا خباصين  
يا هلاسين يا اولاد الصرم .. هى دى الجمعيه السريه بتاعتكم .  
بقى كلكم ملومين علشان تقعدوا تسكروا وتهيصوا ..  
وتعملوها أردغانه .. خشى يا ختى خشى .. خشى سمي عليهم ..  
قبل ما يروحوا التخشيه .. هوّا دا قلب نظام الحكم ..  
يا خى إلهى تنوجع قلوبكم .. من أولكم لآخركم .. ببقى كلكم  
ملومين علشان خاطر البت المفعوصه دى .. اللى زى  
عصا عيص النقاريه .

زكيه — نقاريه مين يا جيتتى .. ماشهش والا إيه ؟  
دانا ولعه والأجر على الله .

أم عبده — ولعه لما تقيد فى نافوخك ونافوخهم ..  
اتلى يابت لحسن والنبي ..

زكيه - والنبي إيه يا ادلعدي ؟! .. حاتعملي فيه إيه ..  
حاتقطعي الراتب اللي بتجربيه عليه . . حاتحوشي عنى  
الخيرات اللي مغرقنى فيها بسلامته نوح أفندى . . آل اللي  
يفرقه العويل يسفه .

أم عبده - سامع ياسى نوح . . سامع .  
الضابط - كويس قوى . . كويس خالص . . بلاش  
نشوف شغلنا ونقف نتفرج على ماتش الردح اللي بينكم .  
بس خلاص . . انتهينا . . فوتو قدامى كلكم .

أم عبده - يفوتوا قدامك إنت ؟! . . دول يفوتوا  
قدامى أنا . . إنت لسه برضك فاكر إنهم عاملين جميعه سرية  
وحا يقبلوا نظام الحكم ؟! بقى بعد اللي إنت شايفه ده  
عايز برضه تاخدكم معاك ؟! دا انت لازم على نيائك . .  
سيهم لى إنت . . أنا أشوف خلاصى معاهم . . اتفضل إنت  
و أنا حاشوف شغلى .

نوح - إوعى يا حضرة الضابط . . إوعى تسبيننا . .  
لوسيتنا أنا حابليج عنك . حايبقى إهمال فى تأدية وظيفتك . .  
أدينى بقول لك أهه .

عديله - طيب فوت إنت قدامى يا شيخ قطران .  
عجائب - أبدأ . . أنا مع نوح أفندى . . إلحقنى



يا حضرة الضابط .

الضابط — هو إيه أصله ده .. إنتم إيه حكايتمكم ؟ .

[ بدق الجرس ]

محمود — وادى الفرده التانيه .. أهى خلاص كلمت .  
أظن بعد كده مش حايبقى فيه خوف أبداً .. وادى قعده  
[ يجلس متربهاً على الكنبه بعد أن يأخذ زجاجة بيده ويفتحها ]  
تاخذلك شفته يا خال ؟

سيد — [ وهو يتجه ليفتح الباب ] يا أخى احنا فى إيه  
والا فى إيه . أما نشوف اللى حايجر النا .

محمود — يعنى حايجر النا إيه أكثر من كده ؟ آل  
ضربوا الأعور على عينه آل خسرانه خسرانه .

[ يفتح سيد الباب — فتبدو به بهيه ] .

بهيه [ فى ذهول وهي تهم بالتراجع ] — الله ؟ إيه جابكم  
كلكم هنا ؟

سيد — [ مرتبكاً ] لا مؤاخذه يا ست بهيه ، أصل فيه  
شوية سوء تفاهم ، أنا متأسف قوى ، اتفضللى استريحى .

[ تقف بهيه فى الباب حائرة ووجه ]

بهيه [ وهي تنظر الى المخبرين ] — ودول بيعملوا إيه هنا ؟  
وإيه اللى شايله بابا ؟

سيد — ما فيش حاجه . ما فيش حاجه أبداً [ يتقدم

نحو نوح أفندي وبأخذ منه الشنطة [ هات ياسى نوح أفندي  
الشنطة بتاعتى واتفضلوا انتوا على تحت . يا حضرة الضابط ،  
أنا اللى مسئول عن كل حاجه ، نوح أفندي كان جاى  
بيطالبنى بالأجره . فعرضت عليه إنه يشترك معايا فى  
جميعه عاملها ، اسمها جمعية قتل الزوجات .

الضابط — قتل إيه ؟

سيد — الزوجات ، الزوجات ، إنت مش متجوز ؟  
الضابط — متجوز .

سيد — يبقى المشروع لازم يهملك قوى .

الضابط — [ ضاحكا ] بس لسه متجوز جديد .

سيد — يبقى كان شهر واحد حا تحتاج لنا ، واتفضل  
شوف الأوراق علشان تصدق ، أهه اقرأ .

[ يقرأ الضابط نم يقهقه ] .

الضابط — دى الجمعية بتاعتكم ؟ وعلشان كده خايف

تورى الأوراق للست بتاعتك يا نوح أفندي ؟

نوح — أنا ما لياش دعوه بالجمعية ، أنا رفضت خالص

أشترك فيها . أنا راجل با أحب مراتى موت ، موت .

أم عبده — إيه ؟ بقى كده ؟

الضابط — طيب عن اذنكم يا جماعه ، أنا متأسف أوى



لسوء التفاهم الى حصل، الظاهر ان المعلومات التي جت لنا كانت  
مبنيه على مجرد شكوك كاذبه متأسف جداً ، سلاموا عليكم .

[يخرج الضابط والمخبرين ويحاول نوح الخروج في أذيالهم ]

أم عبده [ توفقه ] — بس ، رايح فين ؟

نوح — مش خلاص خلصنا؟ الحكايه طلعت فشوش؟

أم عبده — فشوش عندهم هم ، لكن مش عندي أنا ،

إنت فاكر أنا ينطلي عليّ الكلام ده ، أنا لسه لي حساب

معاك . الست ولعه هانم إية اللي جابها هنا .. جايه لمين ؟

نوح — أنا عارف ، هو أنا صاحب الشقه .

أم عبده — والشرب والمزه دي مين اللي جايهم ؟

نوح — أنا مالي يا ست .

أم عبده — مالك ؟! جاك مله علي جنابك ، دا أنا

حاسو دعشتك . ما بقاش إيان غير تجيب لي النسوان الهلافيت

لغاية البيت ، أنا أبقى قاعده تحت مستنيك علي نار ، و انت

قاعد تسكر وتهيص وتفرفش مع الست ولعه [ تمسك بتلابيه

وتهم بضره ] .

نوح — يا ست والله العظيم أنا ما اعرف إنها جايه .

أم عبده — أمال يعني جايه لمين ؟ [ تشدد الخناق عليه ]

حمود — جايه لي أنا يا ست أم عبده ، سبني الراجل

بقي ، ده مظلوم .

أم عبده — [ تستدير الى محمود ] جايه لك انت ؟ اوكان  
بتقرر بلسانك يا خباص يا ضلالى . انت اللى عامل بتحب وعمال  
تحدف جواربات الغرام من الشبايك والبلكونات . انت اللى  
عمال تضحك على عقول البنات . انت يا نصاب يا فلاقى ،  
والنبي لاوديك فى داهيه . شايفه يا ست بهيه شايفه السافل  
الدون المجرم . اللى عامل يضحك على عقلك .. شايفه  
الرجاله .

سيد — [ فى غضب شديد ] إيه ده يا سى محمود الكلام  
الفارغ اللى بتقوله ده ، ما تصدقش يا ست أم عبده ،  
ما تسمعش كلامه يا ست بهيه ، دا بيحكى قوى .. دا ييموت  
فيك . دا ما بينامش الليل من التفكير فيك ، دا حا يخطبك  
حالا دلوقت .

زكيه — [ صارخه ] يخطبها ؟ الخاين ، اللى ما عندوش  
ضمير . وأنا أمرته ؟

محمود — بقى اسمع يا خال ، لحد هنا وبس ، كفايه  
اللخبطة اللى حصلت دى كلها ، أنا قلت لك أنا لا با أحب  
ولا با اخطب .

سيد — ما تصدقش يا ست بهيه ، دا بيكذب .



بهيه — [ تطرق برأسها ] لا ما بيكذبش ، اللي بيكذب  
إنت .. أنا عارفه مين اللي يبجيني ، وعارفه مين اللي بيكتب  
لى الجوابات . أنا عارفه مين اللي بيقعد طول الليل يصفر  
الألحان الحزينه الجميله . أنا عارفه مين اللي قلبه جميل ومشاعره  
رقيقه ونفسه طيبه ، عارفه كل حاجه . وحاسه بالجرح اللي  
سيتهولك أول مره شفتك ، وعرفت بعدها إن أنا اخطأت  
الشخص اللي بجه ، وابتدا شعورى يتجه اتجاهه الصحيح ،  
وحاولت كام مره أقول لك إن أنا عارفه ، لكن كنت  
ما بتدنيش فرصه ، كنت بتهرب ، كنت خايف ، وأظن  
دلوقت أحسن فرصه أقول لك فيها الحقيقه قدامهم كلهم .  
وأقول لك كان أنا مستعده إنى اتجوزك .

سيد — [ مذمولا ] مش معقول ، أنا مش مصدق ؟  
أنا ، أنا ، إنتى ، إنتى ؟

أم عبده — ماشاء الله ، ولك عين تقولى كده قدامنا ؟

سيد — يا خالتى أم عبده ، أنا مش قادر أقول إيه . .  
أنا ما كنتش فاكتر إن ربنا حايكمرنى للدرجه دى . . أنا  
ما كنتش متصور أبدأ إن صبرى الطويل ده ينتهى بتحقيق  
الحلم اللي كنت يائس منه . . . أنا طالب القرب منك فى  
بنتك . . أنا طالب القرب منك يا نوح افندى .

نوح - وجمعية قتل الزوجات ؟

سيد - فلنسقط جمعية قتل الزوجات .. ولتحي  
الزوجات .

نوح - واذا عملت فيك زى امها ما بتعمل فيه ؟

بيه - ما افتكرش ، ما فيش أسهل من مرضاة الزوج ،  
الحكاية ما تستوجبش جهد كبير أبداً .. كل الحكايات إن  
الزوجه تكيف مزاجها على مزاج جوزها .. إذا كان  
ما يحبش الخروج تبقى تحاول هي إنها تحب البيت ، وإذا كان  
يكره التنظيف ، يبقى مش لازم تنظف قدامه .. ده بيته اللي  
يسترى فيه .. وأظن أقل ما فيها إنها تهيأ له فيه الحاجه اللي  
ترضيه حتى ولو كانت غلط ، ومش ضرورى تضيق عليه ،  
وتسنىكر عليه الشبايبك .. لازم تديله شوية حريه ، وشوية  
هوا ، يخلوه يحس بقيمتها .. ما فيش داعى تشتغل له بوليس  
سرى ، المهم إنها هي تكون كويسه . ومسيره إذا كان يبص  
كده والاكده أنه يقارن بينها وبين غيرها ، ويحس بفضلها  
ويعرف إن هي الأحسن ، وإنه مالوش غيرها ، ما فيش  
داعى للشبشه والسحر والكلام الفارغ .. كل ده نصب  
واحتيال .



عجائب — أيوه ، والله يا بنتي لك حق ، أنا عمري ما فلتحت في  
حاجه عملتها أبداً .. إلا حاجه واحده ، اللي هي كانت طالباها  
منى بنت الصرم .. عديله .

محمود — كانت طالبه إيه ؟

عجائب — كانت عايزه أعمل لها حجاب علشان تتجوز .  
عملت لها الحجاب ، وبعد جمعيتين اتجوزتني ، ووقعت أنا في  
شر أعمالى .

عديله — بقی كده ، طيب بس لما تطلع فوق .. وأنا  
أسود لك العين التانيه .

محمود — ودلوقت خلاص وافقتم ؟

نوح — أنا ما عنديش مانع .

أم عبده — أما نتفق في الأول على المهر والشبكه .

نوح — طيب ، بعدين يحلها ربنا .

أم عبده — أبداً .. دلوقت لازم ننهي كل حاجه .

سيد — أيوه برضه أحسن .. أنا مستعد لكل حاجه .

أم عبده — أنا عايزه خمسين جنيهه شبكه .

محمود — خمسين إيه ؟

أم عبده — خمسين جنيهه .

محمود — طيب خيلنا بقى لما بيعتولنا فلوس م البلد .  
أم عبده — بلد؟ بلد إيه يا عمر .. أنا عايزه الفلوس  
دلوقت حالا .

نوح — حالا إزاي بس ياست أم عبده .. هى الحكايه  
إيه؟ قفش!

أم عبده — أيوه قفش .. أنا لازم أربطهم .  
سيد — بس ، وبعدين .. ياجماعه .

[ يدق الجرس ]

محمود — ودا يبقى مين دا كان؟

[ يفتح قفرك فيجد الباب الشيخ زين ]

الشيخ زين — يا ساتر .. السلام عليكم .. هى دى شقة

سيد أفندى الفنط ...

قرقر [ فرحاً ] — شيخ زين !! أهلا وسهلا .. جيت  
فى وقتك يا شيخ زين .. اتفضل .. اتفضل [ بدخله ويجلسه  
على أحد المقاعد باحترام وترحيب شديد ] أهلا .. وسهلا ..  
أهلا .. اتفضل .

[ يجلس الرجل صامتاً والجميع ينظرون اليه فى دهشة ويتسلل  
قرقر الى المطبخ ثم يحضر مقشاة غليظة ويقف وراءه ثم يهوي بها  
على رأسه ] فينخر مخشياً عليه .



سید [صارخا] — ایہ دہ ؟ ایہ الی عملتہ دہ ؟ انت  
اتجنت ؟

قرقر [بفرك بديه] — بس فرجت [بدخل يده في جيب  
الرجل ثم يخرج الحفظة مليئة بالنقود] عايزين كام [بمد] عشره ..  
عشرين .. ثلاثين .. أربعين .. خمسين .. يدوبك يكلم  
[ يعطى النقود لأم عبده ]

أم عبده — ایہ الی عملتہ دہ ؟

قرقر — خدی بس دی فلوسهم .. جايبهاهم م البلد .  
نوح — طيب وما سبتوش ليه لما يديهاهم ؟  
قرقر — أسيبه ؟ هوا انا اتجنت .. حايقعد يقول ..  
بعد فحص وبحث وتمحيص وإثبات شخصيه ، وموت  
ياحمار لما يجيلك العليق .

زكيه [نم بالخروج] — طيب اخرج أنا بقي .

محمود — تخرجي ازاي ادول هم اللى يخرجوا .. يا الله  
ياجماعه اتفضلوا كلكم من غير مطرود .. يا الله يا الله .

أم عبده — يا الله بينا ، فوت قدامى ياسخام البرك ؟

سید — اتفضل يانوح افتدى .

قرقر [بتقدم هو] — ولا مؤاخذه سخام البرك ..

دا يبقى انا .. نوح افندى يبقى هباب الطين .  
أم عبده - اتفضل ياسى هباب الطين .  
نوح - مافيش فايده .. اللسان الزفر .. حايفضل  
طول عمره زفر .  
محمود - فلتسقط الزوجات ولتحجى زكيه ولعه .

[ يسدل الستار ]

ختم



للمؤلف

تحت الطبع

تمثيلات قصيرة  
ساكنة الحنايا  
فديتك يا ليلى  
أساطير الأولين  
موته لله

تطلب كتب المؤلف من :

مكتبة النهضة المصرية، ودار الفكر العربي، والخانجي بالقاهرة.

د النهضة السودانية بالخرطوم .

د المثني ببغداد .

دار المعارف ببيروت .

د اليقظة العربية بدمشق .


د الكتاب بالدار البيضاء .

مكتبة الثقافة بمكة المكرمة .

شركة فن الطباعة

شارع الأمتار رقم ١ - سراي مصر  
هاتف ٥٨١١٩ - ص. ب. ١٠٠٠









ملزم الطبع والنشر  
مكتبة النهضة المصرية

شركة بن الخديعة

طبعة الإصدار رقم ١ شهر أغسطس  
معدت ١٩١٩ م. ص ١٢٤









LIBRARY  
OF  
PRINCETON UNIVERSITY



Princeton University Library



32101 072236019

Princeton University Library  
32101 072236019